

BIBLIOTECA NAZ.
Vittorio Emanuele III

XXVI


A

49

NAPOLI









A. M. FREDRO
Mónita politica
Moralia.



M. DC. LXXIX

ANDREÆ
MAXIMILIANI
FREDRO

Castellani Leopoldi-
liensis

MONITA
POLITICO-
MORALIA

&
ICON INGE-
NIORUM



Cum Privilegio S. Cæs. Maj.

ANNO CHRISTI

M DC LXXIX.

Impensis MARTINI HERMSDORFFII

LAUS
Uni in
S.S. TRINITATE
DEO,

& Uni
Virgini MATRIDEI
Honor.



Auctor Lectori salutem.

PRomptius (credo).succensebis, pro intuitu Operis,quàm laudabis Scriptum,
LECTOR. Confusum ajes, quia non in materias combinatum, verùm studiosè concisum, opere de ultorio sparsum, membratim distractum; Non diffiterer ingenuè defectum, si aliter facere potuissem, verùm quot monita, tot rerum diversarum habes arcana; Fortè verò videbuntur aliqua, inani studio repetita, bis, terque si releges, sensum & verba ponderabis, novum gustum ut capias, exindè longè videbis à semet diversa, aut rem in melius explicantia. **C**arior (utique spero) tibi obveniet horum lectio; quò mihi operosior venit scriptio, non enim novennio (quod vulgò ajunt) pressa, sed bis novenni opera limata, trutinata. Domesticorum monitorum loco, hæc mihi (secretori calamo) sensim cepi dudum annotare, crevit (per agnitos cominus, publicè privatimque errores) ab experientia, & adjectione diurna, opus, cur improbes? si fidenter profero in palam, & Catholica charitate, tibi quoque non obfuturum communico, casta, sobriaque mente præsertim legendum: Dabis aliquid.

A 2

quid pro nævo ; lubens acceptabo , quid enim nostrum in orbe perfectum ? & vita , & scripta , credo non sunt prorsus errore vacua. Parces LECTOR facile , mihi homini , ipse dum homo es , habes , credo (dicto , facto) tibi quod ab aliis parcat ,
Vale.

Cautio.

Qui semel hæc legis , neutiquam legisse te puta ; Iterato revolvis ? scies aliquid ; Jam qui tertio ; Utique totum capies , idque non perfunctoria aut abruptâ operâ , verum recollecta (& in se retracta per totum mente) lecturus ; Ni verò facias , sepone quæso librum , vel aliud age ; Levi- culi , & obliqui procul hinc sunt , ma- turis & defæcatis ingenuis , ista scribuntur.



ANDREÆ MAXIMILIANI FREDRO

Castellani Leopoliensis

MONITA POLITICO-
MORALIA,

Seu

Quomodo vivendum cum
paucis, cum populo, salva Virtute,
Gratia, & Authoritate,

Pars prima Politica-Moralium.

I.

DEUM publicè & cum appa-
ratu cole, ut tibi factò, aliisque pro-
ficias exemplo, virtuosì nomen, non ex-
vano paraturus, eòque potens.

2. Sobrius sis, ut eveniant tibi res sanæ,
& sobriæ.

3. Omnia seriò fac, & cum gravitate,

A 3

nun-

nunquam obiter; Immo lente fac, nec properanter. *Currendo, non rependo, fit lapsus.* Deus cum magnificum opus mundi aggredieretur, & momento in unico, pro summa potestate potuisset creare perfectum totum, prout patuit, immo fecit, sed cum humano modo factum orbi repræsentat, sex velut dies insumsit operi, ut monstraret mortalibus, magna nisi sensim posse fieri correctâ, perfectâque; vel quia magis magnificatur opus, cui non obiter immoramur faciendo. Vis rem bene habere? Lente fac, & sæpe corrige. Re ipsâ experire, reperturū te vesperi, quod corrigas, quod mane actum, aut habitum ex perfecto credidisti.

4. Sis publice munificus, sine jactantia & prodigalitate, *perdere multi sciunt, donare nesciunt.*

5. Non impera, non pete, nisi quæ obtinere speras, qui impossibilia petit, non vult habere, & simul vult offendi. Idque per alios petes, nec satagenter; non objice statim auctoritatem, sæpe quæ nimis petimus, nobis neganda præcavemus.

6. Non promitte, nisi quæ præstare potes, ne levitatis arguaris.

7. Non

7. Non dic nisi quæ vera, & sine invidia audientium.

8. Frustra minas intendis, si timeri non credis, potius præoccupata contemptum minarum, dissimulatione.

9. Meminisse magis oportet, quàm irasci aut dolere, infra tuum animū esse doce, quæ acciderunt, ac potius per risum habe.

10. Nec te lauda, nec vitupera, ab hoc contemptus, ab illo invidia paratur.

11. Non mirare, non cantare, non lude, ut leviusculus.

12. Non sæpius quære, potius scientiam, quàm nescitiam simula.

13. Quæ tibi difficilia aut ignota obijciuntur, tacendo excipe. *Stultus quoque sit acuerit, sapiens reputabitur, (Proverb. Salomon.)*

14. Non crebrum, lentum, non affectatum, & propè ænigmaticum sit alloquium; sed tamen librata nimis & eluctantia verba, fastidium (immò suspicionem) pariunt audientibus, & cathedram sapiunt, solutior non nihil sermo, magis familiaris est, velut de Petronio Tacitus: *Cujus dicta, factaque, quanto solutiora, & quandam sui negligentiam præ se ferentia, tanto gratius in*

speciem simplicitatis accipiebantur. Circa familiare vitæ commercium cum amicis, in condimentum convictus, probaverim, in publicis tamen actibus, gravitas sermonis præstat.

15 Si vitium loquacitatis pervincere studeas, statue, non quid prudenter loquaris, sed quam diu per intervalla tacendum (licet opportunè dicenda videantur) & vinces; Aliàs opportuna dicere cum studes, ad importuna erumpes, rectè ille ait, *Loqui me aliquando pœnituit, tacuisse nunquam.* In nonnullis tamen loquitur bonus candor & zelus, in nonnullis inquires genius, & dicacitas, dum in quascunque aures inciderint, ut confesso rem intimorum judicemque sine discrimine personarum sibi statuunt, unde produntur & iridentur.

16. Nonnulli dum esse sinceri nimis volunt, incauti fiunt, proditores verius sui; quàm in amicitia aperti; cum dicenda, tacenda pariter effutiunt per levitatem.

17. Quisquis blando vultu dicentes audit, iisque comiter respondet, pariter agit, ac si humanos animos, in potestate sua, referendis affectibus, dum vult, habeat. Quæ virtus inter potiores (civium) parandis homi-

hominum & Provincialium animis, censeri debet, si verò secus rugosâ fronte, obiter-que dicentem audias, respondeasve, licet in gratiam postea facturus, quid juyat? etsi obtineat qui cupit, cum à nolente & moroso profectum habet animo, non ut datum, sed velut extortum, ac potius projectum. Ut pluris sit, blandam negationem retulisse, quam morosè obtinuisset concessum. Exinde usurpari vulgò dictum. *Etsi non obtineat, habeat tamen velut acceptum qui se amicè audiri videt.* Tum illud, *Æger animus dum ad satietatem enarraverit quod vult, æquiparatur obtento.* Vidit orbis, nunc & olim viros Principes, alias magnis animi dotibus præditos, sine hujus virtutis condimento, parùm valuisse in vulgus, aut (quod pejus) in odium publicum incidisse, exindè rectè, de Toletano Albæ Duce, quidam observatum reliquit, ut propter suum triste & fastuosum (neque ideo civile aut sociabile) ingenium, ne ab iis quidem amaretur, quibus benefecerat.

18. Vestitus propius magnificentiam sit, & auctoritatem, quam quæsitam ostentationem, aut luxum.

19. Gestus gravis, non Melancholicus, aut effusè hilaris. A 5 20. Ab-

20. Absentiâ sæpe authoritatem tuare,
*Continuus aspectus, minus verendos homines,
assiduâ satietate facit.*

21. Verissimum axioma. *In ignotis ma-
gis dilatarî animum.* Exindè sæpè æstima-
mus magis, longinqua, quàm proximiora,
audienda, quàm audita; tum videnda,
quàm visa, habenda quàm habita, pollicita,
quàm data aut accepta, scienda quàm scita;
& futura quàm præsentia. *Sic, Majestati
major è longinquo reverentia, & omne
ignotum pro magnifico. Sic, Authorum
ignotorum opera, magnifica habentur, viso
authore vilescunt, magisque post funera
inclarescunt facta, & virtus nostra & no-
men; Sic, Major de absentibus personis
opinio, nam satagentius ab ignoto quæri-
tur; aut imaginamur. Quis ille? quàm
ut dicatur semel in præsentia. Hic est,
nec gradus amplius datur, quò vadat ani-
mus, cùm visum & scitum, plenè sub ocu-
lis habetur. Sic (per varia cundo) pericu-
la Castrorum, magis terrent longinquos
domi, quàm milites pro vallo stantes, &
vulnerum spectatores. Sic nova subsidia,
medio in prælio ex ignoto in hostem im-
missa, licet pauca, sed quia sub specie igno-
tarum*

tarum insidiarum veniunt, plus terrent hostem, quàm acies numerosa, oculis subiecta. Sic puerorum minorennium aliquando delectamur plus ætate, quàm adultorum, hi enim actu monstrant quales sint, aut quales amplius esse non possint, circa illos, latius spes extenditur, quales futuri sint, immò ominamur (speranda maiora ex ingenuitate) quales reverà futuri non sint. Sic ruinas antiquarum structurarum, miramur magis, quàm forsan æstimaremus ex integro stantes, nam integrum quod est, oculis totum subjacet, & limitat (aut circumscribit) mentem, nec ultra procedit animus, tam imaginatio, quæ latius extenditur, quàm sensus: de ruinatis & in integro non visis, plus imaginamur, extendendo mentem per diversa, quàm forsan erat in rei veritate. Sic absentium ambigui sermones, sunt magis læsivi, dum sub latiore interpretationem cadunt, in præsentia effati condonantur levitati verborum, seu ingenuitati dicti, tum circumstantiis personarum, temporis, rerum, loci, jocorum, discursuum, occasionis, quæ sæpè minuunt offensam, dum in præsentia, prout in se sunt, capiuntur, neque delatorum

malignitate torquentur, si præsertim illi exaggerando studiosè; iram succendere amant, cui rem deferunt. Sic vana licet spes ex licentia ditescendi, & expectatio furtivorum, tum incertorum pollicitatio, plures quandoque affeclas habet, quàm certum bonum, quàm merces & stipendia, ut verissimè à quodam sit observatum, & à me alibi dictum. *Gratius esse hominiano animo ascendere in parvis, quàm persistere in magno, & per partes, quàm per totum; tum illud: Quasita in pretio, vulgaria habitaque contemnuntur; In pluribus opinione laboratur.*

22. Non dictum, factumque repete, quò major insit ex raritate verbo, rei quæ autoritas.

23. Cum Gravibus ambula, leviculorum conversatione delectaberis quidem, sed tandem deturpaberis.

24. Non æstimatos, juvenes, minores, temulentos item, verbo, multò magis conversatione vitabis.

25. Quæ cum dedecore in præsentia dicuntur aut fiunt, modestè reprehende, aut abi, subtrahiturus ab ea indignitate oculos & aures, multò minus ipse fac, nè velis

velis placere assensu, quòd est propè levitatem.

26. *Negotia (quoad tute poteris) per alios tenta, fac, impera, vide, cura; levio-rem jacturam rei credes, quàm authori- tatis, immò admonebis corrigendos, non ipse, sed per alium, sic vitabis præsentem exacerbationem, nec facies periculum tuæ præsentiae, quæ nisi opinionem (quousq; sit non vulgaris) ex raritate habet, gravio-ribus tantùm negotiis reservanda, ut sem- per penes te restet, quò in majus dum vis, rem urgere possis. Non astum exindè, ut nonnulli Commentariorum iniquè in- terpretantur, sed potissimum perspicacita- tem Tyberii (ap. Tacitum Annal. I.) ob- servare licet, qui exercitum in Germaniis tumultuantem, tantùm per filios adiri vo- luit, Majestate salvâ, cui major è longinquo reverentia, simul adolescentibus excusatum, quâdam ad Patrem rejicere; Resistentibus Germanico aut Druso, posse à se mitigari, vel infringi, quod aliud (Nota verba) subsidi- um? si præsentem Imperatorem sprevis- sent.*

27. Nunquam effunde totam simul fa- miliaritatem & amorem, vel effusus, lentè fac & pedetentim, potiùs intenda-

tur amicitia, quàm intentia sit, habenda petitur, habita ut vulgata relinquitur, & satietate vilescit; Erravit ille, de quo annotatū. *Milites suos Commilitones, novo blandoque more appellans, dum affectat charior fieri, auctoritatem principis emolliverat.* Sub initiis præsertim cavebitur, effusioe officio aut favore, tum gratiâ nè aliquem prosequaris, sed facies intra moderationis terminos, dum enim intensi actus lassantur, quæ agenda tractu temporis sequuntur, vix iisdem principiis respondere possunt, pro injuria verò reputatur, diminui, tum auferri, in cujus possessionem semel involavit animus.

28. Hinc sequitur, ut non solum affectus *Amoris* (aut secus *Ira*) sed *prudentiam* ipsam per modica, nec affectatè ostentemus, dum æstimari volumus, nam pro vana ingenii ostentatione, dum per familiares discursus, effundunt se totos aliqui, nimii commemorandis rebus, loquaces & affectati, quasi nihil in posterum *pro subsidio novæ objectionis* relinquentes, dum opinionem prudentiæ, & exindè auctoritatem sibi parare cupiunt, potius eam perdunt, similes forensibus licitatoribus, cum
levi-

levioris momenti res & crepundia ad nundinas ferunt, per obvia fora institorias tabernas ponunt, alias non quærendi, nisi emprores quærerent ipsi, & essent in obvio. Jam verò, pretiosarum mercium venditores, ditioꝛe lucro negotiantur, eo ipso æstimationem mercibus posaturi, dum sine ostentatione, satis habent sciri de mercibus, & quærentur ut vendant, non quærunt affectatè emprores. Quidquid igitur æstimatum haberi volumus, in affectu nostro bono (aut secus contrario) seu in ratione agendi, lentè, tum per modicas partes exerceamus, nè plenè satiemus, semper aliquid in potestate nostrâ in posterum reservaturi, quo in majus (dum pro tempore volumus) à nobis res intendatur. *Totum spiritum suum profert stultus, at sapiens reservat aliquid in posterum* (Proverb. Salom.) & Eccl: *In ore fatuorum cor illorum, & in corde sapientum, os illorum.*

27. Non vitupera amicum, non lauda, non reprehende, nisi in magnis, idque raro, moderatè, & in secessu, vel (si tutè poteris) per alium, *factum tamen, non personam* ventilaturus.

30. Consilium nisi quod rectum sciveris,

ris , idque tantum requisitus porrige ;
 Verùm dator consilii, naturam accipientis,
 (seu cui consulitur) induat, prout secun-
 dum possibilitatem, media, capacitatem,
 aptus est ille faciendo, secus, frustra fere
 consulas, dùm juxta te modo, non alte-
 rum, aut saltèm non ex utroque, agen-
 dum vocas.

31. Non intercede aut pete pro alio,
 nisi re perpensâ, an justa sit, & obtentu
 possibilis, nè periculum aùthoritatis sub-
 eas, si non obtineas, potius intercedere
 cavebis.

32. Non litiga verbo, sed potiùs sub-
 ride (etiamsi contrarium aliquis loquatur)
 non velis videri nimis sapiens, magni viri
 aùthoritas, non in disputando, sed agendo
 consistit.

33. Tacere qui scit, scit esse prudens.
 Taciturnitas est magnæ prudentiæ Mater.
 Qui animo ignavus, procax ore; quibus os
 ferreum inest, cor sæpè plumbeum ha-
 bept. Verùm nonnullis, taciturnitas &
 agendi secretum ex prudentia, aliis est ex
 metu, ut cum ex diffidentiâ sui, verentur,
 nè per inanimadvertentiam aliquid pro-
 dant, totum silent, opportunaque trans-
 mittunt,

mittunt, similes Zeuxis imaginibus, qui ad ostentationem artis, imaginum pingebat vela, ut subintelligeretur velatum aliquid, dum nihil erat; sic illi obtendunt rebus inania arcana, nunquam directè, sed nisi circuitivè agentes, vel quia metuunt, vel dum inertiam impotentiamque agendi prodere verentur. Fossam saltu trajeturi, impetum saltus, cursu intendunt, etiam animus agentis, zelo quandoque intendatur oportet, & apertior sit, pro confidentia sui, & pro ingenuitate, præstaturus ardua. Qui diffidit, metuit; Mollia, secretaq; cauta quidem sunt, sed quædam nisi fervidius tractentur, haud obtineantur, immò irritentur in pejus, cum dolus, malignitas, vel etiam metus, occultis secretisque (immò circuitivis) subesse creditur, prout verè circuitiva ingenia, plus astutiæ, quàm prudentiæ, vel cautionis habent.

34. Quæ imperfectè calles, non fac coram, immò perfecta fac, quæ non vulgaria & rarò.

35. Magna loquere, & à levi discursu studiose deflecte.

36. Facta secretus tene, facienda multò magis.

37. Vi-

37. Vitia quæ vitare non potes, latebris dica, omnia quæ scis reprehendi, fac in privato, & *semotis saltè arbitris, turpis sis.* Non ea tamen est infirmitas naturæ humanæ, quin vitare vitium non possis, dùm velis, frustra naturam culpaturus, ipse culpandus; Vitare igitur turpia debes, quò magis altioris honoris subsistis gradu, minoribus magis quodammodo turpes esse licet, secus in majores honestosque, omnium oculi convertuntur & succensent, uti facilius maculam noveris in puriore cristallo, quàm in olla.

38. Rectius plerumque impertinentia demendo in nostris moribus, in affectibus, & ratione agendi, quàm addendo opportuna, paratur æstimatio, & habetur auctoritas; Velut hortulani, plus addunt horto decoris & amœnitatis, amputando sentes, evellendo urticas, purgando vias, disponendo plantas per ordines, quàm subster-nendo fimum in fecunditatem, quàm copiose serendo; Excessu magis vitiorum homines laboramus, quàm virtutum imperfectione. Prius quid non facere mali, quàm quid facere boni, præceptis decalogi etiam docemur.

39. Raucus aut balbus, rarius loquaris, unde illusionis materies.

40. Causas dictorum factorumque non redde, sed potius intelligantur.

41. Sperent à te homines, ac simul vereantur; æque severus, atque clemens videaris.

42. Nec præsume, nec te minoris æstima, angulis & latebris ingerendo,ingere te (sed modeste tamen) primoribus. *Nemo contemnitur, nisi qui prius seipsum contempserit, quomodo credis alios te æstimaturos? nisi te ipsum æstimas, & in leviuscula abjicis, tibi magis proximus, quàm alius tibi, recte quidam ait: Non est hoc superbire, Majestatem Regni, & potestatem, auctoritatemque publicam sibi concessam, conservare velle inviolatam, imò hoc est sapere. Verùm perspicacitate utendum, ne superbiam morositatemque, cum auctoritate confundamus, & quod est incivilitatis, pariter auctoritati adhibeatur, nè alias pro unica æstimatione tui, immodestis aut scrupulosius laborando, mille inimicos tibi, superbus pares, & eveniat, quod rebeli Angelo, dum supernis bonis honoreque non contentus, vult insuper esse similis Altissimi.*

mo, totum suum quod habuit perdidit. Cavebis igitur *morosam gravitatem*. Hæc in privatis; In publicis verò actibus *Consultum* fuerit, ut qui debitos tibi honores *denegat*, (præsertim si conscius sis necessariæ tibi gravitatis) etiam vi & astu quodam, eos oportet præripere aliis, quàm ea de re verbis contendere; Qui dubitat, meritò ipse sibi diffidit, qui dissimulat, tacitè fatetur suam indignitatem, & modestia postea pro ridiculo habetur; sed qui de facto, animo forti & constanti, tùm bona cum gravitate (tamen sine intempestivo affectu) primas præ aliis occupat, quæ sibi debentur, nec offeruntur tamen, facili deinde negotio eas servet, & retinet in posterum. Ut quondam Germanorum legatis contigit; qui cùm ingressi theatrum Pompeji, legatos nationum, senatores inter, sedere cernerent, inter eosdem senatores, sessum se audacèr præriperunt, subjungentes. Nullos mortalium, armis pro Romanis, aut fide, ante Germanos esse, quod comitèr à senatu exceptum, ut ea legatorum civilis æmulatio, postea cederet in argumentum & possessionem loci.

43. Novarum rerum, aut inauditarum, immò novorum rumorum, à domo, immò

mo ab externo, certam notitiam quære, quod parit admirationē scitæ curiositatis.

44. Modica castigatio exacerbat nonnunquam magis, quàm corrigit, ut tutius sit, quandoque non punire, si severius corripere nolis. Non sine causa Salomon arguit intempestivam clementiam, dùm vocat *Misericordias* (aliquorum) *crudeles*. Bonis verè nocet, quisquis pepercit malis, sed hoc pro statu rei, & temporis; Scias tamen, quia *pœna nisi prohibet flagitium, laus verò & premia, provocant virtutem, & accendunt animos.*

45. Nunquam totum simul effunde, & proinde exarma rigorem, sed velut majorem in tempus dissimula (lentius corripiendo) quasi majus telum penes te restet, in terrorem exerendo, dum velis.

46. Delinquentem aliquem (cujus correctio ad te pertinet) non te puniturum ai, antequam puniendum manu teneas, immò propius nescientem sis, ne præmonitus caveat, contraria (per desperationem veniæ) munimenta quæsiturus, aut magnorum intercessionem provocando, quibus sine offensa recusare non possis, aut capitalis hostis (præ metu) evadat, ad hostem trans-
iturus.

47. Ea

47. Ea pollicere, quibus præstando sufficiat, nè postea difficile aut grave sit præstare, in maiorem offensam sperantis, potius non pollicere, sed fac, quod facturussis.

48. Prudentèr quidam, honorationem sui tacitè inculcavit, cum subornato quodam lixa, comptèque in eam scenam vestito, palàm deijci iussit pileum, decentiam morum, & superioris observantiam exprobrando. Item Marschalcus ille Regius, adornatum lixam, scipione pulsavit, quod Palatium Regis importunè ingressus fuisset, non vocatus, quo inculcavit verecundiam, importunis intrusoribus, & quæ possint fieri in eam formam.

49. Metuendorum nomen acquirere, utile aliquando, sed modo licito quærendum, per aliquam ostentationem virium & potentiae, ut potius vereantur homines tuam auctoritatem & potentiam, non timeant, nè in odium incurras.

50. Quæ populus affectat, tibi verò displicent, idem sentire te prius simula, & interdum lauda, post (facta quasi recollectione) deflece, sed sine rigore, nam qui directè multitudini se opponit, frangitur
aut

aut vincitur ipse, quam vincit; (vel ut subtiliter quidam, *Qui realis solummodo est, aut nihil præstat, sed irritat tantum, aut excessivâ virtute opus habet, tum potentiâ & auctoritate, quâ vincat omnem invidiam.*) In quo satius prudentes nautas imitari præstabit, qui adversis ventis, non directam opponunt proram, velut contra vim reluctaturi, nec adversam relinquunt puppem, velut fugientes & ex inertia cessuri, sed per latera inclinando navem, hac illic acve sinuando vela & cursum, eludunt tempestatem, & simul assequuntur portum, quem volunt, ac proinde illudunt vêtis; sic populi impetum, non aliter eludas, aut in rectum (prout in rem opus) reducas, quàm per molliora, nec tamen mollitè acturus, vel affectatè, (quod æquè periculosum) sed gravitèr.

51. Immò dicentibus modicè assentiaris, licet alitèr post hæc sensurus, lentè in tuam sententiam quemque pertrahendo.

52. Quæ in publicum necessaria, primo verò aspectu ingrata populo, proponere vis, cura per alium proponi, & affectum primùm populi in eum effundi; tum postea modesta cum ratione, sequere ipse idemq; **B** petes,

petes, sed sine affectu, quasi minus curaturus, etiamsi non fiant, naturale enim, ut magis negentur (velut magis æstimata) quæ maximè petuntur, quæ minùs curantur, ut vilia, facilis ex neglecto habeantur.

53. Illi plurimum potentiâ consilii valent, multaque præstant in suas partes, qui cum sint potentia & authoritate graves, per alios, non per se rem tentant & consulunt, velut nescii, & taciturni, sed ex insperato metuendi.

54. Cura ut humanus & civilis habearis.

55. Si quis beneficium vel operam aliquam à te petat, & si scias plerasque in codari difficultates, non objice illas, nè recusare opem videaris, & te parùm benevolum petenti præstes, potius in ipsius negotii cursu, eas difficultates, qui petit, deprehendat ipse, & suæ petitionis arguatur, offerentur enim cum tempore occasiones, quæ promissum infectum reddant, tu verò promptæ humanitatis titulū non amittes.

56. Prima constans cum Authoritate repulsa, adimit plerisque importunam in posterum audaciam.

57. Obtento morbo, multa per absentiam, aut parantur, aut vitantur,

58. Patrocinando alienis illatis, plura in publico consilio obtinentur, quàm per se rem directe tentando, licet aliquem multa ratio cum autoritate sequatur, quidquid idè optas fieri, alium authorem inferendæ rei ex composito substitues, tum alter amicorum, atque tu ipse patronum te pro autoritate præstabis, qui verò proprium allatum fortius urget, præsumptionis notantur, veluti consilii sui, quod ipsi adseunt, amatores, neglectores alieni, quod est trope invidiam. Jam verò secus, ut ab alio illata, tutius urgere poteris, liberitis suadendo. Bonos tamen autoritate viros, proponendæ rei quæres, ne contemptu authoris, bene licet illata, in contemptum trahantur, ut ne tu postea patrocinando, rem stabilire possis.

59. Quod alibi in observationibus bellicis dictum: *Viendum recenti terrore in hostes*, hic item per familiaritatem verbi dici potest, *recentem terrorem etiam apud suos met Civis multum posse*, ut à prætexu impositi recentis metus (si dextrè instando liciteque utaris) pecuniarum collationes, cum operas in corrigendis per vetustis munitionibus, bonas item leges, facilis mino-

reque invidia apud populum obtineas, quæ alias per altercationes, turbas, odia, immò vix quidem assequare, si absit metus.

60. Absentiâ tui, meliorem suscita & tueare amicitiam, immò & authoritatem, literas tamen non intermitte & nuntios, pollicere tui præsentiam, trahe interim & pone moras. Luna Solis amica, decus & lumen quod habet, illi debet, quò remotior tamen, plenius perfectiusque lucet, proximiùs admota, decrescit, vel si planè concurrant, Luna penitus amittat lucē, aut Sol necesse abeat in Eclipsim; Sic verè amicorum magnorumque virorum mutui congressus, aut crebrius negotiorum commercium, majore jactura amicitiae, tum authoritatis fiant, quàm ut novum aliquod argumentum in majus stabiliendæ paretur; Sæpè unus in altero non reperit in præsentia, quod sibi absens pollicebatur, unde verè dictum, *Minuit præsentia famam, sæpius, Absentia prodest*; Miraris? legi, vidi, probavi.

61. Modica munuscula offeres amico, non simul, sed rariùs ac potius minora priùs, dein majora, maxima nimis serò, ut diutius dando sufficias, partim ut semper restet,

stet, quod majus speret à te amicus, nec relinquat quàm suo damno. Usu probatum axioma. *Gratius esse hominis animo, ascendere in parvum, quam persistere in magno.*

62. Maximum rigorem priùs intende in speciem, temperaturus postea, ad famam clementiæ.

63. Experienciâ probatum, magis appeti eorum amicitiam, plusq; ab hominibus æstimari, qui neglectiùs eam servant, modò amant, modò offendunt, offendendo & amando non assidui (non tamen leves) modò potentiâ terrent, modò comitate trahunt. Neque causam reperio, quàm ab oppositorum ratione, quod magis elucescat, & sapidior reddatur amicitia, quasi tunc magis optanda, dum amittitur, aut secus evenit, ut eorum amicitia minus æstimeretur, qui de paranda aut retinenda studiosè & appetenrer nimis laborant, ut aliquando necessarium sit, nonnihil suboffendere, tum modicè negligere amicum, quò magis retinere vis (quàm ut perpetuò adhæreas) sed non diu aversa fronte & vultu, ne posthabearis.

64. Sæpè quod preces non possunt, minæ (aptè accommodatæ) operantur.

95. Non moliaris, nisi quæ præstare, potes, ne prodas impotentiam.

66. Si aliquid adversi tibi accidat, dic potius, sponte te accepisse, quàm ut supplantari nolens videaris, veluti invalidus, & obviæ impetitioni expositus, potius fortunam tibi obedire doce.

67. Alienanti se amico à te, aut clienti sine causa, sponte media offer reconciliandi, potius bonis quibusque modis, eum in amicitia retenturus (medius tamen inter gravitatem) quàm ut acerbicatem pro acerbitate reddas, quæ magis abstrahit, quàm retinet in amicitia amicum, nisi alias poter pervincas.

68. Minæ vigilantiam adversarii acunt, ad cavendum, immò præveniendum, tu sit aciturnus es; plura præstabis, non tamen ut noceas, verum ut caveas tibi, quod est penes virtutem.

69. Potius capiat per modica, aut sensim speret amicus, quàm ut totum simul habeat. Non enim obligant, quæ data licet maxima, sed quæ dabuntur, licet modica. Animus hominis, imitatur oculorum situm, quos cum anteriori parti corporis ingessit natura, non ea quæ post se sunt
sed,

sed quæ ante posita, vident; sic ille pensat, non accepta, sed accipienda.

70. Redditurus mutuum beneficium pro beneficio, moram adijce, nè dare videaris in recompensam dati, sed velut in obligationem futuri.

71. Exprobranti offensam amico, non seriò excusa, excusatio propè metum est, & loci inferioris signum; responde potius, neque illius esse exprobrare, neque tuum excusare.

72. Religiosos in pretio habe, quatenus tuarum partium sint, devincies verò illos beneficiis, & comitate.

73. Immò Concionatores ad te trahe, qui bona narrent, & populo (quodvis utile in publicum) persuadent, aut quod non vis, sermone (sed extra invidiam & ullius offensam) publicè diluant.

74. Opinio divitiarum & nummositatis, parit æstimationem, teges igitur tuos defectus, & arte aliqua honesta (sed procul ab ostentatione) omnibus impones, ut bene de te credatur.

75. Propositurus aliquid difficile populo, causas honestas propositionis, per privatos rumores prius disseminabis.

76. Quantum in amicos dono daturus destinasti, præstat cum iis aliquando honestè comessando consumere, cui diutius sufficies, quod verò diutius durat, magis in oculos incurrit & obligat, adde, quia unica comessatio, potest plures simul obligare, unicum donum, hominem unicum obligat, immò aliorum (accipere præsumendum) invidiam provocat.

77. Mirum dictu, quantum lautior mensa, & liberalior convictus, paret amicorum, cum per artes policias, inter concives crescendi, studium cui adest, ut velut in alias virtutes incuriosi, hanc præcipuè viri Politici, in quovis venerentur & ament, aut sine illius condimento, cæteras obiter transeant, immò vitia nonnulla, hoc oblecta fucō, *dum mollius accipiuntur*, spontè dissimulent. Sic igitur intra magnanimitatem erogare, lucrum facere est, immò nonnunquam conducibilius, ultrà parsimoniæ terminos in eo procedere, ad usq; confinia effusionis, modò nè sit factum, in intra affectatam prodigalitatem, cum decoctione bonorum extrema, velut multos apud nos vidimus, sic crevisse, floruisse, & intra Civium favores præstitisse multa, ut
opi-

opimam amicorum & fortunæ, colligerent messem, cum haud parcè Civium animis, seminarent sua. Certissimum enim magnitudinis signum est, maximèque incurrit in oculos vulgi, tum in affectus, velle & posse pascere multos, eoque multis bene velle. Nec mirum, si CHRISTUM, vulgi sequens turba, in Regem creandum rapere voluit, *Joannis 6. cap.*) cum tot hominum millia, ex suo divino penu, non pavisset modò promptè ad saturitatem, sed fragmentorum copia, magnitudinem convivii, & Domini pascentis divitias loqueretur. Sed intra dicti reverentiam sacramaneant, profana liberius nobis loqui licet. Non ab alia occasione, primitivi Poloni, Piastrum olim, è plebeja domo, ad purpuram evocaverant, quàm cum divinum quiddam illa ætas inesse viro crederet, cui pro modico agello quem colebat, ad stuporem usque Commiorum (neque enim sine speciali miraculo, teste Historiâ factum) tantum alimentorum, ad usque superfluitatem, humaniter excipiendis advenis sufficeret, ut plus erogandò, plus semper illi restaret, & simul, magnitudinem cultioris animi, in eo viro cum metirentur, qui sic esse

esse cuperet cunctis amicus & hospitalis.

78. Astutis, arte simili aliorum astus eludere, mos est, ideoque secum in amicitia facile conveniunt, dum retaliare sciunt, rectiores nesciunt, nisi plerumque deserendo convictum, & rem cum illis planè vitando, donec in meliores amicos incurrant; Vulpi cum vulpe, urso uni cum altero, aspidi cum aspidè, haud mirum si conveniat, Cervis Equisvè, nisi cum mitioribus, aut sibi similibus vivere securum est.

79. Dùm sunt nonnulli fucatæ faciei liberalioris convictus, *praesertim si habeant aliquas species virtutibus similes*, ipsi subdoli, & modis illecebrarum potentes (vel quorum vultus est opportunè mendax, tum in speciem probitatis sermo & facili, haud spernendus capiendis hominibus hamus) facile eo condimento trahunt plerosq; in sui laudem, tùm in amicitiam. Non tamen altioris mentis homines, verùm illos ex simplicioribus, qui velut minores aves, facili capiuntur visco; Recti vero & prudentes viri, non illa exteriora morum, & fallaciarum inania, sed intimum introspiciunt pectus; & nisi solidiorem virtu-

tem, iūm amicitiam pensant; Quanquam convictus liberalioris amœnitas, si penes rectam virtutem & prudentiam, alicui pectori insedit, miros affectus, parandis amoribus hominum facit, totumque in animos potest.

80. Videntur esse nonnulli amicabiles, recti, prudentes, dextrique agendo, & planè cum virtute, magis quàm sunt, immò nonnulli non videntur esse, cū verè sint, nisi tempus & occasio aperit virum, ut prima judicia de hominibus sæpè nos fallant, velut de ingenio nationum subtiliter quidam: *Hispanos factis & moribus magis videri intolerabiles, quàm verè sunt. Gallos magis esse fortè, quàm videntur.* Sed inest causa, circa horum amœnitatem, illorumque tristitiam (vel gravitatem actionis & morum) prout huius aut illius, sumus æqui pensatores. Nisi igitur falli vis, sustine suadeam calculum, seu damnaturus, seu probaturus, & à tempore tū actione, iudicium expecta. *NERO flagitiis & sceleribus velamenta quaesivit. GALBA major privato visus, dū privatus fuit, & omnium consensu capax imperii, nisi imperasset.* (Tacitus sparsim :) *VESPASIANUS, solus omnium*

ante se Principum , in melius mutatus est :
 OTHO , Contra spem omnium , non deliciis
 neq; desidia torpescere, dilata voluptates, dissi-
 mulata luxuria, & cuncta ad decorem imperii
 composita, eoque plus formidinis afferebant fal-
 se virtutes, & vitia reditura : Mucianus,
 Luxuria , industria , comitate , arrogantia,
 malis bonisque artibus mixtus, nimia volu-
 ptales, cum vacaret ; quoties expedierat, ma-
 gna virtutes ; palam laudares, secreta male
 audiebant, apud proximos, apud collegas, va-
 riis illecebris potens. In Vitellio Multa grata
 sanè & popularia , si à virtutibus proficisce-
 rentur ; & argutè idem de Pompejo : Pom-
 pejus occultior, non melior. Hæc alii, sed ad-
 dam ex meo, & ab experienciâ. Plerique
 sunt boni, donec qui corrumpat, non adest,
 immò inest semper aliquibus male facien-
 di animus, sed deest occasio ; boni sunt,
 dum malos esse non licet, aut præpediun-
 tur. Rectè Sallustius de quodam, Ore probo,
 animo inverecundo. Et Vellejus. M. Le-
 pidus, formâ, quàm mente, melior.

81. Mirari debui dictum (verùm satis-
 factum mihi ab experientia) quod argutia
 Italica nuper proverbio circumtulit, requi-
 ri ad gradum prosperioris fortuna, ut insit ali-

cui

cui nonnihil ex *Fatuo* & *Intruso*; Nam hoc modo, citò involatur in notitiam, & confidentiam intimiorem *Aula*, tùm *Vulgi*. Non promerentur hi quidem virtute, sed arte suffurantur gratiam, ad modum naturamque omniũ & seculi, facilius se componentes; In impertinentia se ingerunt non vocati, ludicra, seria, pari importunitate tentant, & quandoque succedit, ut pro tempore non displiceant, non offendunt alios, nec etiam (à certioribus) ipsi offenduntur, Verum intra jocum & amicitiae libertatem, facile habent, & condonant totum, alloquio faciles, respondendo (per mixturam levium mendaciorum) amœni, promptè indomesticantur, non multo apparatu recipiuntur, neque sunt *Morosi Magistri in ceremoniis*, & *formulis*, haud quæsitum sui cultum requirerentes, dumque non facile succensent personis & rebus (obviis parabilibusq; per omnia contenti) censura eorum non timetur, ex imposita confidentia, & ex eo amantur. * Adde, si forte super hæc, sint *audaculi*, multum honoris & præmiorum sibi arrogant, & obtinent per importu-

C

portu-

* Genus duplex intrusorum; *Servile*, vel *Audaculorum*; prioris generis sunt alii, hi sibi utique meliores.

portunitatem (dum facile obloquia subdolis succedunt ex impudentia) & occasionibus *instanter* non desunt *intrusi*. Directa verò virtus agit totum cum modestia, intra verecundiam, & dum importuna cavet, opportuna quandoque intermittit, sed hoc non ex virtute vitium, verum seculi, & eorum est, inter quos vivitur, dum rectam non promptè noscunt, nec acceptant. Tamen illa solidior est agendo, tandemq; post tempus cognita, plus æstimatur, illi priores, sæpius (uti leviusculi) ludibrio habentur, & in seriis minus ponderis habent, mensarum nisi sodales, ludicrorum alumni, non nostri, sed fortunæ tantum amici, pro ut certè cum hac mutantur, nosque decipiunt, ad manus nostras, non ad nos respicientes, facile ad alios transitori, unde plus utilitatis speratur.

82. Aliud est esse *innocentem*, aliud *habere praxin evadendi*. Aliud est *scire imponere*, aliud *iustam habere causam*. Aliud est, esse *fortem, prudentem, vel bonum*, aliud *videri*.

83. Divinæ potestatis & prudentiæ (non hominis) opus, æquilibrium ferum tenere, causas combinare adversas, tum ex contrariis elicere bonum. Frustra ingenium
homi-

hominis laboret, aut perspicacia contendant, ad certam regulam se componere, & publici status, vel privatæ actionis, ea in parte formare sibi *maximas*, nisi confundi velit, seipsam (serius citiusvè) periculo involutura; immò illud est, meticulosa tam versuti, quàm perspicacis animi signum. Exinde verè dictum. *Media via nec amicos parat, nec inimicos tollit.* Qui oppositarum partium, hujus illiusque simul amicitiam quærit, aut utriusque simul offensas (*per obliqua*) vitat, poterit aliquanto tempore scenæ servire, detectâ deindè larvâ, ut fallax hypocrita, & versipellis deceptor, ab utroque odio habebitur. Sic intuitu emergentis boni, qui oppositas sibi (personarum aut populorum) potentias, dein amicitias, tum offensas, æqua lance conservare studet, nè inter se committantur, iùm, r è una noceat alteri, aut secus, ne sit infra alterum, ad æquilibrium moderamenque causarum, nequaquam sufficiet diu, quin altera invalescat, partem oppositam, & simul fautorem consilii, oppressura. Sic, vereri aliquem, suboffendere, non tamen quas sunt parandæ amicitiaë penitus facere, sed potius per obliqua tacitò irritare; Aut se-

cus, tentare in rem suam, assequi, quod est alterius partis dispendio & offensæ, simulque se amicum profiteri velle, odium verius conciliat, quàm intentum parat, nisi aut rem habendam planè, aut (fortius pro æquitate urgendo) gratiam partis posthabeas, aliàs neutrum assequaris, *Sic*, Diffidere alicui, & simul [intuitu speciosæ cujusdam amicitiae, tum securitatis] non sibi satis cavendo providere, immò amicitiae titulum affectatè quærere; ac deinceps dissimulantes agere, nec amicitiam habeas, nec res tuas statuas in securo. *Sic*, publico bono tuendo, & simul privatis commodis aucupandis adlaboraturus, alterum non obtineas planè, publicum verò bonum, certò certius subvertas. *Sic*, Veritati [tum virtuti] aut auræ populari; Legi [tum justitiæ] aut populo; Principi aut vulgo; Debitæ actioni, aut [parte ex altera] parandæ opinioni; nequaquam sufficias, nisi totus, in alteram [tamen æquiorē partem] agendo incumbas, sequiorem studiosè oppugnaturus, aut si res suaferit [rebus modicis, aliā ratione diligentissimè ut provisum sit] posthabiturus saltem; vulgo dum places, rem agendam pessumdas, dum secus ad rem probe

probè agendam te componis, vulgi censuram mereberis, unde vetus [præsertim in bellicis] monitum tulit. *Malo te sapiens hostis metuat, quàm stulti cives laudent. Sic;* [nisi aliàs tantâ potentiâ vales, ut parte utrâque posthabitâ, negativè te erga utrasque habere possis, per quæta media securus tibi] neutralitas fœderum non proderit, verum alteri parti *deliberatissimè* adhærendum. *Sic;* Artibus status totum se dare, & conscientiæ legem non transgredi, DEO placere, & simul ad illecebras mundi se velle componere, nec hujus, nec illius legis, æquus assertor futurus, scripturæ potius censuram mereare: *Neque frigidus, neque calidus es, incipiam te evomere ex ore meo.* Non quod præstet, aut merè bonum, aut debere esse merè malum [velut obliquæ Politicæ Doct̃or Machiavellus docet] verum quòd gravior malitia ab affectata intra virtutem & nequitiam neutralitate, tum mistis. [boni simul aut mali] actibus oriatur, immò affectatior [sub pallio virtutis] nequitia subsit, & aliorum vexatio, quàm si utique, simpliciter malus sis; Ut per omnia, rectoris prudentiæ sit, & conscientiæ, ab utrisque partibus versandis, se

totum separare, aut in unicam, æquiore
tamen, se totum transferre, & agendo in-
stándovè [ex norma virtutis tum pruden-
tiæ] fortiter incumbere, res verò suas [in-
terim] consilio & prudentia stabilire, in
quieto. Qui aliàs partium rerumque op-
positarum simul fautor, commoda utrin-
que venatur, rerum prævaricator potius, &
interversor pacis, immò *Sophisto- Politicus*,
quàm *Catholico- Politicus* vocandus, se-
ipsum astu involuturus, quo exercere stu-
duit alios; velut multa ejus rei exempla
apud Historicos habeas.

84. Debitum officii, præsertim verò
honoris, erga pares, adeoque magis erga
superiores, studiosè adimplebis, nec trans-
mittes neglectim: Etsi enim aliquando
præstari sibi nolint [velut incuriam si-
mulantes] aut verecundè palam recusent,
non fit, ut planè habere non optent; im-
mò sic potius, promptitudinem tacito ex-
periuntur, in offensam aliàs tracturi, ni ob-
tineant; Aut si exsequaris [modò non fiat
affectatè, sed pro honoris debito] tantò
obligatiores, in posterum habebis, Cape;
Exequere, Non improbata dico.

85. In adversis, ne sis nimium mollis
verbo

verbo, aut animo dejectus ; Nec secus [in speciem generositatis, & infracti animi] jocabundus neglector, transitoriè despicieus, quæ famæ, tum securitati parandæ serviunt, aut momentis invalescunt, uti enim hoc levitatis aut supinæ incuriæ, tum parvi judicii, sic illud pusillanimitatis, abjectæ mentis, aut ignaviæ, signum est, immò, propositi in probrum animi, certum indicium ; Potiùs ages totum, intra perspicaciam, cautus, prudens & graviter : Qui considerat, providet ; qui negligit, sæpius rem perdit ; nihil agenti, neutiquam, *assa* [ut ajunt] *columba* venit.

86. Senum actio, aut juvenum conatus longè differunt ; Juvenes garriunt aut clamitant, senes agunt ; Sonum illi, pondus hi, rerum captant. Junioribus pro calore ætatis, properantia placet, & audax magnanimumque videtur, quod sæpè temerarium, prævidentia senioribus & cautio maturior inest : undè sæpius sunt cunctatores, rarius periclitantur, aut eventu falluntur, in occasiones modo extacito intenti, velut somnum & inertiam simulant. Juvenes iracundi, in offensas properi ; viri maturiores dissimulativi, ac sæpius

pacati, aut si tandem actio requiratur, intra prudentiam, & cum curâ fortes. Illi res mirantur, multa vident, aliqua sciunt, nec tamen probè discernunt, hi facta aut facienda æquè penetrant, noscunt & dignoscunt. Juvenes pro ingenuitate primæ ætatis, dolum rebus subesse minimè suspicantur, unde facile deceptionibus expositi pro nimia securitate, maturiores viri, quia plura per adversa sæpius decepti, eventuum gnari, pigmenta rerum & rationum spernunt, superficialia omittunt, verùm larvâ detectâ, introrsus res ipsa quæ fundamenta inspiciunt & scrutantur, peritos venatores imitantes, vulpesné? aut lepus? tum ferox aper, vel certè nobilior cervus impresferit gressum, per ipsa vestigia species ferarum noscitando, instant igitur, procul res & occasio suadet, aut secus, passibus suspensis in res vadunt, *Non temerè adversa casum reputat, quem fortuna nonnunquam decepit*, ait quidam, sed rectiùs alter: *Mihi fortuna multis rebus ereptis, usum dedit bene suadendi.* Juvenes deinde suaviloquio plerumque laborant, & talia libenter audiunt, in cætera incurii discursibus per inania rerum vagantur, quæstiunculis lasciviunt & lu-

& ludunt, nam sæpiùs ex imperfecta scientia, de rebus dubitant, proinde vexant res magis quàm agunt, incipiunt, dein deserrunt; senes perseverant constanter, dum à fine res capiunt, nec ideò tentant frustra, minimè ex voto finienda, sed deliberatè aggrediuntur; quia verò non hærent in mediis [verum scopum rerum petunt expediti] super objecta brevilogio decernentes, hinc juvenes succensere amant senioribus, velut rudi minerva negotium agentibus, dum pro suo ingeniolo, & pro curiositate eos metiuntur, pigmentis ipsi rerum & verborum assuefacti; Inest tamen senibus consummatio peritia; licet tentent aliquando simplicia & proximiora in medelam, sed quia præstare magis credunt, quàm longè quæsitâ. Adde brevibus, tuta, aut secus periculosa, ante tempus seniores prævident, & ex vero indignant, si præsertim ipsi pro paranda peritia non otiosam, verùm per negotia exercitam ducunt vitam, graviumque Historicorum lectioni dum immorantur, quæ suppleant ætatem. Juvenes super hæc reguntur affectibus, ac præsertim respectibus primo crescentis fortunæ ducuntur,

senes potentius suis affectibus & appetitui dominantur, ideoque commodè alios regunt. Dicam verbo, juvenum actionem esse amœnam, & quodam cum condimento vernalibus diebus similem, maturi viri, laboriosæ [sed cū fructu] æstati assimulantur, magis enim serium, gravem [ac proinde tristiores] modum actionis habent, seniores sunt, verum in virtute constantiores, juvenes agendo molles, & sæpius leves. Hinc viris maturioribus expeditius res succedunt, dum non tenentur à negotiis, nec hærent, sed tenent illa, & regunt ipsi pro arbitrio. Velut peritos Automata-rios [horologiorum id est fabros] si videas, non satis mireris, crassâ & fuliginosâ manu, nec certe delicatiore palpatu, subtilissimas horologiorum rotulas, audacter eos versare, per minutas partes distrahere, dein velut nullâ artificii curâ & attentione, promptâ manu in pristinam formam redigere, quæ omnia ignarus artis delicatissimo licet contactu, disturbet verius, quàm ut rectè expedit, aut si fortè aliquis, crebro intuitu, & arte se percepisse aliquid putat, ut etiam laborantem arguere non dubitet, dum tamen rem tetigerit ipse, nec

prima,

prima, nec media scit, multoque minus postrema, promptius est alienare darguere [vel sugillare potius] quàm sua probè facere. Juvenum consilia modusque agendi, vinis recentibus similes, quæ plus dulcoris, plus etiam sæcis habent palatui grata, stomacho & sanitati nociva, aut licet quoquo modo clarescant, minus tamen ex virtute habent, quam per annos defæcata; quod sequens dies, juniorem erudiat, viri maturiores hodiè jam sciunt. Ideoque commodè rem claudio, recta cujusdam [in juvenem protervè loquaculum rebusque obstrepentem] indignatione: Post annum, fore si te prudentiorem putas, cur? non me itidem cautiorem credis, qui tot annis multisque casibus te supero. Cùm omnia honestarum artium juvenes habuerint, rerum experientiam [prout eveniunt] nondum habent, eoque senibus inferiores sunt, affectata ludicravè illis placent, maturis res tantùm, & seria.

[O]

Pars Secunda

POLITICO-MORALIUM.

1.

EXprobraturus aliquid publicè privàtimvè, amico aut populo, potius terreas & trahas exprobrationem, ut intereà obtineas, quod vis; dissimulata enim ti-
mentur, evulgata ut jam transacta, con-
temnuntur.

2. Retenturus alicujus amicitiam, non statim dum injuriam accipis, exprobrabis illam, nè levi occasione alienes amicum. Omnino tibi diffidet ille, qui te offensum videbit, ut necessariò averti debeat metu, vel conscientia facti, vel consilio, dum te facilem videt in offensam.

3. Beneficium, aut officium, aut pensiones, & si plures in annos alicui prorogare in animo habeas, assignabis tantum annuas, ut si necessitas suaserit, sine offensâ auferre possis, dum velis, partim si prorogaveris, velut iterato beneficio, accipientem devincias prorogatione.

4. Ignei homines ingenii, tum leviculos, licet per alia tibi opportunos, cave, nè tibi adhaerere velis, seu sint amici, seu clien-
tes,

tes, immo dum advertis, festinanter honesto prætextu eos procul amovebis; Nisi enim maturè feceris, amoveri postea non poterunt, nisi magno tui fastidio, ut sæpius difficili negotio implicari debeas, amovendo, rem ipsam in meis casibus expertus, scribo.

5. Etiam illa ingenia clientum, multi periculi, & officiunt nobis, quæ sunt propè importunitatē, audaculè sese intrudendo, suadendo, petendo, accusando, hos aut illos laudando, curiosè abdita rimando, tum rebus imponendo, præsertim dum sciunt, & amant per dicacitatem, ingerere suavia, cum verò suaviter loquuntur, & speciosis quæstiunculis, sensim tentant; facile nobis [sine sensu] nolentibus imponunt, quorum mox nos poeniteat, ut non aliter eam pestem loquendi, aut hominum vites, quam non audiendo, aut te planè avertendo, vel quod præstat, procul relegando loquacem. Non aliàs magis CHRISTUS indignè tulit, Petrum corripiendo, quàm dum in importuna [per speciem confidentiæ] curiosè se ingereret: *Hic autem quid?* Tulit enim promptè responsum indignationis, & correctionem. *Quid ad te? tu me sequere, si eum volo manere, quid ad te?* &c.

6. Cum

6. Cùm unus aut plures studium aliqua in re obligant, aut amicitiam offerunt, vel aliquid præstare faciles, quod in rem sit, utere *recenti* promittentis affectu, urge intentum, non differendo in tempus, frustra ne ea in parte dilationis [seu, ut vulgus ait, *discretionis*] nomen, certò certius per momenta tepescere hominum affectus, & remitti potius, quàm intendi, ut sæpè [vicio mobilitatis humanæ] alii in horas simus, posthac difficilior optatum habituri, quod antè spontè oblatum vidimus. Ast promittit ille [inquires] propensum se fore in tuas partes? falleris; præsentis en vis est affectus; non futuri, qui bono casu [ut brevi abiturus] oblatus, qualis verò ille futurus postea, ipse qui obligat, ignorat; mutato verò affectu, mutabitur intentum, frustraberis igitur, quod obtinere sperasti, nisi extra dilationes assequi rem coneris. Nonnullis immò, benè & amica loqui, sæpiùs consuetudo, aut potius modus loquendi est, non modus affectus, & quò effusiores sunt suaviloquio, eo magis in amicitia fallunt, cautus ideo sis, pēsandis veris amicis, & ab opere potius, non à verbo ponderabis, eò citius prætervolaturis, quò promptius extra delibera-

berationem efferuntur, quasi nullas radices ab intimo amico & affectu petant duratura, verùm in superficie modo linguæ, cum saliva abitura & nata.

7. Non amici solùm affectus, sed contrarii, in recenti maximam vim habent, falluntur exindè, qui spreta prima reconciliatione, submissiorem sperant alteram, quæ potius tantò minor futura, quò magis procrastinabitur, ut enim omnes res, recenti sensu, gravius intenduntur; sic qui intulit injuriam, novitate delicti, vel à conscientia recentis facti, propius poenitentem est, quàm si evulgato pudore, & consumptâ ignominia, depudere didicerit, cum ipsum vulgus [per familiaritatem rumoris] primò rem minus mirari, dein ac erbius loqui, postremò dedignari factum desinit. Sæpè idè poenituit multos, non admisisse primam reconciliationem, ut nullam postea haberent, cum maximam sperarent, præoccupabis verò prudenter, modesta facilitate, neque rejicies poenitentem, similior tamen renuenti, ne pecces facilitate.

8. Rarius utaris eodem curru, strato, cubiculo, mensa, domo, exercitio. *Nimia fami-*

familiaritas parit contemptum. Continuus aspectus minus verendos homines assidua satietate facit.

9. Res adhuc in quæstione, *Verum amari præstat, an metui.* Dicant quod volunt alii, mea sententia, uti DEUM, sic hominem non rectè amet, nisi metuat simul, aut saltem nisi revereatur. Non igitur serviliter te demittes & effundes in officia amici, neque nimius eris affectator, aucupandis amoribus alicujus, quod penes contemptum est, sed ages graviter, partim ut quæras amicitiam, partim ut tua quærat, honorabis, sed ut honoreris, immò aliquando [idque intra gravitatem & extra affectum] amicum modicè negliges, timeat negligi, si ipse te negligat, & non amari, nec honorari, nisi ipse studiosè te amet & honoret. Qui te igitur non reveretur, nec recto, nec durabili amat amore, dum facit magis pro discretionem & voluntatem suam, quàm pro merito tuo. Addo [pressius loquendo] quod amari est in aliena potestate [prout nostri actus cum bona gratia & affectu ab aliis acceptantur], ut verò metuamur, esse in potestate nostra, ut nō semper, quando volumus, amemur, semper verò metuamur, dum volumus, præsertim si in-

curratur in homines, ut cum ad normam virtutis, legisque præscriptum, omnia fecerimus, aut rem non intelligunt, aut pro malignitate secus interpretantur, cum in tanta depravati seculi malitia, clementiam rectoris, delinquentium insolentia superat, ut necessaria correctione in aliquos opus sit, tunc Justitiam, sævitiam vocabunt, nosque [pro sua malitia non merito nostro] oderint, cum ne Divina quidem, licet proba semper & optima, malitiosi hominum probent, aliquando plueret, grandinare, æstuarere, non ad suum beneplacitum, sed ex arbitrio cœli factum, illubenter ferunt, cum illud in terræ fecunditatem pro gratia, aliud in poenam, pro justitia, inmittat DEUS, nec unquam argui possit. Ac proinde præstat inhærere causæ, quæ à nobis dependet, quàm quæ ab alterius venit discretionem: Non tamen metus absque amore securus, immò obsit omnino, nisi metus ille valeat, qui ab æstimatione nostri provenit, spontè in animis hominum, per actus honestos & graves, adhibiti prudentia & comitate, non verò [ut nonnulli falsò arbitrantur] à potentia nocendi. Dicam ampliùs, metus nisi erga superiores

res est [quos aliquacunque re prævalere nobis arbitramur] amor non potest esse, nisi erga inferiores, aut saltem erga pares. Si verò superiores à nobis amentur, potius *Cultum* aut *Reverentiam* dicas, quàm absolutè *Amorem*. Quod verò aliquorum belli Ducum virorumq; egregiorum, excessiva severitas Manlii, Corbulonis olim, & inter recentiores Ducis Albani, Comitis Fuentii, aliorumque inter recti exempla sit, impossibile, si hæc sola trux austeraq; sine aliarum humaniorum virtutum condimento inesset, tantum authoritatis in suos, paratum fuisse, ut necesse, penes excessivam severitatem, excellentes quoque virtutes, pro contestatione magnitudinis exercuerint, *Sæpe latet vitium proximitatè boni*, immò altioris virtutis interventu pensatur, Erant in multos severi, sed in bonè meritos liberales, labori castrorum imperando immoderati, sed nec sibi ipsis parcētes, fortes simul & successu, in admirationem felices, jussorum exactores austeri, verùm erga promptos & obediētes grati, & pro comitate imperatoria nimium accepti, deindè erga afflictos, egenos, injuriatos, victosq; prompti, liberales, justī, minimè avari, magnanimi,

mi, moderati, licet aliàs contra tumidos & insolentes insurgendo graves, demum nec bellando flagitiosi, nec vincendo insolentes. Si verò illi non aliud scivissent, quàm flagra, secures, cruces, funera loqui, nec apud suos ex autoritate obedientiam, amorēq; nec in externos admirationem factorum, virtutisquæ suæ paravissent, sed velut feræ sylvestres, nisi nocere scientes, terrori fuissent & odio. Aliqui præterea pro indulgentia naturæ, ita sunt formati, ut non in animo tantum, quiddam magnum illis, impresserit, sed per exteriora quoq; occultam gravitatem in facie, aspectu, alloquio, corporisq; formâ diffudit, quæ sola primo intuitu æstimationem pariant, & velut præcursores sint in animos hominum, & in affectus, parandis amoribus, ac præsertim conciliandæ autoritati, antequam altior virtus se exerat & innotescat, prout de Corbulone observatum tulit Historicus. *Corbulo omnium ora in se verterat, corpore ingens, verbis magnificus, & super experientiam sapientiamque, etiam specie inanum validus.*

10. Interdum parùm in negligè compellendo dicto, scriptovè, timeat amicus aliquando negligi, & posse offendi, sed statim fami-

liari-

liariter recipe, nè diutiùs neglectus assuescat sine te, ut verò aurum puriùs postignē, sic motu melior sit amicitia; vina etiam meliora, quæ penes dulcorem, sunt modicè acria.

11. Dum frustra niteris impedire æmulum, malis cum juvari, & operam ultrò offerre, ut potiùs opinionem amicitiae obtineas, quàm ut frustra impedisse illudaris, quo impotentia tua prodatur.

12. Cùm alicui potenti æmulo resistere non potes, potiùs quæres amicitiam [procul tamen à suspitione quærentis] cuius sub titulo, faciliùs rebus obviam ibis, & illi resistes. Quoadusque enim inimicus est, contravenire aperte studet, dum verò speciem amici induet, lædendæ amicitiae verecundiâ tenebitur, nè tuis intentis contrarius sit, tu verò interim, quod in rem habere voluisti, sensim aliud agendo perficias, semota omni fraude amicitiae & dolo.

13. Omnia capere valenti, totum dare, qui parùm negat; potiùs spontè offer, quæ extra offensâ negare non potes, ut quoquo modo gratiae tuæ debeantur, quàm ut invitatus dare necesse habeas, nullo expensu in rem tuam commodo.

14. Distrin-

14. Distrahe potentes à latere æmuli, immò ejus intimos, domesticos, familiares, consanguineos, parando tibi munificentiam, mensam, comitatem, unde tibi omnia æmuli nota.

15. Da bona verba, palam, & in absentia.

16. Nescientiam simulare, quò magis omnia scis.

17. Vide, non videndo, omnia.

18. Non asperneris convictum æmuli, sed tamen rarius congregere.

19. Minora quandoque consilia communicabis.

20. Nunquam verbo carpe præsentem, immò tuere famam, si opprimatur.

21. Etiam offensus, offensam dissimula, & velut non agnosce. *Unicum remedium injuriarum, si non intelligantur, qui secus interpretando injuriam extendit, velut scalpendo suum ulcus, per impatientiam, sponte dolorem auget.*

22. Nunquam exprobra suspectam amicitiam.

23. Rarius congregere cum æmulis, aut congressurus, cum omni apparatu gravitatem indue, & cetera clientum.

24. Vita

24. Vita consanguineos & clientes æmuli, etiamsi fidam operam polliceantur, fac tamen, quasi non vitando.

25. Patiaris adversarium, non agnosce, & velut loco amici habe, omnibus benevolentia signis præoccupando, & insidias muneribus antevertendo.

26. Maximum præsidium rerum humanarum, ex dissimulatione, Tiberius inter omnes suas virtutes *Dissimulationem* admauerat, tu etiam quoad potes, stude dissimulationi, si sapias. *Qui nescit dissimulare, nescit regnare.* Ludovici XI. Regis Gallia dictum ad filium Carolum VIII. testamenti loco. *Dissimula igitur Dissimula.*

27. Temerariè ambitiosus, turbandis, *stultus pertinax* perdendis rebus accommodatissimus, fuge quoad potes talium consilia, multoque magis convictum, ne impingas in errores.

28. Peccant, qui nimia lenitate dulces, cum enim effusè dant se populari auræ, aut omnem infimæ plebis rumorem affectant, contemnuntur, virtuosi quidem hi sunt naturâ, sed etiam molles, ideoq; ad res gerendas parum valent. Prudens rigor rebus non obstat. Mordent sanguisugæ, dum profunt. Nec chim aliqua difficilliora & bringas, nisi

pro tempore, aliquod inconueniens, in urgendum adhibeatur. Idem consilii medicis inest, ut in morbis malignis & urgentibus, admisceant potionibus, de venenatis pharmacis, commovendis promptius pellendis-que noxiis humoribus, verum adhibent simul diligentissimè excellens correctivum, exquisitam dosim, perfectissimum temperamentum, sine qua cura, medendo plus noceant. Instabis igitur opportunè, urgentiore verbo, dextra ostentatione potentiae, minaciore vultu, intra tamen auctoritatem; mox ubi terrueris modicè, rursus in molliora deflectendo, amœniore fronte, faciliore alloquio, tum obvio convictu, irritamenta amicitiae ostentabis.

29. In malis mœstitiam, in bonis dissimula effusam lætitiā.

30. Quemq; diem examina, an amicum paraveris, [aut amiseris] & cura ut pares.

31. Summa auctoritas nisi penes potentiam & fortunas, in minoribus pro superbia habetur *Cavebis igitur morosam gravitatē.*

32. Talem apparatus mensae, vestium & reliqui sumptus instrue, qualem semper habere potes, & à minori potius incipienda omnia suaserim, quæ posthac factururus es
majo-

majora , nè eò majorem incurras in contemptum , quò magis laudatus fuisti , si idem esse, quasi lassus desinas.

33. Non demissè servias majori, sed reverenter, & sedulus sis, penes potiùs, quàm perpetuus ; Magnòrum aliqui, recepta amicorum obsequia, non ad gratiam urbanitatemque colentis, sed ad debitum, superbiamque suam referunt, & statim acceptorum obliviscuntur.

34. Eos etiam in amicitiam pertrahe , qui plus apud alios possunt.

35. Non prompti sint tui aditus, non obvia comitas, ea tamen moderatione rerum, nè superbiæ titulum tibi parias.

36. Facilitas amittit auctoritatem.

37. Oblatum munus potiùs lubens & animosè accipe, quàm serviliter gratus. partim debere te , partim deberi tibi gratiam doce.

38. Jube punire, non spectà.

39. Non increpa, sed gravitèr admone, & torvo aspice oculo. Absit verò facias contumeliosè, nam exacerbas magis, quàm corrigis, certè medicus, asperitate curandi, horrorem medicinæ ægro imponit magis, quàm inducit sanitatem , ut ægrotare , le-

levius nonnunquam accipiat, quam per acerba sanari, nemo sanavit vulnus scalpendo, verum ungendo, & molliter obtegendo.

40. Severitas amittit assiduitate auctoritatem.

41. Sine strepitu aut acclamatione [seu exprobratione] puni delinquentem, sæpè verò lenius & modestè, quasi invitus facere videre, est prostrasse satis, posse prosternere dum velis.

42. Majorem aliquando poenæ apparatus, verborum severitas, tum exaggeratio, imponit austeritatem Domino, & infamat punientem, quàm ipsa poena. Si igitur pro merito delicti punias, mollitèr saltem loquaris, flagitium, non personam osurus.

43. Potius quandoque dicto contrarius sis, quàm semper serviliter assentiaris, doce aliquid tibi displicere, pro libertate sentiendi, quod est propè generositatem. Sed plerumque ab hominibus [à Principibus verò præsertim] ii pro sapientioribus, immò pro melioribus habentur, qui ad eorum sensum & voluntatem magis accedunt ac loquuntur, decipi malunt, quàm non ad gustum suaderi.

44. *Bonum habetur ex integra causa, malum ex singulis defectibus*, ait quidam. Quasi dictum velit, ad rem bene habendam, omnia impedimenta amoveri debere, minus defectus si obstat exsequendo, et si reliqua bona media videantur, res tamen haberi non poterit & intentum.

45. Sæpius cum titulo, quàm sine, alloquere, quemque pro merito decenter honoraturus, nec tamen affectatè, ut similiter te compellendi & honorandi insinues necessitatem, aut secùs [velut importuna ceremoniarum] si negligas, alias idem erga te omittere, teque contemptum haberi possides. Quæ civilitas mutui honoris, adeò in animis hominum valet, ut non privatis modò inter se civibus, sed magnis Principibus erga sibi subiectos, non sit per incuriam transmittenda, nihil enim magis offendit animos, aut veriùs exacerbat, quàm contemptus personarum, si pro merito non honorentur, velut ille ad Principem, *Cur, [inquit,] ego te habeam ut Principem, cum tu me non habeas ut Senatorem.* Neque Iulium Cæsarem aliud præcipitavit in necem, accelerando conjurationem [quæ diffundi aut sopiri poterat] quàm Senatorum

Consulumq; contemptus, quod reliquum
 offensus erat. *Accedentibus* [ait Plutar-
 chus in vita Jul. Cæs.] *ad Cæsarem seden-*
tem pro nostris Consulibus, Prætoribus, totoque
Senatu, Cæsar non assurrexit, tanquam si
cum privatis hominibus colloqueretur, quod
non Senatum modo, sed populum offendit, Ci-
vitatemq; ideò rati [per ignominiam Senatus]
ludibrio haberi. Magna igitur cum tristitia
discesserunt è curia, quotquot discedendi fa-
ciatatem habuere, adeoq; Cæsar sensit indigna-
tionem eam, ut statim domũ abiret, reductaq;
à collo veste, vociferatur, se paratum esse ad
præbendum [si quis necare ipsum vellet] *iugu-*
gulum &c. &c. Ferunt verò eum assurgere
Senatui vellet, eum ab amico, aut verius adu-
latore quodam suo, Cornelio Balbo, prohibitum
monente [vide nequam adulatorem] *ut se*
Cæsarem esse meminisset, seq; ut præstantiorem
coli pateretur, &c. Nihil igitur magis offen-
sam in animis movet, quàm si honos aut ti-
tuli contemptim auferantur personis, im-
mò magis si pro malignitate dicacitatis, ad-
jiciantur scommata, præsertim in ingenuos
Cives, qui eò magis delicatioris sunt animi
in offensam, quò magis suæ virtutis sunt
 consensu.

46. Famulitium sit tibi decorum, equus, cibus, & honestamenta domus.

47. Nunquam privatus fias, aut quasi incognitus.

48. Quanquam inter adversa, salva virtutis fama, non vultu demisso aut supplex, sed ex memoria prioris fortunæ agendum.

49. Æquale Matrimonium, pro auctoritate.

50. Liberos bona educatio & bona fama, Parentibus solatium & æstimatio.

51. Domesticos clientes, veraces potius habere, quàm blandiloquos, qui tibi ex fide referant & præcaveant, si aliquid in populo de te spargitur, ut eas rectè factæ obviam, seu ipsi diluant, vel excusent. Falluntur, qui illos, nimium placere volentes, in amoribus habent, venundatores potius suæ famæ, quàm amicos, permitte spontè [si sapias] referri tibi modeste omnia extra metum & offensam, nè ignarus sis obvian-
do vel præveniando, immo te ipsum corrigendo, vera enim exprobrat aliquando vulgi obtrectatio, quæ ipsi amore nostri, aut nostrorum, tum per incuriam, in nobis, nostrisque, non advertamus, domestici verò coram nobis taceant, aut præ non ere-
rud

erubescant. *Vult volens decipi, qui nisi blanda sibi narrari cupit.* Deinde domesticos tuos, non nimis molliter, sed in actione occupatos habebis, nè innutrientur otio, occasionibus posthac emerfuris, futuri inutiles, desidiosi, insolentes, dùm pro injuria reputabunt, si ad actionem aliquam vocentur, semel defuncti; idem innuis perspicacia Salomonis (Prov. cap. XXIX.) *Qui delicate à pueritia nutrit servum suum, postea sentiet eum contumacem.* Honoratioribus igitur domesticis, per honestiora munerum, inferioribus, per minora servitiorum uteris.

52. Incessus lentus & gravis, vox submissa, cum opinione Majestatis.

53. Semper vera loquere. *Mendacium servile peccatum est*; immò naturam furti habet, furtum rem aufert alienam, mendacium verbum congruum furatur veritati, prout commune proverbium Polonum fert. *Mendaces consequenter esse fures.* Immò sunt leves, garruli, infidi, inconstantes, versuti, simulativi, fallaces, venales, injusti, nam ferè idem [ex non rectè agendi] vitii suppositum habent. *Veritas mater virtutum est*, exinde cum omnia rectè facit.

Deus veritatis vocari voluit ; in diabolo quia obliqua omnia & contraria sunt , Patris mendacii, supremum titulorum habet, Quem igitur rectum virum probatum cupis , vide an dicto verax sit , vix enim fieri potest, ut facto obliquus fiat. Veritatem semper probo & suadeo ; verum in aulis Regum , ingrata ut plurimum veritas est, pauci sunt veri amantes *Josaphat* , sed plures *Achab* , prout certè , si veniat in aulam verax *Michaas* , indignationem Regis experiatur [*odi eum , quia non prophetat mihi bonum , sed malum ; III. Regum Cap. XXII.*] aut incurrendum in colaphum adulatoris *Sedecia*. Abesse igitur à consilio præstat [præsertim si odio multo , nullo fructu, veritate laboretur] vel cum ades, veritas omninò loquenda est, præstat amittere gratiam , quàm conscientiam , immò præstat agere *Michaam* , quàm falsarium *Sedeciam*.

§ 4. Satiùs te submelancholicum aut gravem potius , quàm jocosum agnoscant effuseq; hilarem , comitatem tamen serva, cum illis præsertim, qui ad mutuam humanitatem , non ad suum fastum , referunt omnia arroganter.

§ 5. Quod

55. Quod scis per obtréctatores detrahendū tibi [quod tuæ domui aut in moribus casu obveniat] potius præoccupabis spontè fatendo, non detrahent, neq; loquentur in exprobrationem, quæ fateris, aut in quo te ipsum spontè culpas, aut per jocum habes.

56. Cave nè unquam conqueraris, etsi pro impatientia doloris opportunum credas, deesse enim tibi aliquid, spontè fateris, circa amicos, vel circa fortunam, proditor tui ipsius, & ægritudinem animi simul detegis, etiam ignotis, ut qui te omni ex parte felicem credidere, magis indè æstimaturi, jã secùs aliquid demptum credent, in levipendium. Omnes ideo hilari vultu excipe, quasi omnia ex optato fluant, non alia re magis invidos tibi confundes, qui aliàs tibi adversa optarunt.

57. Non in vestitu superfluo, aut domo exquisitis mobilibus ornata [modò hæc sint necesse circa honestatem] verū in virtute & morum constantia, viri Politici authoritas consistit.

58. Severitate sis gravis, blandientibus incorruptus, adversus minantes invictum habeas animum.

59. Omnibus sis cognitus & comis, mul-

tos sæpe convictui, raros secreto intimiori admitte.

60. Observantiam tui in minimis firma, in præsentia majorum, ut exemplum honesti reliquis inculces.

61. Plura sæpè in nos peccantur, dùm complacemus, quàm dùm contrariamur,

62. Honores & præmia ipse tribuas, pœnas verò aut redargutiones [si quæ irrogari justò debeant] irrogari cures ab aliis, ut aliorum invidiâ, acerbis, sic tui meritò munificus & amabilis,

63. In consultatione, dùm contrariæ emergunt opiniones, qui mediam attulerit, plerumque omnes in suam trahit sententiam, non quod melior ista, sed quod ad medium, quàm ad totalem assensum adduci se plerumque patiantur homines.

64. Cum magnis Viris & Principibus extraneis, notitiam quære, & communicationem literarum, aut internuntiorum inseres.

65. Structuræ non vulgares, statuar, templa magnifica, famam authoritatis retinent, & parant opinionem, item sapientum monumenta, nomini dicata; Nam quæ majores requirunt impensas, nisi à ge-

nerosis pectoribus facta veniunt, præsertim cum non sui lucri, sed publici commodi intuitu impenduntur, ad famam posteritatis. Sic *Zauzes* pictorum præstantissimus, picturas suas excellentes, nullo pretio exponebat, Civibus eas gratuito daturus, ut magnitudinem animi testaretur, immò forsan quod arbitraretur, operam suam eò æstimationis ascendisse, ut omne pretium superaret.

66. Propositurus aliquid populo aut amico, quod in rem mutuam sit, potius quæres modos, ut petaris, non petas.

67. Consulebat ille non leviter suæ auctoritati, qui inter colloquendum, stabat aperto capite, ne sedendi aut tegendi capitis, minoribus foret necessitas.

68. Histrionum & levium ludorum, non sis spectator, tamen nonnulli honestæ popularitatis loco ducunt, habere intra domesticorum numerum, joculatores & histriones lepidos, ait *Marius apud Sallustium*. Sordidum me & incultis moribus ajunt, quia parùm scitè convivium exorno, neque *histrionem ullum*, neque pluris pretii coquam, quàm villicum habeo; Nam ex Patente meo accepi, munditias mulieribus, viris

viris laborem convenire, arma, non supellectilem decori esse.

69. Voce oppressos, defende potius, quàm opprimas, & patronum miserorum, publicè age.

70. Loquaces & leviusculos, tum vinolentos, noli lacescere verbo.

71. Legatos extraneos, honorificè domi tuæ excipe, quò famam nominis spargant, & ab iis cura salutari.

72. Postula magis, quàm supplex roga [quia faciliùs res sic habentur] ac potius per alios, nec unquam oblitus tui. Illaudatum aliàs Othoni [apud Tacitum] Qui protendens manus, adorare vulgum, jacere oscula, & omnia serviliter pro dominatione.

73. In publico populi consilio, multa objecta sæpè solvuntur tacendo, multa respondendo, immò multa non audiendo.

74. In gravioribus causis, aut quæstionibus, tum objectis, & melioribus consiliis res flecti non poterit, non quid respondeas, sed quemadmodum non respondeas? cogita.

75. Qui multa respicit, nihil agit, dum consilio, seu dum facto opus est, in consultando præsertim illi, qui merè in partem assentientium transeunt, aut qui merè con-

trariantur, probantur, ambigui verò, seu neutrales, [vel ut vulgò ajunt, *Non totaliter resoluti*] neque apud populum, neque apud Principem parant sibi auctoritatem, utrique parti suspecti. Rectè dictum. *Media via, nec amicos parat, nec inimicos tollit.* Tum illud, *Tremula manu vitrum capiendo, quò magis frangere quis cavet, frangit.* Merito succenset Tacitus [Histor. III.] Vitellio, ejusque produci, dùm in hanc illamque partem studiis distenditur & expendit diversa; cautus nimium esse cupiens, proditor sui veriùs factus, *quod inter incipitia deterrimum est, dùm media sequitur, nec ausus satis, nec providit.* Eò collimat dictum [apud Ecclesiastem Cap. XI.] *Qui observat ventum, non seminat, & qui considerat nubes, nunquam metet.* Resolutus ideò sis facere seriò, quod aggredieris, non tamen aggredieris, nisi factu licita, ne dùm involvere vis, periculo involvaris. Licitis DEUS adest.

76. Apagè cum amicis, qui sæpè reconciliant: Aut cum domesticis, qui crebrò deprecantur.

87. Majora negotia apud populum tibi tractanda asserere, minutiora relinques
minor-

minoribus, quædam digito opus habent movenda, non brachio.

78. Etiam si omnia refutanda sint, aliqua tamen approba, nè omninò contradictorius esse videaris, salva tamen virtutis famâ.

79. Primis injuriis ni resistas cum gravitate & virtute, contemneris. *Veterem qui fert contumeliam, invitat novam*, at quomodò non procacitèr, verùm prudentèr resistendum? tu videas.

80. Passio plerumque in nobis dominatur, & zelum putamus, dicendum seu faciendum aliquid, nobis usu venit, verbo invenhimur, velut correcturi, & exacerbamus potius, sæpè detrahimus, sæpè diffamamus, sæpè irritamus materias & personas, quod agere pro modestia, aut intra dissimulationem, magis in rem fuerat; veritas, omnisque modus agendi, stylum subtilissimum referat, non cuneum, qui findit magis, quàm penetrat. Cùm nimis justì esse affectamus, in injusticiam impingimus, sævitia quandoque est, dum punitionem putamus, nec est correctio, sed exacerbatio aut alienatio amici morosa. Cùm rigide [vel ut ajunt] *Morose ad pulvisculum usque, repetimus*

timus nostra, non fit, ut aliena cum nostris non involvamus, impertinentium veriùs raptores, quàm exactores iusti; sæpe deinde potentiam credimus, cum inferre injuriam possumus, aut secùs accipere credimus, nisi inferamus, nec repulisse est, nisi alter injuriam patiatur. Quæ igitur minore damno aut scandalo dissimulari possunt, dissimulanda prudenti viro suaserim, privatam aut publicam pacem, quietem mentis, pacatam conscientiam habere quicupit; Eò ferè collimat dictum. *A justitia recedendum nonnunquam in parvis, qui velit salvam eam in magnis*, non enim sic erit injustitia, sed dissimulatio justa. Idem vult Spiritus Sanctus apud Ecclesiastem. *Noli esse justus multum, neque plus sapias, quàm necesse est.*

81. Proximè sequitur, virtutis etiam zelum temperandum, idque amore in majus promovendæ, ut dum nimio ipsius [prout debemus] ducimur amore, tamen secundum tempora & personas, prout res agenda venit, suavius [cum vitii quadam dissimulatione] sensim animis hominum eam insinuemus, quod non est recedere à virtute, sed eam provehere in majus; Scri-

ptura docet alios hominum acerbius increpitos, alios per similitudines suaviter reductos, potius quàm retractos, sic CHRISTUS, dùm bonum Patrem familias representat, intemperantem zelum servorum arguit, & dissimulare docet. *Sinite, nè fortè colligendo zizania, eradicetis simul cum eis & triticum.* Sic erratum à nostris in Moschovia, intempestivo, nè dicam insolenti religionis zelo, cùm enim Demetrius Magnus Dux Moschorum, Poloniam virginem in uxore duxisset, occasione Catholicæ Principis aliqui Polonorum jactantèr ad invidiam usquè Moschorum schismatis, ritum Catholicum dùm promovendum contendunt, Demetrium Ducem; novamque nuptam, in exitium præcipitarunt, Poloniamque cruento implicarunt bello. Sed magis profana nobis serviant in exemplum, severi mores Galbæ Caesaris, licet recti, sed non pro tempore adhibiti, exitio fuerunt, *quibus impar ea ætas erat*, cùm fortè circa flagitationem militaris donativi, magis animosè, quàm in rem opportunè diceret, *se militem legere, non emere*, dùm rigidus recti prisci que moris assertor affectat fieri, non assecutus, simul rem, seq; perdit. Consultius

sultius aliàs facturus, si intra dissimulan-
tem, importunitati nonnihil in tempus
concessisset, & delinivisset humaniori ver-
bo flagitantes, sensim aliâ viâ cum tempo-
re in melius reducturus, neque à virtute
Imperatorîâ sic recessisset, sed intra pruden-
tiam regendi, habuisset totum. Etiam in
asserenda libertate, circa observationem
antiquarum legum, vel aliquid novum sta-
biliendo, temperato & recollecto zelo o-
pus, secundum res, tempora, aut personas
agendo, nè cùm reducere ad normam rigi-
dè contendimus, potius malum, resque ir-
riteremus. Quâ in re summa perspicacita-
te, iudicio valido, ac super omnia, experien-
tiâ opus est, nec possunt in eo valere, nisi
sedata, defæcataque ingenia, *quæ non quid
debeat fieri, vel prout aliquando factum est, sed
quid nunc rectè possit, ex æquo pensant, ma-
gis è particularibus causis, reiq; propiniori-
bus, quàm ab universalibus maximis (quæ in
particulari fallere amant, & iudicium con-
sulentis non leviter arguunt, nam universalia
multas exceptiones habent, & multas circum-
stantias requirit imitatio, ideoq; sæpè nos fal-
lit)* consilia eruendo, & quæ non habendi
cupidine aut spe inani, sed magis possibili-

tate certâ beneque consulto, res meriuntur, dum ratio appetitu superior est. Aliquando enim suavitas agendi, aliquando rigor, aliquando utrumque simul, vel demum nihil agere, sed dissimulare in tempus, & ferre malum prodest, ne dum præcociter unicum vitamus, multò majora, immò plura incurrantur, res irritando, ut hoc casu terviat dictum, *Malum benè positum, nè moveas.*

82. Ignæ nonnulli tum inquietæ mentis, tum sibi non otiosi, sed agere complacent, dum quieta, non sinunt quieta, aut nisi res turbent, & in aliena [quæ sæpè devorant] invehantur, diem perdidisse, suaque arbitrantur, & pro injuria reputant, famam potentiæ ex aliena injuria aucupantes, ut igne Salamandra, sic nonnulli asperis & discordia vivunt, *quæ alii flagitia, hi remedia vocant; In id nati, ut nec ipsi quiescant, nec alios sinant.*

83. Potius non videre te injuriam simulâ, quàm dum vides, vindicare illam opus habeas, nè si agnitam molliter dissimulaveris, pejus contra te in posterum peccetur.

84. Si impetu in aliquid novum fertur populus, cui resistere non possis, satis

is penes virtutem habeas , si non assenti-
aris.

85. Quæri exindè potest. Quid secu-
rius, & in rem magis opportunum, an præ-
cipui unius, vel saltem aliquorum in Re-
publica, aut vulgi aucupari favorem? Non
disquirendo hinc illinc, constat, qui totos
vulgi favoribus se dedere, ab ipsomet vul-
go proditos, oppressos; In cuius gratiam,
cùm omnia feceris, semper aliquid in ma-
ius vulgus requirit, vel ni sufficias, antea
bene fecisse damno est. Quod verò ma-
jus, dum abutitur vulgus bonorum virtute
& operâ [semper eos casibus objectando]
facit velut indiscreti equites, cùm bono e-
quo læti, intemperanter utuntur, & nimio
cursu fatigant, non parcendo labori, nec
alium substituentes, eum perdunt, quod in
vitis Gracchorum [apud Plutarchum] ob-
servatum habeas, & ratio in promptu, Nam
facilius paucorum genium noveris, parave-
risq; tibi favorem, facilius gratiam demere-
aris, aut iratos placaveris, facilius cum pau-
cis agas, suadendo, dissuadendo, orando, fa-
cilis obtineas, dum se citius pro paucitate
expedire possunt, decernendo. In multitu-
dine secus, communitas frontem non ha-

bet , quæ non tam facilè de maledictis erubescit , dum dispersim ignominia , in tot capita vadit , ad unius verò Principis personam (non divisim) tota infamia (ejusque posteros) directè spectat , eòque magis afficit. In populo deinde , diversa sunt subjecta , inclinationes , affectus , studia , quibus impossibile ex æquo ut satisfacias , dum pro diversitate ingeniorum , suspicantur vana , aut secus interpretantur , cùm non intelligunt rem , plures verò pro malignitate. Offenditur quidem Princeps veritate , sed magis offenditur , & simul furit populus , uni dum places , alterum ferè offendis , nam in amores , odium , æquè facilè vulgus fertur , non ut studio è velit , sed uno alterovè impellente. Quod verò gravius , si in aliquid bonum fertur populus , omnes (unus alium circumspectantes) curam adhibent , jam si nocere cupiant , quisque pro se , manum studiosè adhibet in ultionem ; ad nocendum uniri , ad benefaciendum tepidi & distracti. Ex eadem ratione fortè Machiavellus , ingratiorem fieri populum censet , unicâ Principis personâ. Dixerim itidem , præstare favorem aliquorum præcipuo-
rum

rum in Republica (sed quem non per flagitia & obliqua demerearis) favoribus vulgi. Addo super hæc, si non altioris alicujus boni, aut virtutis intuitu (quæ sola sibi ex conscientia rectè facti præmium est) sed aucupandæ vulgi gratiæ & popularitatis, rectum aliquid in publicum facias, falleris; sæpius odium pro gratia redditur; Rem expertam ipse habeo, quam loquor. Si profana parvi sunt, en cape in rei documentum altiora, quia sacra; Nemini magis, quàm operatori salutis *Christo*, fraudi fuit populi plausus & Gratia, hodiè ut Regi filio David, in urbis ingressu, palmis & substratu vestium, in pompam triumphi, vias sternentis, mox intra dies aliquot, subita mutatione, crucifigendum petentis. Sic ferè vulgus, *cujus boni, aut pravi affectus, nunquam modicis continentur.*

86. Afflictis palam condole, sed tamen sine injuria affligentis.

87. Honores non pete ipse, oblatos specie recusantis accipe, non multo exultantis animi signo, nec etiam tristi, ut ingratus, sed graviter; per amicos petiturus non ore tuo, pro famâ modestiæ, tum

ut videaris, *magis te posse officium gerere, quàm nimis velle*, quod venustatem actioni imponit, & dantem magis promptum reddit. Vis adhuc altius, unicam artem disce; Non quomodo ambienda quæras, sed quomodo forte contentus, non ambias ultra pacatus, plura sic utique [immò omnia] lætus contemnere potes, & quasi ex alto animi despicere, nō omnia verò destinata, ambiendo adipisci, eoque de non habito tristis, & stans loco velut inferiore. Habet velut omnia, qui non ultra cupit, in animi mensura, non fortunæ, sat satis habendorum modus.

88. Apertis horreis, leva pretium frugum.

89. Nobiliores exules, tūm à fortuna desertos excipe domo, & necessariis procura. *Alii dividunt propria, & ditiores fiunt, alii rapiunt non sua, & semper in egestate sunt,* [inquit sapiens.]

90. Pupillis honestarum familiarum, sumptus educationis provide.

91. Si à populo voce opprimaris, modestiam obijce cum gravitate & reprehensione generosa, quàm ut frustra acerbius contendas, unus à multis facilè contemnendus, nec aliâ tutius viâ, furorem populi evades,

92. Mi-

92. Miseris sis aditu facilis, & intentus querelis, licet subrusticè, & tædiosè conquerantur, nam loquax ut plurimum dolor est, da bona verba, gravia tamen potius, quàm mollia, condole saltem, ni juvisse sufficis, nemo utique verbo pauper est, quod æquè afflictis gratum, ac si juventur, aut secus novam injuriam sibi inferri putent, si transitoriè audiantur. Princeps igitur, aut quicumque sunt viri honesti, in omni vitæ suæ actione, teneant rectè agendi præceptum. *Nihil sibi esse salubrius, tam ad morem populi parandum accommodatius, quàm humanioribus responsis etiam infima sortis homines, ab se dimisisse; salvâ tamen gravitate, ne obviâ facilitate vilescat.*

93. Inter *militares* de armis loquere, inter *doctos* de virtute, doctrina, libro, honestate, personis, rem & sermones accommodaturus; *Hilares*, liberalius suaviterq; excipias: *Severos* aut *Morosos* contractius, & brevibus tractabis, cum faciliè multi sermonis nauseam habeant. *Ambitiosos*, honorem deferres, reverentius agendo, perinde ac si eos multi facias: *Cum modestis & sinceris*, simplicitatem dicti quæres, nam faciliè dolum suspicantur, si verborum involucris, &

ambagibus affectatis utaris: *Malignos, Astutos, Levesque*, quoad potes, vitabis, sed procul à nota vitantis, ne offensos habeas, universim verò, secretorum tuorum (loquendo) cautus eris: Insuper inter *Æquales* dignitatem ex pari tuere, nè posthabearis, non tamen semper ad numerum, & stoica gravitate, nè arrogantiae nomen parias: Inter *inferiores*, faciliorem tui copiam praestabis, ut ameris, non nimius tamen aut effusus, nè latietatē inducas, sed propior gravitati. Erga *superiores* non nihil submissus te geres, nō tamen immemor tui, verū in ultra *venustam generositatem*, nec ut abjectus, aut adulator, tum deformi obsequio laborans.

94 *Meticulosorum ingenia* ingesto terrore, nec tamen sine condimento gratiae, ad officiū commodè rediges; *Generosos* secūs, exacerbat terror, ut potius reddas obstinatiores, aut alienes verius, dum eos sic parare cupivisti, verū eos gratiā comitate, liberaliore convictu [idq; ad oblationis raritatem, non semper facili aut effuso, magisq; adhuc gravitate agendi generosa, quae reverentiam personarum ingerit] tibi obstrictos pares. Verbo dicam, injuriæ generosum irritant, mollem tum pusillanimum

fran-

frangunt. Cum mediis aut indifferentibus, præsertim verò cum astutis, aut qui libenter insolescunt, adhibebis simul utrumque, *terrent nonnullis, ni paveant. Morosos denique, & Intrusores, lautio e mensa, & aliquid pro tempore dando tibi mercaberis.* Rara tamen ingenia, quæ non hoc ultimo telo expugnare fas sit. Prout igitur hunc aut illum, ad tuum beneplacitum habere vis, introspecte naturam præcis hominum animi, æquè variis sunt ac vultus, ut agas, prout ad metum, vel generositatem inclinat, vel participat simul de utroque, ut quemque suo affectu aggrediaris expugnandum, prout in aliquo hic aut ille, magis prædominatur, metusnè, cupido gloriæ, amor privati commodi, publicum bonum, aut tenebrior conscientia; Objectando dextrè ad persuadendum, pericula, ignominiam, damna, jacturam publici, ingerendo scrupulos, & offensam DEI, & quævis in contrarium, vel si faciant, omnia evenitura in partem meliorem: Jam si omninò refractarii sint recta sequendo, saltem in molliora quoquo modo deflectes, & concedes partem, velut Senecæ & Burrho

E 6 vilam,

visam, nè utrumq; NERO pervinceret, alterum concedere; vel certè eveniet, [præsertim si cum generosis res est] ut negligent, si aliquid modò in speciem generositatis sibi concedatur, nec planè impugnari videant, alias nihil pervincere, servile putantes; Sæpè repeto: *Hominum animi, sicut generosi equi, molli freno faciliùs reguntur.*

95. *Qui amat accipere, negat nihil.* Non in privatis modò, sed puta in publicis, faciliè habentur omnia, præsertim apud eos, quibus accipere dulce est, dum sunt *semper venales, & aliena ministri potentia*, immò mensarum, placitorumque affectu. Non ex vano, inexpugnabilem urbem, expugnandam faciliè credidit, in quam a sellum onustum auro, intrandum didicit. Et Jugurtha, Romanum statum inclinari advertit, debiteque illudit, *O venalem Romam, & maturè perituram inveniret*, cùm reperit plerosque ex curulibus, qui accipere oblata, non promptè recusarent, immo promptissimè caperent, vendi sibi negotium amavit, cùm venditores odisset, proditorem, non proditores amaturus; viri ideo quicunque recti, etiam licitè oblata, intra verecundiam, propiusque nolentes, acceptare

ptare debent, aut prorsus non acceptare, virtutis præmium in virtute quæsituri; Hoc enim genus vitii, mentitæ suavitatis condimento, facile insinuat se hominum sensibus, & leviter modò tangentibus allinitur sine sensu. Facile qui accipit, facile dat sibi suaderi. *Pessimum veri affectus venenum, sua cuiq; utilitas.* Meritò pagina sacra, rectos in populo viros, iudices, ducesque dum laudat, aut secus depravatis dum succenset, his appetentiam munerum exprobrat, in illis contemptum oblatorum, velut solam rectæ popularis virtutis normam commendat. *Dixit Samuel ad universum Israel [1. Regum Cap. XII.] Loquimini de me coram Domino, utrum de manu cuiusquam munus accepi, contemnā illud, restituamq; vobis.* Et dixerunt: *Non tulisti de manu nostra quidquam.* Et Cap. VIII. *Non ambulaverunt filii Samuel in viis ejus, sed declinaverunt post avaritiam, acceperunt munera, & perverterunt iudicium.* Mirum dictū, quod pervertat veritatem, bonum publicum, & pervertat iudicium, qui properè accipit munera. Talesque hodie videas: *In quorum manibus iniquitates sunt, dextera eorum repleta est muneribus*

[Psalmo XXV.] potius igitur, *Non accipies munera, quæ etiam excæcant prudentes & subvertunt verba iustorum.* Exod. XXIII.

96. Nullius artem reprehende, quod vel maximè offendit.

97. Multa in absentem statuuntur, quæ in præsentia non fierent, cura [si tutè potes] ut dicendis de te rebus aut statuendis adsis, præsens, cum authoritate tua & amicorum, nè per absentiam conscientia facti arguaris, eaque importuna meticulositate, maiorem ingeras audaciam [æmulis] validius contra insurgendi, qui nisi tuâ imbecillitate fortes.

98. Magnorum virorum dissidia, concilia, & mediatorem te interpone [etiamsi non vocatus] si authoritate vales, sed procul ab importunitate, & sine alterius partis offensa, fac talia pro publico bono, & amore proximi.

99. Dum punis, privatim puni, dum parcis, publice parce.

100. Habebis aliquem bonæ existimationis virum, qui pro te agat, & loquatur in publico, quàm ut ipse pro te. Major alienis dictis, in aliena causa fides, laudando vera, seu excusando liberius falso imposita,

ta, tum opinativa, & minor tibi dicenti, invidia; Quæ pro sua causa dicuntur, magis ex necessitate, propria & pro animi passione, quàm ex vero dici communiter creduntur.

101. Quæ tibi adversa acciderint, supprime, aut rege lætis, prospera latius divulga.

102. Sermones vulgi, velut nesciens ignarusque feras, prohibiti enim plures erunt, quasi veri, si prohibeantur, & nocituri.

103. *Securitati consule prius, antequam vindicta*, quosdam enim, haud tutò aggrediaris, ut cavere ab iis magis opportunum sit, quàm ut aliquid acerbius in eos statuatur.

104. Justitiam ama, & verax sis, quò magis fidem rebus tuis pares.

105. Nonnulli dexteritati tum prudentiæ, virtutisque suæ in tantum fidunt, ut spontè sese conijciant in occasiones periculosas, negotia intricata, difficilesque conatus, supra vires aggrediantur, quasi in arbitrio sit, ex illis eluctari, tamque deserere promptum, quàm irritare incepta, dum velut supra humanos casus constitutis, tum non errandi potestatem, sub imperio habentibus. Quod secus fit, dum tenemur potius à negotiis, quàm tenemus illa. Non admittere verò occasionem, primus gradus est non errandi, dein posterior non errare. Ne Deus

quidem, dum probos vult nos fieri, peti voluit quàm *Nè inducamur in tentationem*, quasi non peccaturi, si tentatio [id est mali occasio] absit. Non igitur quantum in nobis est, dubius rebus nos volenter committamus, ne apprehendamus plùs animo vel manu, quàm cui sufficere possumus retinendo, vel contra obluſtantia constanter perseverando, nec sibi blandiatur mens, ut præsumptuosâ opinione nostri, minus opinemur de virtute contrariæ partis, dum volumus, ut evitemus occasiones errorum, immò ipsa mala. *Faciliùs aliqua non recipiuntur, quàm exeunt, immò excluduntur venientia, quàm expelluntur, dum fuerint admissa.* Qui admittit occasionem, admittit errorem.

106. Irasci, mala verba dare, ferire, nemini fidere, res quietas non sinere, pro libitu egere, aut secus, in speciem authoritatis desidere, *Nomine magnifico segne otium velare*, in alios agendum opus conijcere, superbire, tum inolescere, potestatem regendi, nonnulli falso putant, cum aliàs suavitas agendi (præviâ prudentiâ & cautione) rebus perficiendis totum possit. *Maxima flumina, minimo sono labuntur.*

Non

Non tamen obsit rebus, subirasçi modicè, intra gravitatem agendi, immò valdè pro-
fit, ut vivacius in executionem urgeantur,
iram prudentem, esse cotem fortitudinis, non
ex vano dictum, in consilium verò rectè
incipiendorum, sola prudentia, cum deli-
beratione non affectata, jus semper habent.
*Potestatem, cautis quàm acrioribus consiliis
tutius haberi*, Tacit.

107. Vitia hominum privatim publicè-
que, nihil magis intendit, quàm cum malè
fecisse, joci vicem habet, non suspensio su-
percilio, sed excipitur cachinno. Exindè
licentiosi, dùm non timent DEUM, quod
reliquum erat, excussa hominum reveren-
tia & pudore, malè facere sibi complacent,
vel dùm in rectiores incurrunt, qui rigidior-
re fronte, tùm verbo factum excipiant, in-
dignantur, moneri nolunt, paucorum ri-
gorem & censuram injuriæ loco habent,
dùm plures jocosò intuitu, talia transeunt,
velut approbantes. Moderni seculi, immò
novæ Politix ea labes est. Rigidæ prisco-
rum Germanorum virtutis, non immeritò
causam adnexuit Tacitus (de mor. Germ.)
*Nemò illic vitia ridet, nec corrumpere aut
corrumpi, seculum vocatur.*

108. Non levis est prudentiæ *Moralis* tum *Politica*, scire in suis domi, & Civibus publicè, quædam minora dissimulare, nec vetare, ne obtineas, ut pervincendo (quæ agnita vitari, nec coërceri possint) in pejora mala incurratur, ex jussorum & impunitatis contemptu, nisi aliquid fragilitati concedatur, velut profundissimè sparsim *Tacitus*, tum alii. Nescio, annon tutius sit, quædam adulta & prævalida vitia admittere, quàm illud assequi, ut palam fiant, quibus prohibendo, pares jam non sumus, dùm verò prohibita semel impunè transenderis, neque metus ultra, neque pudor est; Quædam tutius non prohibere, quàm prohibita levitè præterire, & fontem non accusare, quàm accusatum non punire, nam evulgatus pudor, non satietatem ut multi rentur, sed incitamentum parit. *Coerctio plus damni in Rempublicam quandoq; affert, quàm indacorum verò atrectare, quod non obtineatur; si velis quod nondum vetitum est, timeas nè vetere.* Tolerabilia sunt modica vitia, quàm prohibitio, cui nemo paret. Mithridates continuo usu veneni, naturæ suæ reddidit familiare toxicum, ut contra noxia induraretur, sic aliquæ malæ

consuetudines, tùm abusus, consuetudine roborati, non tam obsint Reipublicæ, (nam sæpè alterius virtutis interventû, velut ad æquilibrium pensantur, & cum tempore conveniunt) quàm præceps correctio: prout violenta medicina, plûs noceat ægrotis, & vim naturæ infert, quàm ipse morbus, qui sensim utiq; conficit. Inter hyemem & æstatem, ver aut autumnus inest, inter diem & noctem diluculum, natura ipsa haud violentè, quasi per gradus, in mutationem se transferente; etiam virtuti horror imponatur, si severius se intrudat, non suaviter insinuet; cum tempore curandum, quod cum tempore invaluit. *Repentina novitates sunt tanquam advena & peregrini, quos admiratione plûs, minus benevolentia prosequimur.* Exindè novorum Politicorum axioma vix improbarem. *In seculis aliquanto corruptioribus, homines industriis & sat agentes, usui magis esse, quàm pro rigore virtutis nimium zelosos.*

109. Ne decipiaris, maturè cogita te deceptû iri, sæpè diffidentia mater securitatis est, aut secûs, si in vanis niniû scrupulosus sis, sæpè causa, inanis metus, nocet rei, nocet parandis amicis Dubitaverim præterea,

an modica calliditas, non sit in parte Politicæ prudentiæ, seu cautionis, pleno hoc obliquorum ingeniorum seculo, non ut circumvenias, sed nè circumveniaris, dum quemque pro suo ingenio scis metiri, aliqui enim ita sunt incaute sinceri, si præsertim in blandiloquos & astutos incurrant amicos, ut nihil sinistra intentione agi opinentur.

110. Sis Politicus, non tamen ut te Catholicum esse obliviscaris.

111. In privatis publicisque negotiis, cum paucis vel cum populo, non semper idem tenor, modusque actionis servandus. Dum rem habere probè cupis, verùm secundum tempora, personas, immò cum iisdem personis, sed aliis occasionibus, rerumq; circumstantiis, modum agendi, variari necesse, aliquando severitas juvat, aliquando eadem obest, sed prodest clementia & suavitas, aliquando munificè, aliquando parcius aliquos habere oportet, & dandi facilitas obest, tacere & dissimulare, nonnunquam exprobrare palam, aut tacito conducit, properare aut cunctari, petentibus statim annuere, aliquando differre in tempus, negare, difficilem se præbere, & grave

grave supercilium monstrare prodest, mollius aut austerius, cum autoritate matura, vel submissius, familiariterque pro confidentia agendo. Nec CHRISTUS in sua Oeconomia, semper eundem agendi modum servat, sed pro tempore variat; Peccatricem mulierem ad pedes suos provolutam, promptè admittit, peramanter adspicit, *bonum opus operantem* laudat, eandem postea, licet pœnitentem, & in melius correctam, à sui amplexu arceat, severiusque habet. *Mulier, noli me tangere*, cum utrumque intra peræqualem bonitatem ageret, illud intra summam clementiam, hoc cum Majestate, non extra tamen gratiam, modo vario & causa, verùm intra eundem amorem, dùm simul arceat, simul solatur eandem, simulq; honesto præficit officio, *Quid ploras? quid quaris? Vade ad fratres meos, dic eis.* Joh, XX. Dixerim, qui se aliorum exemplis, suæq; probatæ semel praxi totos alligant, nisi aliquid in præsens mutant agendo, addant, minuuntvè, graviter falluntur, potuit iisdem de causis, cum iisdem personis, severior modus prodesse, cum quibus alio tempore, alio loco & occasione, nisi suavius agendo remittas de

rigor

rigore, rem turbes, nec quod voluisti assequare, uti eadem vestis, non cuilibet corpori & ætati, sic praxis & exempla, tum imitatio, rebus & personis non quadrate serviant, nisi pro tempore immutentur.

112. Animi constantia & ingenuitas juvat in adversis, superat invidiam, arcet mala: Mollities secus, accersit periculum, cui vitam, animi fortitudo aut constantia non dabit, metus aut fuga rariùs parabunt. Sic (apud Tacit.) accusati de amicitia Sejani, alii per mollitiem excusando, eò majorem suspicionem sui eum movissent, succumberentque in causa, *Marcus Terentius* ingenuè quod verum erat, solus fatendo, constanter superavit invidiam, & evasit objectorum poenam, prout ejus responsum, non sine gustu, & paranda doctrina, legas apud Tacit. VI. Annal. Qui silentio tristi objecta recipit, non modesta est, sed tacita confessio, aut iudicem tacite arguit sævitæ, quasi in majus defensione innocentia irritetur: Qui autem negat, quod verè objectum, seipsum accusat, non quod noluerit, aut de malefacto doleat, sed quod latuisse tantum expetiverit, præsidium malitiæ ab occultis habiturus, inam-

metum prodit, ex facti conscientia & atrocitate, quod fateri veretur, non extinguit materiam obsectorum, sed irritat accusatorum æmulorumque proterviam, tum ad inquirendum & comprobandum ingenia, nè frustra objecisse videantur, demùm acuit audaciam, ut contra timentem gravius insurgant, inclinatum concitatiùs impulsuri in ruinam. Qui secùs ingenuè fatetur, propius poenitentem est, ut doleat de objecto, quod spontè agnoscit, & corrigendum videt; Dein, fortis utiq; animi signum est, intuitu virtutis [sit vero, sit specioso] tum pro ingenuitate, aliquid dicto, facto, tentasse, non tamen malitiosè, tū ex dolo, qui semper suspectior est, quàm animi apertus candor. Non superba tamen debet esse facti confessio, nec velut exprobratio, quæ magis exacerbat, dum obstinationis animo signum est, accusatorem & objecta velut contemnens, sit potius, intra vultus verecundam amœnitatem, nec extra ingenuam modestiam, quæ innocentia suæ (dum non turbatur) fidem facit, ac de clementia prudentiaq; discernentis multum sibi persuadet; Aut si omninò deprecandum sit, non faciat tamen aliquis ut ni-

mum


mium abjectus, nec veste sordidatus aut squalidus, quod indignationem sæpè magis, quàm miserationem movet; verùm faciendum ex memoria ingenuitatis & honesti. Sic, ut per varia casuum abeam (apud Thuanum) Joannes Fridericus Saxoniae Dux, victus prælio à Carolo V. Cæsare, & captivus, cùm pro nota rebellionis, decretum mortis jussu Cæsaris adferri sibi videret, lusui latrunculorum tunc fortè intentus, & velut in aliena causa minimè turbatus, Ernestum Ducem Brunsvicensem secum colludentem, simulque forti compatientem, constantèr monuit, ut eo non obstante, lusum continuaret, *suam innocentiam Cæsarisq; clementiam, ea in parte sat pro se laboraturam*, subjungens; Quà infracti animi constantiâ, Cæsarem flexit, & periculum vitæ, licet non fortunæ, superavit. Sic apud Franciscum Guicciardinum (Histor. I.) Cùm Rex Galliae Carolus VIII, (moto bello pro recuperanda Neapoli contra Arragonias) in Italiam cum exercitu se infunderet, ac fortè per transeundum, à Florentinis, pro societate armorum & amicitia, in urbem receptus, contemptius eosdem haberet, conditiones aliquas gravio-

res extorsurus, illi vero, potentiâ Regis consternati, circa consensû tergiversarentur, solus *Petrus Caponius*, vir altioris animi, agendi constantiâ, rem animosque Civium restituit, & *Carolû* plena generositatis voce, tum factô, terruit, verba sunt *Guicciardini* (Hist. I,) *Cùm* eius *Collega* coram Rege stetissent consternati, atq; à Regio scriba, compositionis capita iniquissima, scripta recitarentur, *Caponius* rei indignitate vehementer permotus, libellos è manibus scribæ abreptos, Rege spectante discerpfit, & se abiturum proripiens, voce concitata subjunxit: Quandoquidem tam iniqua postulantur, vestras vos inflabitis tubas, nos campanas pulsabimus nostras, haud obscure innuens, eas controversias mota plebe, armis esse decernendas; Constat, tantâ fiduciâ verborum *Caponii*, terrorem *Gallis* injectum, secùm reputantibus, tantam in eo homine constantiam, non sine fiducia alicujus parata potentie, & subsidiorum esse, quam obrem, eo revocato, Rex in æquiora, nec absona *Florentinorum* libertati deflexit. Sed cur vado per externa, cùm adsint domi exempla propria, idque in meamet causa. Cùm per iniquitatem delatorum, recte ple-rumque civium vota in sequiorem sensum

trahentium, liberius dictorum (ut fieri as-
solet circa libertatem) coram Rege accu-
sarer, ipseque ad interiorem Cameram me
vocato, pro Majestate exprobraret, id,
quod certè verum erat, *Angustia mihi un-*
diq;, hinc mendacium servile peccatum (si
vera negarem) & offensa DEI, illinc aper-
tior offensa Principis, si faterer, re collecta
repentè mente, in partem utique poste-
riorem peccare malui, nec tamen apud
pium Principem peccavi, fronte ad amœ-
nitatem (pro fiducia constantiæ, non ex-
tra tamen modestiam) composita, subjun-
gens: *Si qua à me dicta, non profectum à ma-*
litia, aut inquieti ingenio, sed factum pro fidu-
cia legis, tum æquitatis, cuius assertorem pro
Catholicâ pietate, ipsum Principem esse sci-
rem; Nec mihi alias iurato Senatori, nisi
cum lege loquendum conveniret; Cùm igitur
responsum acceptandum, aut aperta
lex, tum æquitas impugnanda esset, quod
nequaquam bonus Rex apud animum per-
vincere potuit (nam etiam juxta populi
libertatem convenientissimum erat) obje-
ctio intra ingenuitatem responsi conquie-
vit; unde, uti per cætera gestorum, alios,
sic eo casu, me quoque publicè ac priva-
tim

tim æquioris animi, bonus Rex habuit præconem. Cessare debui, verum non extra materiam, unicum adhuc constantis animi infracti exemplum apponere, Ferdinandi Arragoni Neapolitani Regis. Cum enim (supra memorato) Carolo VIII. Galliarum Rege, victoribus armis Neapolitanam oram pervadente, ipsaque Neapolis, urbes, & Prætorianis cohortibus in victoris nomen desistentibus, Ferdinandus regnum deserere cogeretur, nihil spei relictum, quàm ut cum paucis intimorum, relictâ Neapoli, in *Ænariæ* Insulæ arcem, *Isleam* nomine, secederet, verum eadem infensa fortuna secuta in Insulam Ferdinandum, arcis enim *Isleæ* præfectus, eodem quo reliqui Neapolitanorum morbo perfidiæ agitatus, in victorem Gallum propensior, descendenti fortè ex trireme, portas arcis occlusit: Fertur, insperato perfidiæ spectaculo, consternatum prius, dein recollecta mente & spiritu (à desperatis & animi constantiâ consilio captato) paucis comitantibus, proximius portam arcis animosè successe Ferdinandum, ut partim mandatis, partim exprobratione collatorum beneficiorum, & exinde turpis per-

fidia, partim vultus Majestate, Præfectum
 flectere posset. Non plus tamen apud per-
 fidum ea valuere, quam ut data nisi condi-
 tione, arce recepturum se Ferdinandum
 promitteret, si nemine comitante solus
 portam ingrederetur. Accepit ille promptè
 conditionem, non ut dissimulans, & exin-
 dè tacitæ offensæ suspectior, sed ut Majesta-
 tis conscius, moxque adapertha porta est.
 Tum verò in ipso portæ ingressu, non se
 Regem oblitus, eâ confidentiâ, coque vul-
 tu ac vigore animi, districto gladio in Præ-
 fectum & custodem portæ impetum fecit,
 ut satellites, qui armati in statione aderant,
 comminantis & imperantis simul Regis
 aspectu perterriti, extemplo portam ape-
 ruerint, reliquum comitatum recepturi.
 Quo casu manifestè apparuit, animi con-
 stantiæ, vel (ut Jovius ait lib. II, Histor.)
 Regum oculis, in omni fortuna, quandam
 supra humanam inesse vim, proditoribus
 autem degeneres esse animos, præser-
 tim cum in ipsa perfidia de-
 prehendantur.



Pars Tertia

POLITICO-MORALIUM.

I.

Conscios secretorū (etiam delinquentes) non habebis acerbius, nè irati prodant secreta, & res misceant.

2. Licet verum sit, nunquam conqueraris, quod malè de te loquantur homines, aut enim cū senserint te offendi, pejus loquentur in acerbiores vindictam, aut denudaberis coram audientibus, de adversariis, cum non levi suspitione famæ; potiùs bonâ indulgentiâ fortunæ, dic, tibi satis amicorum, & bona de te sentire omnes, immò in præsentia tibi detrahentium, sinceritatem & candorem lauda, velut ignarus traductionis, ut consequaris, quod illi sinceri à te vocati, esse justè velint, nè bonam de se opinionem amittant.

3. Cuique (sed præsertim in officio degenti) minima sui inobedientia, severius observanda, ut minùs seriò imperata, sint in executione, quò majoribus jussis, non ignavità attendatur.

4. Si quid in aliqua gravi materia difficile propositum, quod non statim intelli-

gas, scripto consignari jube, aut prudentem ministrum delige, qui rem inquirat tibi sufficienter relaturus.

5. Nimiam magnorum comitatem, suspectam habe, nunquam te illi credes totum, non enim mutuo bono faciunt, verum suo, quatenus operâ tuâ velut instrumento utantur, seposituri in partem, dum cogitatum perfecerint.

6. Nonnunquam prudenter de gravitate & de jure demittere, necessum putabis, quatenus assequaris, quod voluisti, alloquendo prior, salutando, visitando, adeundo minores, familiarius in parte colloquendo, convictum eorum non aspernando, nonnulla dissimulando. Sed hæc modicè adhibebis, velut obsonia rarioris favoris, non ut lautitia profusionis.

7. Privatum otium, & exercitia tui cubiculi, sint gravia.

8. Spectacula generosè edita, ut sunt ferarum nobilium certamina, hastiludia, in opinionem serviunt authoris, velut in *Laurentio Medico* observatum reliquit *Paulus Jovius*, qui in populo, tum apud exteros, æstimationem sibi paravit, magnanimitate expensarum, in honestos circum se

clien-

clientes, in eleemosynas, & oberratorum prompta subsidia, in equestres ludos edendos, in apparatus conviviorum, in colendos literarum Professores, in conquirenda quæ rara alicubi videbantur, quibus ille (verba sunt Jovii) ac præsertim munificentiæ auspiciis, longius famam suam extendit, quàm quisquam alius equalis, vel militari-um armorum fulgore proficeret. Et vitam Magni Consalvi, apud eundem legas, quomodo in aula primum creverit, deinde apud milites, expensarum apparatu valuerit: omnium animos in se rapiendo, splendore pretiosæ togæ, armorum & convictus.

9. Aliquid in tuis aut te ipso mutaturus, non uno ictu præcide, sed lentâ operâ, & quasi aliud agendo. Novitas enim & insperata sedulitas, parit suspicionem.

10. Patrii & antiqui moris, ac eorum quæ populo placent, doce te esse amatorem, & imitorem.

11. Non propere damna, sed lentè, & sæpius dolens, propius ut libenter damnet, qui citò, immò pœnam infliges malis, non ex crudelitate & sævitia puniendi, sed ex æquitate discreta, corrigendo non tollendo. Insigne senatus consultum in gratiam
F 4 damna-

damnatorum factum Romæ. Nè decreta Patrum ante diem decimum in ararium deferrentur, quo Senatui libertas ad pœnitendum esset, & rigor interjectu temporis mitigaretur, idq; vita spatium damnatis ut prorogaretur. (Tacitus 3. Annal.) Hoc olim sancte in Ethnica Roma, Catholica nunc pietas, quid ni plùs requirat? Ante dies quindecim, in delinquentes nè decernatur, non inutilis mora sit, decretaque ut procrastinentur: Justa primo affectu (immò ab ratione) sæpè nobis videntur, quæ posterior dies arguat, si iterum decimoque inquiras, hæc, illavè, falsa, imposita, opinativa, repetita in trutinam vocando, præstat nocentium pœnam differre, quàm (absit præcipitanter) innocentem per errorem damnare. In quem errorem, ipse vix non impegi decernendo, scribo.

12. Nunquam servilis sententiæ, author sis & fautor.

13. Qui urgere negligit, habere non vult, non incipiendo, sed perseverando res habentur. Eò propè collimat Tacitus, Multa ausis, aliqua parte fortunam affore.

14. Serâ experienciâ compertum habeo, eos qui prudentiâ dictorum & consilio

lio valent, rarò utiles factis & exsequendo, dum satis habent ad rem benè gerendam apriè consuluisse, aut à multarum rerum consideratione respectibus laborant, neque periculum sumunt agendi, aut dum aliquid obstat facto, agere dedignantur, quasi impugnare veritatem irati, cujusdam (si dicere licet) *omnipotentie modo*, totum habere volentes, non urgendo, non instando. Aut deniq; fit occulto naturæ arcano, cum aliis rectè consulendi, aliis rectè agendi, urgendique modum dedit, nè fors aliquis supra humana attollatur, sed memor sit, humana necessariò aliquid ex imperfecto habere. Hos quidem censeo, consulendo utiles, verum ad exsequendum, cordatiores alios (qui non verbis, dictisque, sed magis loquuntur factis & rebus) adhibere oportet; seu (ut vulgus ait) subcholicos, activos, non respectivos, quibus si aliquid obstat, non terreri, sed impedita amovere, iterumque conari studeant, non cedere ipsi rebus, sed concedi sibi debere rati. Et Apostolus eandem urgendi necessitatem suggerit, nec tentare modo leviter (quod ex necessitate recti, habendum intendimus) sed instando animosè (non ramen
extra

extra prudentiam) perseverare docet. *Iusta opportunè argue, increpa, obsecra, in omni patientia* & DOCTRINA. Audacia & Activitas, cum Constantia, sunt rectæ executioni ferè parallelæ, multi virtutem incipiendi, rari admodum finiendi aut perficiendi habent.

15. Nemo fidenter rem gerere potest, qui non se majorem crediteo, aut saltem parem, cum quo res intercedit, qui se inferiore habet, timidè aggreditur, ideoque parum ad rem proficit, in tractatu privato, seu in publico, circa materias præsertim bellicas, togatas, ac vel maximè in materia legationum, & commissionum cum exteris.

16. Publicam semper utilitatem & religionem obtende, nè publico usui, utilitatem privatam, antepone videare.

17. Etiam non vestitos, comiter alloquaris, & responde, procul tamen à levitate, & projecta facilitate,

18. Non velis videri, jocularis & dicax.

19. Imbecilliores ad tuam opem (sed ex justo) confugientes, non desertos patiaris, fidam enim operam præstant, vide tamen, nè co sub prætextu, flagitio pollu-

tis, liberum apud te asyllum permittas, & ex eo falsam protegendæ potentiam præsumas, quæ tunc solum vera & gloriosa est, dum virtuti, non vitio patrocinatur.

20. Pro Divinis maximè, & bono zelo certabis.

21. Mutaturus sententiam, dic, utilitati publicæ te studere, non vulgi opinioni.

22. Non sapias ex ore tuo tantùm, sed boni consilii (& dictorum) quod etiam ab alio provenit, sis amicus & fautor, quod est generosi animi, & virtuosæ mentis signum.

23. Qui super alienis prolatis quæstionculis ludunt, verborum deprehensores curiosi, nec acquiescunt rectè dictis, semper aliquid requirendo, aut rem non intelligunt, aut sunt leviculi, aut maligni, aut contentiosi & garruli, aut genio præsumptuosi, aut suprà vulgi ingenium iudicio valent, aut demùm sunt sugillatores stupidi, si igitur quietus animo esse cupis, fuge talium colloquia & convictum, dum enim non finiunt, sed irritant materias, exacerbant personas.

24. In adversis & desperatis, subsidium ab audacia pete.

25. Con-

25. Consanguinitas magnorum cedit in æstimationem, ideò per te, aut tuos, carere quæres.

26. Non rimeris secreta populi (item amicorum) dandum aliquid libertati sentiendi & agendi.

27. Facta arguantur, dicta impunè sunt, etiam si convivalium fabularum diæteris in crimen vocentur.

28. Parvi errores non dissimulandi, nam magnorum causa sunt, à *venialibus facit itur ad mortalia.*

29. Uno tempore multa nè suscipias agenda, non enim perficies, & argueris incepti.

30. Non cogita, quomodo effugias mala, sed quomodo stes fortis, & immotus contra, crescunt si fugias, minuentur dum subsistes, possibilis verò ea ferre tam contemnere, quàm vitare.

31. Defectus aut vitia corporis, tunc fortunæ, immò jacturas omnes, prudente tege, nam læta pariunt reputationem, tristitia contemptum.

32. Monstra aliquo per virtutem facta tuam potentiam, immò & prudentiam, ut innotescas, vel si potentiam monstrare non pote

potes, saltem impotentiam defectusque, occultare studebis, occasiones quæ detegant vitaturus, ut bonam opinionem retineas, veteri monito. *Quod non possimus, nolle videamur.*

33. Probatoria eorum sunt ingenia, circa res privatim publicèque gerendas, qui cum omnia præstare non possint, media bona exsequuntur. Illi verò (licet aliàs optimi Cives) minimè probantur, quibus si non successerint prima, media non arripiendo, per immoderationem animi dedignantur, rebus, sibi que ipsis irati. Facta potius, non quod optimum velis, sed quod melius in defectu mediorum possis, accommodando te ad tempus, mores, occasiones, prout se offerunt, nam optimas occasiones expectando, non assequeris, possibiles verò omittes, nihil præstaturus, pro otioso habendus. Musicorum artem imitari præstat, cum sublimes notas numerosè, cantu assequi non possunt, octavâ aut quintâ (utique) voce vel tertiâ imitantur tonum, modò ne à recto canentium choro, & modulo deflectant, neve concentum turbent. Judiciosi ergò viri, quæque oblata casu, flectere ad consilium, Verum

in consiliis capiendis , illud plerumque nos decipit, quia non quid possit, sed quid fieri debeat, aut necesse habemus, facile eventurum credimus. Et respicimus consulendo, quod contrà est, nam potius quid possit fieri, non quid debeat? prius cogitandum.

34. Alienâ invidiâ diffamare ipsi student, qui detrahentium dicta recensent, apagè cum talibus præcautoribus amicis.

35. Quod tibi servit in æstimationem, potius per te fiat, quàm ut alteri faciendum permittas in Republica, facere pacem, nationes componere, magnas legationes obire, gravia responsa dare, & alia.

36. Imperaturus aliquid novum aut difficile factu, ab iis exequendum incipe, quibus majorem tui observantiam inesse credis, atque metum, ne si ab audaculis primò & contumacioribus exequendum velis, atque illi primis imperatis per temeritatem resistant, etiam modestioribus, pertinaciam reluctandi ingerant. Jam secus quod à modestioribus inceptum, ad se perveniente ordine (ut jam non novum.) exsequentur, etiam qui fecerunt, in executionem instantibus, nè posteriores obsequio videantur,

37. Nulli te facias nimis fodalem. Gauderis minus, sed minus dolebis. Immo turbam hominum [quoad salvâ grâtiâ potes] vitabis, quia præsens, aut necesse imiteris, alios, aut oderis, utrumque autem devitandum est, nè vel similis malis fias, quia multi sunt, nevè inimicus multis, quia tui dissimiles sunt. Verum hoc supra humana ascendens mentis, & est animi DEO se præparantis.

38. Cum omnia possimus, sola credamus licere nobis laudanda.

39. Diu secretus delibera, nè pudori sit, frustra tentasse, citò verò deliberatum fac, nè præveniari.

40. Licet aliqui recti sint Cives, & pro Republica zelosi, plerumque pro impatiente rigore & immoderatione animi, curando aut exprobrando, plus nocent Reipublicæ, quàm ut proficiant. Potius [opinione saltem] videantur sibi bene Cives, quàm ut vitia exprobrando, conscios errorum reddas, ut scienter peccent, cum assuefacti retrahi non possint, vel dum periculorum remedium, ipsa pericula rentur, & periculosius pu-

putant in incepto, quàm in peractò deprehendi. Rectè quidam in Catone, optimo aliàs Cive, moderationem desideravit; & Cicero de eodem. *Cato animo optimo utens, ac summa fide, nocet tamen interdum Reipublica, dicit enim, tanquam in Platonis Politia, non tanquam in Romuli sæpe sententiam.* Si igitur in ea Republica vivatur, quæ depravata sit, inutiliter ad quæque attendere scrupulosus velis, nihil effecturus, quàm ut inutili angore conficiaris, nullo fructu in publicum; ab aliis, si potest, de flectendum, alia ferenda, alia non videnda, ac potius curabis, ut quoquo modo remperes mala & errores, quàm ut toto corpore, te illis opponas, nunquam suffecturus. Noli igitur Catonizare, verùm sæpiùs remittes de rigore, immò & de potestatis Majestate dissimulationique studebis, quod non est infamare auctoritatem regendi, sed & prudentem, simulque bonum, parentem & filios, non Herum & subditos, regendo cogitare.

43. *Nascentis seditionis, tùm audaciæ, Patientia & Modestia, magis est irritamentum, quàm remedium, secùs dùm adoleverit, cauta & mollia, remedii loco magis succedunt.*

42. Providè mature , nè populus rerum necessariarum , ac vel maximè annonæ penuria gravetur.

43. Periculosos conatus, quos non potes avertere agendo, potentia, imperio, manu, vel solvere ratione , eludes commodissimè tempore , differendo , de die in diem trahendo, moras nectendo, impedimenta studiosè obtrudendo , ut interim impetus agendi, quoquo modo sistatur, vis hebetetur, ardor desinat, *qui nisi initio intenditur, aliàs minùs potens. Non sis igitur eger morâ, spei impatiens, periculi quàm mora patientior : Ingratum habens quod tutum, sed ex temeritate spem capiens. Velut argutè quibusdam succensuit Tacitus.*

44. Sis taciturnus, facias potiùs, quàm loquaris.

45. Sta semper verbo , ne fidem factorum dictorumque, in post amittas.

46. In componendis privatim publicèque rebus, dum media non valent, extrema proficiunt , sed tamen non extra metas virtutis.

47. Initia officii seu Magistratus , à magnis rebus tractandis incipe , (quo magnam expectationem factorum facias) sed quæ in te sint perficiendo, nè arguaris.

48. *Viles plerumque, qui nimium (nec tum gravitate) civiles; Et viles, qui nimium faciles.*

49. *Monstra, te à nullo dependere.*

50. *Ludicris rebus & leviusculis, nè occuperis, nè amittas auctoritatem.*

51. *Interdum secedas & secretus sis, hoc enim parit expectationem, quid pariat tuum secretum.*

52. *Cum nullo velis te [ut ajunt] indomesticare, nimia familiaritas parit contemptum, potius fac omnia, velut primum inchoaturus, ex eo gravitatem retinebis.*

53. *Non sis præcipitans aut valdè lentus agendo, illud levitatis, hoc est ignaviæ.*

54. *Quod facis, fac semper exquisitissime, Magis male tentata nocent; quàm nihil gesta.*

55. *Non opineris, sed scias.*

56. *Magna incepta incipe à divino sacrificio, benedictionem Dei, & in vulgus apparatus majorem inceptorum habiturus.*

57. *Non multa fac, sed magna & notabilia.*

58. *Tunc veram tibi inesse potentiam credes, quæ à te ipso sulca etit, non ab alio,*

59. Potentia tuetur authoritatem, idè quærenda in munita domo & milite.

60. Potentia rectius beneficio ostentatur, quàm maleficio, beneficia Regia manus, flagitium coloni unig præstare potest.

61. Virorum literatorum & æstimatorum, tàm domi quàm ab externo, per literas [aut quovis alio modo] notitiam quæte, interdum modicis munusculis, per occasionem eos devincies, quatenus nomen tuum celebrent.

62. Non solum ad mores tuos advertas, sed etiam tuorum, ut honesti sint, gravitatem redoleant, non fastum, immò per omnia modestiam.

63. Malè de te loquentes (immò pessimè tibi volentes) vinces humanitate & affabilitate, velut nescius traductionis, potius, quàm ut te omninò avertas.

64. Non in Civitate, sed propè Civitatem manebis, ut omnibus, conveniendi tui necessitas sit, partim ut commodius honesto utaris secessu, [sine censore] dùm velis.

65. Sine ostentatione monstra, quæ in laudem tibi serviunt, aptè observatum reliquit Historicus in illo Romanorum, *Mutianus quæ dixerat feceratq;*, arte quadam

ostentator. Quæ venustatem rebus non demunt, sed potiùs parant, si aptè accommodentur, familiaritèr fidentèrque (sine ostentatione affectata) agentibus, secùs faciunt personæ theatrales & mutuatae, quæ cum rectum aliquid in præsens egerint, exuunt deindè scenam, citò ad naturam rediturae. Ostentatio igitur modica pro tempore, si fortè vitium sit in *Ethicis*, non certè in *Politicis*, nam famæ parandæ & authoritati conducit, si cum venustate fiat; Postquam aliquis familiaritèr (velut per incuriam) ostentaverit, quod in sui laudem servit, deindè in jocos, & nonnullos ergà seipsum censuras, arte declinet, nam verè, modestiæ titulum affectando nimium per omnia, laudatæque neglectim intermittendo, majore damno occultamus, quod in æstimationem nostri servit, cum non modica famæ parandæ joctura. Nec semper succedat (apud eos præsertim, quibus per exteriora viros metiri & æstimare mos est, velut Samsonis olim, in capitis capillo vires, his effusior in barba, authoritatem magnorum requirentibus) quod Julio Agricolaë (apud Tacit.) nè notabilis celebritate & frequentia occurrentium esset,

esset, vitato amicorum officio, noctu in urbem venit, cultu modicus, sermone facilis, uno aut altero clientum comitatus, adeò, ut plerumq; quibus magnos viros per ambitionem aestimare mos est, viso aspectoque illo, quærerent famam pauci interpretarentur. Et Otho parandæ militari auræ, ante signa pedester, incomptus, famaq; dissimilis. Verùm convenientissimè hic ponatur, quod Gramondus (Histor. Gall. lib. 1.) ait. Principi Sueffionio à plerisque pro revo data, sui aestimatio, ac levis hic rebus viro principi, qui si dotibus animi valet, cur diffiteatur natura donum? Principibus, conscientia virtutis propria, nunquam vitio vertitur, quippe raro in res magnas via est, per sui despectum; Multum interest Principem inter & privatum, ille ad famam omnia dirigit, modicus, quod vitium huic, sæpè illi virtus, quod homini privato superbia, Principi magnanimitas est.

66. Legationis splendore, paratur reputatio apud exteros, magis tamen legatio ponderatur à prudentia viri.

67. Impertinentes tuas actiones amputabis, ut seriis magis attendatur.

68. Novarum machinarum bellicarum,

& aliarum structurarum adinventio , parit æstimationem.

69. Non congregiaris cum eo sæpius, quem majorem te credis, nè authoritas tua ex comparatione vilescat.

70. Academiarum foundationes , aut quod publico servit usui , parandæ servit æstimationi.

71. Ecclesiæ proceres, tibi devinctos habere ; nulla enim re potentius capiuntur aut habentur homines, quam religione, provocabis verò amicitiam , jura & ordinem tuendo, cum iis conversando ; Eleemosynam largiendo , incepturus verò magnum aliquid in Republica , cura primò, Episcopum aliquem [è potentioribus] partium habeas fautorem.

72. Eos nonnunquam negligentius curari oportet, qui tuâ curâ subsistunt, seu sint filii, seu clientes, domestici, seu milites, dum enim ad tuam curam respiciant, negligentes sibi redduntur , & amittunt industriam. Necessarium igitur majori ex parte suæ curæ ut relinquuntur, discantque sibi in parte providere, & acuunt industriam, alienæ curæ non in tantum se committentes , quin plus à sua opera expectent.

73. Nulla munera aut officia, ignaro te distribuuntur, nè alteri, sed tibi beneficium debeatur.

74. Aliquis Vir bonus nobis deligendus, pro exemplari virtutis, ante oculos habendus, imitando.

75. Principi viro, honestius puta offendisse, quàm odisse, hoc mollis ac in seipsum favientis animi, illud utique fortioris altiorisque mentis indicium, malle sibi utique ex alio, quàm de se injuriam vindicare, cave tamen vindictam.

76. Aut rem non tentare oportet, aut si tentas, omnibus viribus quòd instituisti, coneris perficere, nam bis ad eundem lapidem offendi periculosum, & contemptui obnoxium reddit, dùm argueris impotentia, & inconsideratè incepti, nisi alias in cursu operis advertas, te non rectum opus cepisse, tunc verò desistere, utile & gloriosum tibi putabis.

77. Excelsi animi est, nunquam in acerbitates verborum deflectere, factis se vindicabit vir fortis [pro virtute] non verbis.

78. Ad retinendam auctoritatem valet, si habeas penes te viros æstimatos, do-

strina & rerum gerendarum dexteritate valentes. *Et qui in vulgus grati.*

79. Nihil impossibile pete aut impera, neque impossibilis, (exequendo) legis autor sis, cum impossibilitas factum excludat, posse non satisfieri legi, docet, ut primum lex, dein author legis contemnatur. Falluntur ideò, qui parvis delictis, maximas poenas statuunt, aut prohibent fieri, quod difficillimè vitari, aut jubent, quod impossibile fieri potest, nisi in exsequenda lege, in tantum sint (cum rigore) scrupulosi puniendo, atque in ferenda lege, fuere urgendo: Nam si unius poenam intermiseris, reliqui intermitti sperabunt, aut (pro multitudo delinquentium & consensu) immunitatem obtinebunt. Possibilia ideò & tolerabilia petenda, vetanda, jubenda, omni in tractatu, œconomico, bellico, togato, facilius consensus in obsequium, penes possibilitatem.

80. Nemo perfectam habere potest Auctoritatem in Republica, nisi qui togata simul & bellica consilia probè tractat, in curia & in castris, suarum partium aliquos habiturus, ab altero suadendo, ab altero urgendo, & modicè territando potens, qua-

rum duarum rerum maximus in Republica respectus, etiamsi aliquis non terreat, verum quia pro potentia potest, vim necessitatis suadendo audienti adfert.

81. *Ingenia universalia*, raræ gentes, rara pariunt secula, rari ideo sunt, quos suspiciat orbis, aut si sunt, pro magnis habet, nam multum in gentibus possunt; uti habuit Alcibiadem & alios Græcia; Scipionem, Pompejum, Julium Cæsarem Roma; Jam ætate posteriori Hispania, Magnus Consalvum; Polonia Joannem Tarnowskium & Joannem Zamoyskium, itidem magnos, vel certè si toga belloque facta penderes, verè Consalvo majores (sed pro ut nostra septentrionalia, ab oculis altioris Europæ, etiam à scientia tùm admiratione remota, præsertim cùm nostros scriptores, pro negligentia aut pro modestia, talia orbi propalare ad posteritatis admirationem piget) dicendo facundos, simulque agendo promptos & potentes, privatim bonos facultatum & economos, Togâ & Sago per omnia rerum momenta (*incipiendo & finiendo*) expeditos, nec levi ex respectu de sententia mobiles, publica privatis anteponentes, *suorum æque ac aliorum*

rectè consiliornm , non superbos sectatores,
amicitias parare scientes , domi & foris
in omni apparatu & convictu magnificos,
sententiâ in toga graves , simul præte-
rita , instantia , futura , consilio pensan-
tes , fortes in bello Duces , acquirendo
& retinendo , aut cunctando vincere,
aut dum ex re oportuit , committere præ-
lia promptos , per statarias pugnas , veli-
tationes , campo & expugnandis ex arte
urbibus expeditos , ad commoda ex ho-
stium erroribus capienda vigilantes , mili-
tari disciplinæ severos exactores , exter-
norum societates parare gnaros , gravita-
tem in omni actione servare scientes , &
simul [ut ait ille] *comitate & alloquiis*
officia provocantes. Patriæ morum &
institutorum tenaces , quod verò sum-
mum & maximum , actione non insolentes
; sed cives pacatos , non aspernantes
æqualitatis , iustos , pios , zelosos Divi-
norum cultores , simul & propugnatores ,
denum [Velleji dicam verbis] viros in
tantum laudandos , in quantum virtus in-
telligi potest. Qui in vita sua nisi lau-
dandum aut fecerunt , aut dixerunt , aut
fenserunt. Quisquis alias te magnum ven-
ditas,

ditas, si tibi unicum horum deest, extra universale ingenium, & extra magnorum famam positus; aliqua in parte virtutis politicæ poteris esse perfectus; sed non universim agendo magnus unius partis in virtute, non omnium.

82. Nonnulla sunt ingenia, quæ nisi in magnis negotiis se explicare possunt, & potenter agunt, in parvis [dum contemnunt, vel angustos limites agendi habent] velut victa, & nihil valentia impingunt, implicantur; ut sæpè cum magna fecerint alias, in parvis arguantur, cum æmulantur naturam magnorum navigiorum, quæ super altum mare triumphant, & fluctus contemnunt, in portu aut in lacunis, velut nihil profutura, hærent, ut à parvis Myoparonibus præternavigantibus illudantur, illudendi ipsi, nisi essent in parvo, alias agere impotentes. Immo communiter fit, ut parva negotia, magnis ingeniis plus difficultatis adferant, confundendo verius sua parvitate, quam ut suprà vires sint, dum sunt similia tens ferarum retibus, quæ Trigides Leonesque capiunt, non quia ligant, sed quia implicant, & molliter involvunt,
impē-

impediendo verius, quàm vinciendo. Adam adhuc; Judiciosos viros, breviloquio plerumq; & modestè gaudere, ut audaculis sciolisq; (dum in consulendo, multa loquacitate obstrepunt affectatè, & suffurata apud vulgus Principemq; autoritate substruuntur) cedere quodammodo, velut inferiores aut inscii videantur, nam sunt *decernendo* (seu asserendo, vel censendo) quàm *disquirendo aptiores*, & pondus rei pensant, non sonum, ratiocinationum superfluarum sunt nauseatores, nec in mediis dubiorum hærere amant, cum recti iudicii indulgentiâ, sine flexuosis sinuosisque indaginibus, scopum ipsum rerum, promptè probèque vident; vel ut clariùs dicam, magis *positivo* & practico, quàm *scholastico* aut speculativo sensu, abundantes.

83. Nec illa ingenia omittenda, quæ tum nisi potenter, zelosè, aut secùs levi passu rem aggrediuntur & agunt, prout irritantur vel non, aut privatus respectus illis adest, alia tentant modò leviter, dein negligunt, dùm evenit, velut ursis, quibus nisi exagitatis, maxima vis adest. Exindè sic agere, non est ex virtute, sed magis pro impetu, pro aspectu, & pro animi passione,

sione, prout in nobis hæc aut illa irritatur, & invalescit. Talia ingenia commodissime maligna vocaveris, aut privatipeta, aut passionata, aut communiore titulo, *Affectata*.

84. Misce ut partim quæras amicitiam, partim tua quærat, ut acquirere eam, non emendicare, aut profusa submissione vel curâ, emercari videare; Ingrediaris potius, non irruas in amicitiam, affectatè.

85. Si tibi amicus aut cliens in uno non satisfecit, aut ad palatum non accessit, potius similes occasiones vita, non verò statim per omnia desere, aut abjice, in rem enim aliam, poterit esse utilis, nam perfectæ virtutis hominem, quo in orbe quæras aut invenias? ad rem meam Divus scriptor. *Non indignabundus feras aliorum defectus, quia & tu multa habes, quæ ab alia oportet tolerari, si non potes talem te facere, qualem vis, quomodo poteris alium habere ad tuum beneplacitum? libenter habemus alios perfectos, & tamen proprios non emendamus defectus, volumus quòd alii strictè corrigantur, ipsi tamen corrigi nolumus, displicet larga aliorum licentia, nobis tamen nolumus negari, quod petimus, alios restringi*
per

per statuta volumus, & ipsi nullatenus patimur cohiberi; Omnia potius omnibus patces, tibi nihil.

86. Neminem lauda aut vitupera absentem, pejora enim illi de te narrabuntur, immò non fac in præsentia, laudatum superbum reddes, vituperatum aut reprehensum, per rigorem amittes amicum, cum te Censorem magis agnoscat, quàm familiarem.

87. Sed tamen vituperatum defende magis, quàm ut assentiaris, de se quisq; expectaturus, quod facis de alio in præsentia.

88. Alloquendo, quærendo, consilium petendo lentus sis, nec quasi sedulus, nè omnia tribuisse amico videre, & condemnaris, quasi nihil per te valiturus, potius quandoque in tempus sepone, non tamen diu neglige in pretium amicitiae.

89. Reprehendendum amicum privatim admone honestè, sæpius verò, quasi nescius dissimula, pro amicitiae libertate.

90. Partim locum superiorem da, partim tibi cape, parem te teneas, non inferiores, aut supra.

91. Jocos vita, qui levitatem pariunt, sed tamen affabilitate sovetur amicitia.

Fal-

Falluntur, qui sub nomine affabilitatis, licentiosis diâteris, *æquivocationibus morosis*, tûm verborum affectatis argutiis, factorum, jucundorumque famam parare sibi cupiunt, dûm potius scurrarum, cavillatorumque titulum merentur, DEUM-que offendunt, utendum erit jocis, sed qui non perpetui sint, verûm per incuriam velut attracti, condimenta sermonis & obsonia, non perpétuus ad nauscam paſtus, nè vice solatii, fastidium pariant, præsertim dûm in jocando, aliqua pars odio digna habeatur. Jocus sit, sine scommate, sine alterius damno, sine dolore, sine levitate, secûs non jocus erit, verûm exacerbatio contentioque studiosa.

92. Si offensus sis, reprehende, aut patum te averte, post objice sponte occasionem, amicitia, & facilitatem, aut per alium insinua, ne difficultate reconciliandi, avertas amicum, & amicitiam suffoces.

93. Familiaribus aut intimis alicujus, per te aut tuos innotesce, da bona verba eorum, de eo, quem amicum credis.

94. Juva omnimodè afflictum amicum
ut benè illi tecum esse videare.

95. Plures amicos quære, doce te
res habere posse, dùm velis, neque tibi
sit, uni alligari.

96. Cura, ut majus pretium in am
sit tuæ amicitiae, quàm in te amici,
monstra dùm potes juvando, consulendo
plùs illi tecum interesse, quàm tibi cu
illo.

97. Non admitte superbam censuram
amici, nè superiorem agnoscas, etiam
ipse noli censurare, nimius rigor suffoc
libertas sentiendi, faciendique fovet am
icitiam.

98. Potius apertum inimicum malè
quàm dissimulanter amicum, ab eo pro
videre potes, ab hoc vix caveas, sed h
inter pares: verè dictum, *Arma aperta
lam vites, fraus & dolus occulta, eoq;
evitabilia*. Malis tamen utique, alteri
dissimulanter amicus, quàm apertè hostis
specie amicitiae, multis superior esse pot
& injurias illatas, honesto prætectu atq;
occasione coërce, (sed intra metas vir
tis) aperta hostilitas similem ab adve
provocat, plerumq; studio prævenien
periculosam.

99. Cave ne in quenquam conferas beneficium, quod cum alterius injuria conjunctum, non enim taliter mereberis de illius amicitia, quàm hujus provocabis in te odium.

100. Nunquam (quoad tute & prudenter poteris) contemptum tui donabis, etiam amicissimo, statim responde, vanum ea in parte *discretionis nomen*, levior jactura amicitiae, quam existimationis, illa reparatur, hæc nunquam, amissa, sed tamen fac, modicè reprehendendo injuriam illatam, non verò acerbius vindicando.

101. Non verò ad quamlibet injuriam amici emovearis, quæ per inanimadvertiam illata, eo casu illatam quasi non intelligere debes, scio quidem, moderationem istam animi, non omnibus esse probatam, qui præsertim putant, nullam injuriam sine sensu transmittendam, metu ne si *vererem injuriam feras, invites novam*, verùm tales, cum reddere formidabiles se cupiunt, hoc simul efficiunt, ut nemo cum illis habere commercium velit, cum enim labi, prona gens mortales simus, & subinde affectu, seu incogitantia abripiamur, quisque metu offensæ, istos odi tam properos

peros tenacesque fugiet, ceu bestias feroces, solitudini relinquens suæ. Sed tamen injurias per petulantiam insultandoque factas; extemplo cum fiunt, coercendas puto, non ultionis studio, sed castigando, ut in posterum modestius in te, & in alios se gerant, neque in te ipsum postea eò facilius peccetur, quasi ex facili omnia toleraturum.

102. Nunquam amico aut inimico [quod loco magni consilii habe] aliquid de te acerbius dictum factumque exprobra, sed quasi nescias.

103. In evitandis mutuis injuriis, aut retorquendis acerbitatibus, imitare prudentes digladiatores, qui concurrento, non semper oppositu armorum, adversum ictum retundere opus habent, sed aptè corpus suum in partem declinando, aut humiliando, aut contrahendo, vulnere subtrahunt, & vitant, ut illud suæ fortitudinis, sic non dedecori, sed arti tribuendo. Tu quoque haud prudenter facias, si cuique acerbitati, auctoritatem opponere, &

in periculum dare velis , potius te ab injuria recipienda declinabis , aut receptam velut nesciens , aut (cedendo fortunæ) medius inter dissimulantem , humiliter feres , condonando fragilitati , aut antiquæ amicitiae , aut inanimadvertentiæ , aut tempori , aut occasione , immò ipse tibi , nè , dum retundere vis , nec tamen possis , eò majus vilipendium in posterum patiaris. Nonnullorum verò sociorum est natura , quos velut duros filices , molli subiecto pulvillo comminuas , & in rem , prout velis , aptes , durius exceptos , haud contundas , sic illos , facilius nunquam humanitate , quàm oppositu austeræ gravitatis devincias , prout alterutrum succedit , in rem dextrè accommodaturus. Aptissimè in rem [sparsum] Seneca. *Aus potentior te , aut impotentior lasit , si imbecillior ? parce illi , si potentior ? tibi ; prudentiori cedamus , stultiori remittamus. Amicus est ? fecit quod voluit ; inimicus ? fecit quod debuit , multos absolvemus , si coeperimus ante judicare*

care quàm irasci. Nonnulli seipsos volentes inquietant, dum interpretatione quadam eò perducunt, ut videantur esse injurie, cum non sint, immò quosdam dum vana concitaverint, irascendo perseverant, & causas offensarum spontè à longè petunt, (immò imponunt) ne videantur cœpisse sine causa. Multa nos injurie transeunt, ex quibus plerumq; non accepit, qui nescit. Non vis esse iracundus, non sis curiosus.

104. Meliorem esse surreptorem administrum, modò prudentem dextrumq; agendo, quàm inertem, licet aliàs fidelem; potiora ut auferat, ruborem utique ille habet, hic totum pessumdat per inertiam. Rem certam dico ab experientia.

105. Præmiis retinetur amicitia, verùm præmia bis sunt dulcia, dum promittuntur, aut cum dantur; promitte tu prius, postea interjecto tempore dare poteris, benè ait ille: *Diu desiderata, dulcius obtinentur, citò data vilescunt.*

106. Pueris fæminisvè quæstus, viris actio convenit, aut saltem dissimulatio.

107. Prout ingenium nostrum, in hanc aut illam, recti pravamque partem naturaliter inclinatur, hæc aut illa exempla,

tum

tum consilia, promptius sequimur, aut fugimus, ut velut lupum auribus tenere, tum aquæ characteres imprimi contendas; sic quosdam in hoc illudque inducere contra genium naturalem, frustra enitaris, flectuntur in tempus, sed non transferuntur, nec franguntur, dum velut in Scena, mutuatam pro tempore personam, diu sustinere non possunt, citò ad naturam redituri *Vulpem pilum mutare, non mores.* Consilia magnanimitatis, generosæque mentis conatus, si meticulosus suggeras, promptius illis (dum timent) exempla dissimulationis, in speciem cautorum & modestiæ amplectuntur. *Parcis* tenacibusque, Munificentiam, utiles erogationes, splendidos pro authoritate apparatus, suadere frustra studeas, sed rationes turpis parsimonix, sub velamine inutilis prodigalitatis, & decoctionis bonorum, promptius illi sequuntur. Deinde *Trucibus ingeniis.* Clementiam, humanioraque quid proponas frustra? cum illi in severitatem nimiam, importunumque rigorem, sub imagine justitiæ, & correctionis malorum, proniores. *Lenta,* cautaque dein *temerariis,* suggeras parvo effectui, dum in

H

argu-

argumentum audaciæ constantisque animi, incautè, præcipitanter, inconsideratè, periculis se committunt, malè cœptis perstunt, *errant, non provident.* Avaris quæstuosisque ingeniis, *recti honestiq; legem* (ut ad famam præcipua rerum dirigant) non persuadeas, cum sub velo civilis accepti, licitorum, tum necessitatis, in illicitos quæstus devolvuntur, cum decipiunt ipsi, non deceptos se tunc ajunt, astutiam (ad injuriam virtutis) prudentiam agendi & cautionem vocantes, vel demum prout natura hominum in hanc illamque virtutem aut vitia, propior est, facilius aut secus difficulter, inducimur & suademur. [vide notationes meas Politicas puncto XII.]

108. Circumspecti cautiq; viri per omnia, magnis rebus gerendis valent, nam lenta & provida; summæ rei proficiunt, verùm negotiis minoribus, aptiores, qui nimia consideratione non laborant, quæ sæpius obest, aliqua enim impetu & sorte promptius habentur, nec [si hoc illudvè curiosè circumspicias] quod in rem est, assequare. Dubitatio

tatio de eventu [ex nimia consideratione] plerumque animum involverè amat , opinione periculi , & diffidere facit , illud modo considerandum , nè quod intendis , contra rationem sit , contra famam recti , & contra conscientiam.

109. Dandæ consolationis , tum componendorum animorum , non melior ratio , quàm fateri justum patientis [sit animi , aut fortunæ , sit corporis] dolorem , dein adhibere dextrè lenimenta ex casu humanorum , & instabilitate fortunæ , quæ eodem passu vadere nescit , esse causas doloris , nec deesse remediū , tum solatii. Animi dolorem interpretatione quandoque majorem reddi , corporis morbos tum fortunæ casus , augeri longa imaginatione , aut nonnunquam sola opinione , verum ad melius consilium , præsertim verò ad *Divina* , & nostri justam pro demerito pœnam , sæpè revocandus animus. Qui secus componendis acerbitatibus in it doloribus , remedium putant , negare justam causam doloris , falluntur ; nam sic directè pugnant in affectum

patientis, velut mollitici aut iudicii cum arguendo, nec idcò sanant morbum. verum, (contraveniendo) in majus irritant animum. Potius ingenuè fatendum, *justam doloris tum offensa subesse causam*, sed modum habendum. Atque sic est rectè condoluisse, simulque probum se amicum profiteri velle, dùm eadem lance dolores, quâ ille ipse qui dolet (nec levitè contempnimque) pensamus. Concedendum nonnihil ægitudini animi, & præconceptræ opinioni, ut juvisse infirmitatem dolentis, compatiendo, non impugnasse studiosè immo condemnare [*dùm non pro dolentis parte loquimur*] videamur. Laudo peritiam aut argutiam, medici cujusdam Poloni, cùm in ægrum nobilem incidisset, diutino capitis dolore agitatum, ex eoque insana imaginatione proVectum, ut sonum campanæ, dein campanam in cerebro sibi enatam obfirmatus animo asseveraret, negantibus possibilitatem morbi alius medicorum, & ægrum insanix arguentibus, corporis simul & animi dolorem auxerunt. verum ille argutior, reliquis abire jussis, velut medendi inertiam exprobraturus, indignabundus, novitati morbi longa oratione

tionem condoluit, promptitudinem curandi simul offerens. Interim æger, assentiri medico, prehensare salutis patronum, simul fidenter, animum & corpus [superaddita pingui satis curationis mercede] offerre curandum. Exinde medicus, opinioni patientis nonnihil indulgens, comparatâ subtilissimâ artificiorum modicâ nola, vomitorias potiones ordinavit, tum vomentis caput, in speciem compatiens sustentas, supposita pelvi, nolam manu apertissimè occultatam, cum sonitu cadere fecit, vomitu velut è cerebro provocatam, ut imaginationis insolentiam simul & morbum, novæ artis commento, demeret ægrotanti. *Sapè dolemus aut offendimur, quia offendi nos putamus.*

110. In omni actione dubia, mavis in eam partem peccare, quæ utique corrigibilis, quàm quæ corrigi neutiquam potest, aut saltem in eam, quæ minus damni, dubiorumque habet. Vetus dictum, *Inter duo mala minus eligendum.*

111. Quæ non potestato conservare aut assequi, licitis artibus contentione, litigii, fortioris manus, interpositis dextris amicis & agendi autoritate, adipisci con-

beris, mediationis, & securæ honestæque pacis artibus; deindè protractione, dissimulatione, meliore occasione, & [res sensim emolliendo, perficies in melius, morâ, vel saltem ad laborabis, ut in majus nocendi tibi; media, & potestatem, alteri parti quoquomodo prior auferas, audax, cautus, & prudens. Artibus pacis, rem dùm aggredieris, semper habes in potestate, ad artes rixarum bellicque ut pro commoditate [dùm velis] recurras, secus in contentionis campum, dùm temerè te dederis, extra potestatem jam erit [sed nisi pro arbitrio fortunæ] pax & quies ut statuatur, æris profusio, periculaque ut vitentur. Per omnia igitur, prima sit tibi, artium mediationis; (quoad supersunt) *Pacis* id est cura, rixa, partiumque collisio, semper sint ultima, & ex summa necessitate. *Velut in militaribus meis, qua propè diem fero, artes pacis, belliq, fusiùs dabuntur,*



Pars Quarta

POLITICO-MORALIUM.

1.

NUnquam proba vires, & armorum exercitia etiam lacesitus non exerce, videaris tamen exercitatus; ad retinendam opinionem scitæ dexteritatis.

2. Non verbo contende aut disputa, sed quod sentis; sine affectu narra.

3. Cum iis non contende, neque move litem, quibus potentia impar es.

4. Ciceronis præcepto. *Amicitia quæ non placent, dissuenda magis, quam dicenda, quasi dictum velit, ut lentè seponas amicitiam, & ab illa dislucescas, quàm ut contemptim abjicias, illo enim modo, saltem cessabit amicitia, hoc verò parabitur inimicitia, ex contemptu sui, per præcipitem aversionem; Non statim igitur mutabis stylum amicitia, ut saltem familiaritates sint sepositæ, non inimicitia susceptæ.*

5. Si vera alicui loqueris, dic neque te pro conscientia dicere aliter, neque illum aliter facere posse, obtende pericula, ni fiat, malle te ve-

H 4

ritate

ritate [cum salute amici] displicere, quam placere assentatione cum periculo; libertatem interim sequendi [velit nolitive] propone.

6. Non statim petitis aut intercessioni amici annue, etiam assensurus, deliberaturum te ai, ne ille sibi totum te vendicet, & facilitate amittas authoritatem, aut dependentiam [ut ajunt] agnoscas, gratius item venit beneficium à deliberante, quasi non à levitate, profectum, sed à ratione.

7. Non unum amicum in consilium voca, sed plures, nè uni tribuisse & te credidisse totum [quo superbum reddas] videre, aliquando studiò præteri.

8. Talia loquere coram amico & cliente, quæ divulgata, pudorem aut metum non incutiant, verè ait ille, *Ita amicum habes, ut fieri inimicum putes.*

9. Nunquam totalem tui fiduciam habes, sed verearis potius, in secunda fortuna amicos parabis, in adversis pro subsidio habiturus.

10. Nunquam te aliter amico uni credes, ut partem securitatis, aliundè tibi non relinquo.

11. Multis ex similitudine morum est ami-

amicitia, sed hanc circa honesta quæ-
res.

12. Adversarii aut hostis, diversa sunt
nomina. *Adversarius* vitio nostro nobis
adversatur. *Hostis suo*, ut adversarium vi-
tes, te corrige, ut hostem amoveas, illum
corripere oportet.

13. Pileo & comitate, multi parantur
amici, & facilitate aditus, *vili emitur*,
qui pileo & familiare verbo emitur. Mauri-
cii Auriaci Principis dictum.

14. Facetis abstine, quæ ubi multum
ex vero traxerint; acrem sui memoriam
apud amicum relinquunt, sed tamen in ser-
mone, nimium intensa verborum severi-
tas, aut triste supercilium vitandum, quod
loco gravitatis, nomen morositatis aut
superbiæ parit, nisi civili honestaque co-
mitate utaris.

15. Non omnium quandoque rerum
scientem te simula, agendo otioso simil-
imus.

16. Antequam aliquid promittas, co-
gita impedimenta quæ occurrere possint,
an difficile sit præstatu? an sine tui alte-
riusvè fastidio fiat? nè post poeniteat pro-
missi.

17. Non

17. Non sis properans in delectu amicorum , nec statim ac affectus ducit , intimum pectus aperi , lucteris cum affectu volenti , vide prius , an virtuosus , an constans ; an taciturnus sit , *an tuus , non tua fortuna amicus*. Sunt quidam simulatae virtutis [quæ omni malitia deterior] facie non animo boni , habitu & ore [Taciti utar verbis] ad exprimendam imaginem honesti , exerciti , cæterum animo perfidiosi , & subdoli , avaritiam & libidinem occultantes. Politicè & ingeniosè nequam ; qui eò prodigaliter amicitiam obligant , quò magis violant , quærunt amicitiam , sed quam ad suum commodum referant , quæ aliàs inter bonos , reciproca probatur , nihil debere se aliis , sed ex superbia debere sibi totum rati , colloquuntur familiarius , sed venena tantum exsugunt verborum , conversantur ; sed qui nisi reprehendendum vident , cum totum damnare non possunt , nævum studiose quærunt , aut per malitiam adstruunt bonorum factorum cæci aut obliviosissimi , detrahendi tantum memores ,

nun-

iniquam minus amici, quam cum amicitiam ostendant, sub specie amicitiae, quemque facile invadentes, & quibus irascatur, exemplar bonae virtutis Cato, non se tutò credat. Quidni tales fugias? aut saltem probes prius, nisi sapiant venena melle uncta, ut minore damno feras titulum solitarii, melancholici, vel (si familiaritatem vites) fastuosi, quam ut familiare & intimum petus aperire velis, procul tamen à nota vitantis.

18. Aliorum exemplo metiaris amicum, si alteri fidus erat, si non decepit, si aliorum famam rectè coram tractat, prope est, ut idem tecum sit.

19. Parùm Melancholici, in amicitiam deligendi, modica Melancholia propius constantiam est, effusa lætitia propè levitatem; sed plerumque falso nomine Melancholiam nuncupamus, dum potius gravitas morum vocanda, aut sit licet illa, prudentibus viris, per honestas actiones velle illam, in potestate semper est.

est, præsertim dùm. adhibentur in amœnitatem convictus, amici & faceti convictu clientes, verba & sermocinationes, in materia gravi, seu circa privata, convivæ, musica, lattrunculorum & chartarum lusus, histriones scenici, deambulatio nemorum, hortorum, aut vectatio, balnea, navigatio, venatio, equitatio, hastiludia, jaculationes arcuum, scloporum, tormentorum ad metam collimatio, res œconomica, architectura palatiorum & fortaltiorum, tùm modicus secessus, *causâ pietatis*, vel prætextu expediendorum negotiorum publicorum, in quam rem serviunt domorum abdita triclinia, & recessus, demùm lectio librorum, præsertim verò Historiæ, si ad Geographicas tabulas reducat, tùm Geometria practica, distrahunt otiosum tempus, nec leviter recreant animum. Insuper [idque maximum] temporis justa divisio, in singula negotia, tam seria, quàm quæ ad amœnitatem convictus, fallunt diem, & Melancholiam pellunt.

20. Qui necessitate ad amicitiam tuam compulsi, ab aliis repulsi, aut à te commoda sperant, illi haud durabiles in amicitia,

vide

vide ergò, ut spontè amici fiant, non ab alio respectu, sed tamen *occasione* nobis sæpè parat amicos.

21. Pares tibi in moribus quæres amicos, si sapias. Ex dissimilitudine morum, non solum disjungitur amicitia, sed nova paratur offensa; Quid cum amico convenias? Si tu melancholicus, ille hilaris, tu domesticus vel solitarius, aut affectatâ gravitate stoicus, ille liberalior, publicam lucem amans, tu de libris, ille de equo, arcu, bello loquens, dùm veretur quisque, ne multa ingrata, tristia minusque popularia, aut necesse ferenda in te, aut imitanda sint; igitur penitus [& sine complacentia] naturam revolve prius; verè definit amicitiam ille, *ut sit mutua ac benevola, animorum sibi similium, in bono, consensio*. Raros exindè videas in orbe veros amicos, licet multos habeant ad convictum *Sodales*.

22. Si in familiaritatem incurrant homines audaculi, verbo & joco impetuosius, ac propè importunitatem, ferè eandem faciem induc, jocum joco solve, media tamen cum gravitate, & acceptam acerbiter diffimula, vitaturus posthæc congest-

gressum [verum procul à nota vitantis]
nulla enim re magis in levitatem incurres,
quàm à talium familiaritate sociorum.

23. Si in Magistratu tibi posito, morosi
aut importuni allocutores occurrant, que-
rulando, petendo, multa garriendo, utique
non acerbè, loquentes excipies, sed mode-
stè [morositatem eludendo] respondebis,
rem esse tanti momenti, quæ in aliud tem-
pus differatur, commodius audienda, no-
stri partem interim, cæteris quoque audi-
endis deberi. Absit vero, ut aliquem, effu-
sis pollicitationibus trahas vel ludifices,
modestè potius comiterque excusabis, non
facturus, quàm ut mentiaris, eò plus odii
& levitatis postea paraturus, quò magis
placere voluisti, inanium pollicitator, undè
simul impotentiam tuam prodas, dum
præstare promissa non poteris.

24. Graviore sæpè succrescunt offen-
sæ, post reconciliationem, si dissimulanter
reconciliaberis, præstat quandoque amici-
tiam in tempus differre, ut interim omnis
materia offensarum, amoveatur.

25. Importuna excusatio, est accusatio
sui, vel alterius opportunissima.

26. In-

26. Intimo amicorum, immò neque uxori, secreta Reipublicæ revelanda.

27. Sint tibi certi dies, quibus cum domesticis clientibus liberior colloquaris, nec asperneris quandoque hilariorem [*media cum gravitate*] convictum, nam illa tristis sui Heri, perpetuaque observantia, alienat per modica domesticorum affectus, ut levius quandoque ducant, non munerari, quàm negligentius præteriri, præsertim illi generosioris mentis, quos tenacius per humanitatem habeas, quàm profusa liberalitate [*in cætera superbus*] pares. Non clientum modò, verùm sanguine junctorum, bonos ergà te parabis affectus, & arte quadam humanitatis retinebis, medius tamen inter elatam gravitatem, interque [*ad obsonii raritatem*] familiaritatem effusam, nam secus si oderint, acerrima sunt proximorum odia, maximèque *inimici hominis, domestici ejus*. [Matth. Cap. V.]

28. Mordaces alicujus [*vel populi*] sermones, non magnâ vehementiâ, sed ingeniosè refutare, vel potius per jocum, aut tacendo, eludere debes.

29. Commissurus aliquid tractandum alicui, causam non refer, verùm seriò in-

junge, & polce operam; vel si refers rationem, non tuum privatum commodum sapiat, sed publicum, ac proindè exsequentiis, quò libentiùs commissum exsequatur.

30. In gerendis negotiis, utilior est opera eorum, qui ad tuam opem & liberalitatem respiciunt, quàm qui beneficiis jam à te onerati, ideò quodcunque aggrederis opus, & socios perficiendæ rei quæris, fac eos aliquid utilitatis exindè sperare.

31. Non semper secretus sis, sed aliquando popularis, parandis amicis, sine quibus nihil præstatur. Non habeas verò amicos, qui non quæris, quæruntur, non quærunt. Immò quærunt popularem.

32. Mordebis neminem ore, calamo, vultu, accusabis neminem, sed potius modicè laudabis quemque pro merito virtutis, non velut ille (apud Tacit.) *Optimum quemq; iurgio laceffens, & respondentis reticens, ut pavida ingenia solent.*

33. Ea occulta vis linguæ & verbis inest, ut seu amando, seu offendendo,
plus

plus in animis hominum posse verba, quàm facta, re ipsa experiare, ideoque gravius maledictis, quàm malefactis exacerbamur, & difficilius contumeliam perferimus, quàm damnum, malefacta dolorem, maledicta contemptum nostri ingerunt, qui altius ferit, quàm dolor, nam in animum intimum pugnat, & in mentem, ille in corpus tantum, aut quod est circa. Tum è converso, gratiora sunt generosis pectoribus benedicta, quàm benè data, ut ferè inter omnes actiones (si amicos parare cupis) in verba prius quàm in facta [& linguæ magis, quàm manuum operationes, nam lingua altius quàm gladius ferit] intentus esse debeas, seu quid acerbi, seu quid grati, auribus & animis hominum efferas, quæ est honesta ad capiendos hominum animos fallacia; rectè ait quidam: Lingua modica pars corporis navium gubernaculo similis, in cujus parvulo moru, totius navigii regimen, immò salus & interitus vertitur. Minore utique impensa obveniet, multa benè dixisse, quàm multa dedisse: Verum si utrumque rectè adhibeas,

beas, pluribus felix eris amicis. Adde, acerbè facta vim inferunt, atque idèò terrent simul offendendo, ut necesse metum cuiusdam venerationis, seu respectum sui incutiant, acerbè dicta, dùm inermi-ter exacerbant veriùs, quàm offendunt, odium non terrorem movent, ac proinde inermis iræ contemptum, tùm indignationem apud audientem pariunt, cum audacia maiore in ultionem. Sic Germanos olim terrebant Romanorum arma, & officii admonebant simul, postquam verò sub *Quintilio Varo*, ab armis, ad inermem verborum conflictum, & litigiosa ventum jurgia, quasi ad reliquam injuriam id summum adjiceretur, implacabiles idèò facti, nec æstimatis amplius legionibus Romanis, eas oppressere. Ait Florus (lib. IV.) *Germani postquam tristes togas, & leviora armis jura viderunt, duce Arminio, arma corripunt, &c. Vnius causarum patroni, os sutum, recta priùs linguâ, quam in manu tenens Barbarus. Tandem (inquit) vitæ, sibilare desine.* Ferdinando Arragonio Regi Neapolitano, secùs, non majus argumentum fuit Neapolim recuperandi, quàm cum accedente ad urbem victore.

Carolo VIII. Galliae Rege, publicè valedicturus Neapolitanis (Gallorum partes apertè secutis) suavisissima eos Oratione allocutus, ut ejus sermonis, ob idq; æquioris animi memoriâ, postea desiderium in Neapolitanis excitaretur, Ferdinandi revocandi, Gallo relicto, à cujus Præfectis, inhumanus tractabantur [*Franciscus Guicciardinus. Histor. lib. I.*] Sic præstat, etiam erga nos malè affectis (quos punire aut cohibere non possis) bona verba dare, penes moderationem animi, quàm pro impetu asperius tractatos, in majus exacerbare, nullo in rem tuam commodo. Præterea in sermonibus *Non semper* (ut Didaci Savædræ ad plenam loci doctrinam per diversa casuum, monitum includam) *formulis alloquiorum ordinariis & generalibus responsis utendum*, hæc enim cùm dantur omnibus, satisfaciunt nemini, nec parùm affligit incontinentem animum, si responderi sibi videat, quod norat iam ante, quodve prius etiam, quàm proferretur, ad supplicis aures pervenerat. Nec semper audiat Princeps, roges interdum, nam qui non sciscitatur, de re plenè cognoscere non potest. Inquirendum igitur, ut status causa penitus perspiciatur.

Justè succensitum olim Vitellio, qui brevè auditu, quàmvis magna transibat, imparcursu gravioribus.

34. Non minùs prudentis est viri, scire quid dicat, quàm quid taceat, sæpè [importunè prolato verbo] multa benè incepta, in adversum ivere, præsertim si effecatur, quod suam partem ab aliqua conjectura prodere, adversam verò præcavere, aut temeritatem provocare possit, rectè *Æmilius Probus*. Opportunè tacere, non minoris est prudentiæ, quàm diseritè loqui. Eorum præsertim, qui alto honoris gradu subsistunt, sunt *Alata verba*, amant facilè in vulgus deferri, ut præstet, opportuna quandoque tacere, quàm obliquoas *Cortesaneorum* interpretationes expectari.

35. Titulos inusitados sperne, oblatos modicè excusa, nam sunt propè invidiam.

36. Indicaturus lites, nihil profer præter decretum, nè affectus pro altera parte colligi possit, quod erit extra invidiam. *Exiit personam judicis, quicquid amici induit.*

37. Si aliquid detrahunt tibi homines, erige potius animum, sciens, æmulam magnò-

magnorum esse invidiam, meliorem esse utiq;
acerbam invidiam omni amica commiseratione, sed vide, ut intra metas virtutis hæc habeas.

38. Contemne linguarum calamarumque vulnera, & vinces, nullum illa lædunt, nisi volentem, verum is contemptus ex animi generositate & conscientia propriæ virtutis, non ab ignavia proveniat, velut de Nerone Suetonius. *Nihil eum patientius quàm malè dicta & convicia hominum tulisse, vel contemptu omnis infamia, vel nè fatendo dolorem, irritaret in peius ingenia* Sic ferè incorrigibiles dum sumus, objecta flagitia, non pudoris, sed joci loco habemus, unicum nonnullorum studium malè agere, dein factum excusare: *Impius cum in profundum venerit, contemnit. Latantur cum malè fecerint, & exultant in rebus pessimis.* (Proverb.)

39. Cedendum aliquando furori populi, quàm obsistendum, tacendo multa diluuntur.

40. Vide, r'è alium statum quàm populus tenet & amat, spirare videare, ideòq; commodis populi studere te monstra, juvando loquentes, in adversis compatiendo.

41. Etiam aliquando infra genus tuum te abjice, nec mensam populi fuge & convivium, de Augusto Tacitus. *Populare credidis misceri voluptatibus vulgi.*

42. Liberalē te præbe, rebus non potes? nemo verbis pauper est; nemo tristis à te recedat, nulli tristem faciem, & rugosam frōtem monstra, etiam ex justo negaturus.

43. Avaritia & parcitas, egregiè factis (ac proinde bonæ famæ) obstant, non amicitias Civium pares, non Clientes habeas, non servitium publicum, pace aut bello probè tractes, quin aliquid erogare necesse habeas, quod parcè erogantibus, quò gravius fit, cò remotius à bona fama absunt, immo re ipsa malā habent, ferè cò collimat dictum: *Qui parcè seminat, parcè & metet.* Liberalitatis igitur in convivio & Munificentia [erga clientes tūm amicos] nomen, modò tamen extra prodigalitatis naturam, egregius quisque vir sibi paret, honestè erogando, in argumentum obtinendi amoris primū, dein habendæ autoritatis inter Cives. Sed liberalitatem dūm exercemus, ex rivo hauriamus oportet, non ut fontem ipsum exsiccemus: Qui per ramos carpunt arborem & fructum, sequenti

asta-

æstate, renatos iterum colligunt, qui secus ad radicem securim admovent, ipsam, fructumq; nusquam rediturum perdunt, sic erogationes honestæ, proportionatæ, planeq; inexhaustæ sint, quæ ex proventu, non quæ ex alienatione fundorum, tum originalis boni (*sola perdendi curâ*) apparantur, nam aliàs citò desinant. Is igitur impensis diu sufficit, qui *ex ramo* (dicere si licet) *non ex trunco vivere studet*. Quæri exindè potest? quare fit, ut, avari parentis successores, plerumq; prodigales fiant? uti fuit Caligula post Tiberium, Antonius Caracalla post Severum Imperatorem, & alii passim; ratio in promptu. Dùm paratam inveniunt gazam & opulentiam (ex aliena opera) per totum habent, ingenerari necesse ex dudum præparato, nullam sui & suorum, in præsens curam (nam quæ non peperit sibi quisque, minùs amat, cum proprius labor magis pensatur, alienus uti gratuitus, levius habetur) sed potius ex remissione curarum corruptelam, ut sit primum malus usus gazæ parentum, dein luxuria, tum insolentia, exinde aliorum contemptus, postmodum veniat (modo sine vulnere) egestas.

44. Audacissimum quemq; e plebe, beneficis vince tibi que obstringe, dum senseris, quibus capiarur, virtuosos tamen & modestos, in amicitia interiori præpones, hi dum pro virtute agunt, rectum semper constantè & sincerè faciunt, illi sæpiùs insolent, & molestiam in amicitia faciunt, nec debere se, sed deberi sibi totum volunt, devincies tamen tibi illos, *non ut profint, sed ne noceant*, immò prodesse poterunt pro tempore, si rectè utaris. Argutè in rem Vellejus (lib. II. Histor.) *Brutum amicum habere mallet, inimicum magis timeres Cassium, in altero major vis, in altero virtus.*

45. Ab asperioribus verbis cave, verùm mollioribus utere, etiam non laudaturus, etiam reprehensurus.

46. Negatio mollibus vestita verbis, gratior est tristi morosaque largitione.

47. Potius odia lenitate (humanitate admista) vincuntur, quàm mutui odii pertinacia.

48. Iterata beneficia fortius stringunt, velut repetita vincula fortius innectunt, ideo frequentia potius, quàm magna confer, quò diutius dando sufficias, nam verè
ho.

homines, beneficiis passim utuntur, ceu floribus, tam diu gratis, quàm diu recentibus, marcescit eorum memoria, nisi sæpius dando renovetur. Sæpè verò dare non sufficias, si magna simul dederis. Deindè scias oportet, cariorem esse cuique modicam recompensam, pro Virtute & merito, magisque deberi gratiam exindè datori, quàm quodvis magnum donum, in obvios petitores effusum, hoc enim accipiendi modo, non ad virtutem nostram, sed ad fortunam, liberalitatemque conferentis, honos refertur; illo priori, utrumque simul pensatur, & munus, & quod majus est munere, virtutis nostræ æstimatio, cujus esse quisque sibi conscius, & ab aliis pensari quàm maximum cupit, vel secus improbari, gravitèr indolet. Immò, illo priori modo, est sæpius inconsiderata largitio, nè dicam effusa prodigendi facilitas, mollis animi partus, hoc verò posteriore, dantis prudentia, vera liberalitas, & meritum illecebra vocatur.

49. Haud firmam amicitiam aut diuturnam parari crede, quam dando retines, ni adhibeas, cum reverentia tui, auctoritatem. Verè ait ille. *Qui magnitudine*

*munerum, non morum constantia amicos sibi parat, meretur magis, quam habet. Cum enim satis acceperint, quantum opus habent, aut benefaciendo deficiat exhaustus, vel saltem nisi avaræ expectationi, magnitudine dandi sufficiat, rejicient te, nec amplius curabunt. Fundamentum ergo parandæ & retinendæ amicitiae penes virtutem & auctoritatem morum (cum reverentia tui) pones, beneficia verò, & comitatem habebis, velut pro condimento tenaciùs retinendæ. Peccavit in eo Julius Cæsar, cum omnia petentibus amicis ex facili concederet, quæ aliquando prudenter recusari poterant, unde plures amici cum confecerunt, quàm inimici, quorum non expleverat spes insatiabiles, tanta enim nonnullorum amicorum importunitas, ut quàmvis multum acceperint, injuriæ tamen loco habeant, plus accipere potuisse, dum facilitate obtinendi, assuescunt esse petaces. Idem in Galba reprehendit Tacitus (*Histor. I*) *Hi-antes in magna fortuna amicorū cupiditates, ipsa Galba facillime intendebat, cum apud infirmum & credulum, minore metu, & majore premio peccaretur. Ignis, ambitio, tum avaritia, nunquam dicunt satis, plus appofueris?**

sueris ? plùs semper inflammantur. Cave ideò assuefacias amicos importunis petitionibus, obvia facilitate concedendi, potius nonnunquam petentibus humanitèr recusa, non quod præstare nolis, sed in aliam occasionem differendo, ut dissuescant importunitati, *assuescant repulsa*, ruborem petitionis habituri, nec alitèr istos *Petaces* vitabis, vel potiùs *instar generosorum equorum, amicos alendos, non saginandos studebis*, obesi non tàm expediti, verùm segnes, ad tuum libitum ferendo labori.

50. Indè enascitur prudens monitum, nè amicos, tùm domesticos clientes, quorum operâ indiges, spe præmii in factum provoces, aut facere aliquid assuefacias, potius negotium propone, & operam amicè require, ut pro necessitate officii factum aggrediantur, ex soluturi de sua virtute expectationem. Si verò aliquid daturus es, non in recompensam offer, sed ex beneplacito, adjectâ post præstitum opus morâ, quod enim in recompensam datum est, non obligat in futurum accipientem, sed solvit debito recompensæ dantem.

51. Non tantùm de amicis & clientibus dictum esto, sed de stipendiariis militibus, nè

nè prudens Dux assuefaciat milites recompensæ, potius officia militaris virtutis & obsequii requirat, pœnam propositurus non facturis, quàm præmium alacribus, quod offerendum tamen, sed ex insperato.

52 Qui rem benè habere vult, rei perficiendæ sit diligens curator, *potius in negotio, quàm post negotium, malefacti operis severus exactor*, cùm tamen res malè facta manet, nec revocari pòtest, prodest quidem correctio in posterum, sed in præsens damnum habetur. Eò propè collimat Tacitus dùm ait: *Præstat officiis (seu negotiis) non peccaturos præficere, quàm punire cùm magna fecerint.* Prout cerè rem non alièr probè assequaris, quàm si aptè negotiis præficias, non qui superiores, nevé qui sunt inferiores, sed qui officio proportionati, & velut è condicito pares. Illi primi, officium commissum, infra capacitatem dignitatemque sui habebunt, illudque negligent, nec offerenti gratiam debebunt, sed potius offendentur, iudicio parvi muneris, velut contemptos se ægrè ferentes, secùs item inferiores, dùm non sufficienti muneri, rem agendam pessumdabunt, ut iudicii arguaris, qui imparibus agenda contulisti, volens
tui

tui ipsius deceptor, velut si Myoparoni piscatorio, classis navarchum præficias, aut obvio remigi, prægrandem quadriremem curandam si committas, hic per inertiam regendi, eam perdet, ille muneris vilitatem contemnet infra dignitatem habiturus. Vel perinde supervacaneum fiat, ac si magno pedi, parvum calceum induere contendas, vel secus toga virili, vestire infantem (onerandum potius, quàm ut ornetur) velis, in hoc turpi excessu, in eo peccaturus defectu. Oportet igitur, secundum genium cuiusque (prout in artem agendi hanc aut illam naturâ inclinât) munera cuique committantur, non verò è contrario, Togata, viris bellicis, Provincialia, maritimis; ludicra, seriis & gravibus; juridica tum forensia, ruralibus; amœna, tristibus: turbulenta pacatis; laboriosa delicatulis; regenda, obedire nisi & subesse aliis commodè scientibus, intricata, non expeditis & hæsitantibus; Religiosa, politicis. Denique (repetitò dico) parva ingeniis magnis, magna, parvis. Satis prudens in eo Tiberius, de quo Tacitus (V. Annal.) *Poppæus Sabinus à Tyberio maximis provinciis impositus, nullam ob eximiam*

*artem , sed quod par negotiū , neq; supra
erat.*

53. Quæ ratio non potest, sæpè tempus
sanat , noli anxius esse , *verum tempus in
consilium voca* , nonnulla difficiliora tem-
pori , aut potiùs DEO , sananda permis-
surus. Sic ille apud Historicum : *Consilium
cui impar erat fato permisit.* Non tamen fac
desperabundus. *Sapè meliori fortuna, locum
fecit aduersa.*

54. Non qui res, sed magis qui tempora
disponere scit, vel utrumque, rem haber,
rectè autem disponit, qui benè dividit. *Ego
& tempus, contra duos Caroli V. Cæsaris
dictum.* Solus scit agere, qui tempore non
nescit uti.

55. Cave morosos, qui momentarum
trahunt in offensam sui , non aliud lucri ex
talium convictu reportabis , nisi cum indi-
gnatione acerbitatem , dum sunt similes
stomacho nauseabundo , qui etiam suavia
malè accipit & fastidit.

56. Minores virtutes affectum vulgi
movent ad amorem , excelsa virtus , nisi
magnorum movet intellectum, ad pensan-
dum & æstimationem, hæc erga superiores
necessariò usurpanda , sed cum minoribus,
nisi

nisi minorum virtutum usus, cum enim illi altas capere non possint, stupent verius eas, quam amant. Prout igitur cum magnis, aut minoribus res tibi, sic virtutem (utique omnium haud neglector) hanc aut illam, studiosius adhibebis, si sapias. (*vide Notationes meas Politicas puncto XII.*)

57. Semper cautus sis, & haud fide.

58. Cave inimicos laudantes, *Nam quod incautius decipiant, palam laudant.* Immo cavebis amicos, placere nimium volentes & susurrone.

59. Tuum secretum sit clausum, & nisi uni alicui, aut tibi soli, apertum; Sed cavendum, ne silente lingua vultus, oculi, ac ceteri gestus loquantur, ut quod maximè celatum vis, in lucem protrahatur.

60. Dicto vulgari: *Malum benè positum, nè moveas, nè fiat pejus.*

61. Affectus, inimicus bonæ rationi; qui cum non regit, regitur, neque te Ira, neque nimius Amor ducat, sed mediocritate laborandum, nisi velis errare. Qui minus ex affectu habet, plus ex ratione.

62. Qui amat nimis quietem & secessum, qui brevilloquentia gaudet, adusq; Affabilitatis Comitatisq; defectum, qui Stoicum & grave

grave supercilium gerit, morosus dictorum factorumque in alios censor, qui parcè erogare cupit, qui faciliè dicto offenditur, nec scit (salva tamen gravitate & virtute) dissimulare multa, paucos amicos sibi parat, nec multum in populo potest; Impossibile est, cum nemini te amicum dederis, dari tibi aliquem velle, aut si vis habere, necesse remittendum aliquid ex rigore, quod virtuti non contrariabitur, sed eam adornabit, sæpè virtutis legem falsò putamus, cum potius vivendi morositas est.

63. Cauti aut nimis quieti, dum esse nonnulli volunt, otiosi fiunt, cum aggrediendo, terrentur difficilibus, vel cum non ex voto, res aliàs cadunt, vel cum sibi (quæ rectè secisse consci sunt) à malevolis succenseri, indignè ferunt, vel dum sunt agendo nimis scrupulosi nec plane resoluti, & leves offensas metuunt, quod mollis & ignavi verius, quàm quietem appetentis animi signum est. Fateor, nihil agentium facta non improbari, non errant, dum nihil agunt otiosi, velut apud Tacitum Hordeonius Flaccus. *Non compefcere ruentes, non retinere dubios, non hortari bonos ausus, sed pavidus, segnis, odiosus & socordia inno-*
cens,

cens; & Galba magis extra vitia, quàm cum virtutibus, in quo cum segnitia esset, sapientia vocabatur. Tales non habent inimicos, sed nec amicos quoque, dùm negliguntur, errare verò, tū nobis succenseri, aut offendi, uti hoc alienæ malignitatis, non autem nostri vitii, sic illud, prorsus humanum est, cùm non qui minimè errat, sed qui promptè erratum corrigit, & à casu intra virtutem assurgit, prudens est: Hominis actio, (dùm hominis est) aliena prorsus ab errore esse non potest, Divina nisi errore vacua, tamen à malitiosis, malè intelliguntur, modo illud in homine laudatur, dùm non confundi, sed promptè se recolligere, intra magnanimitatem sui, potens animus. Fal-
luntur idèò, qui ab usu & tractatu rerum levibus terrentur, ut rectè succensuerit il-
lis Justus Lipsius (Epist. 39. Cent. 2.) *Con-temni à te humana gaudeo, quæ me quidem anthore, pedibus etiam trahere, sed ita ut con-temptus iste, ab alto quodam animo sit, non qui ipse se contemnat.* Hoc modestiam aut sapientiam censēs, iacere? nihil agere? ad nullum vitæ genus collineare? ignavia est; magnorum etiam sapè ingeniorum pestis. Subit enim (ut ille inquit) inertiae ipsius quæ-

quædam dulcedo, & invisâ primò desidia, postremò amatur.

64. *Pro ultimò.* In gratiam cujusque prudentis & virtuosi Civis, adjiciendum putavi, ut si ad recta præcepta vitam moresque componat, & in altum agendarum rerum pro virtute contendat, fore ut incurrat in malignantium linguarum censuras, invidorum odia experturus, quæ plerumq; virtutem exercere amant. Nè igitur acerbitate vir prudens confundatur, sed potius in partem melioris fortunæ trahat, certum argumentum magnitudinis habiturus, invideri sibi, quàm ut invideat, modò rectæ virtutis conscius sit; Continua observatione compertum, non posse magnorum Catalogo inferri, nisi qui priùs asperam invidiæ viam decurrat, aut dum eam calcaverit, tùm verè fortunæ altioris gradus, substrui sibi ab occulto fato speret. Non certè sermonum acerbitas invehitur in vilem colonum, qui sola ignobilitate & inertia securus, quem per omnia fors infima, semorum ab hominum fama, & tutum ab invidia facit, non invadit humilia tuguriola verùm altas petit domos, aut potius eos exercet viros, qui extra abjectorum sordes positi,

positi, in conspicuo præclaram agunt vitā, ut verè dicatur, *Æmulam magnorum esse invidiam*. Vel ut altius noster Tacitus. *Sinistra erga eminentes interpretatio, nec minus periculi ex bona fama, quam ex mala*. Si penitus introspicere liceret intimum invidorum pectus; quidni videretur intus crudeliter laniatum, animus exesus, mens invidiæ curis decocta, ut potius cū loquuntur, aut de te sibi vindicant, potius de seipsis graviores poenas sumant, non in te verbo, sed in se, continua magnitudinis meditatione sæviri. Illum tua generositas vexat, hunc in rebus gerendis gravitas arguit, aut morū pulchrè composita venustas confundit, jam incipiendorum & agendorum prudentia, in contrarium nitenti æmulationi obluetur. Plerumq; verò maligna fama in magnos & officiis degentes, quos nobilitas, opes, honores, aut aliqua insignis claritudo, rumoribus objicit, quem ergò miserum, & infra genua sua abjectum (nec supra pro virtute assurgentem) videre mallerent, superbum & obliquæ virtutis clamant, non quia tu verè sis, sed quia illi animo ægri, nequā, malitiosi, majoris virtutis impatientes, ut eo ipso inferiores se agnoscant, dum invident. Ad rem meam

sacer

sacer scriptor, *Invidiam, portatilem infernum vocavit*, ut quem invidum dixeris, vivum potius martyrem voces, & in horas morientem, nihilque pejus in poenam optes, quàm ut rectum facias, quod inimicus invideat: *utinam invidi ubique oculos haberent, ut omnium felicitate torquerentur*. Torquetur sanè quisque invidus, cùm alterius felicitas, sui animi Tyrannis est, quod alterius fortunæ, gloriæve accessit, sibi demptum putatur, aliorum divitiæ, sua paupertas, aliorum affluentia, sua macies, sua fames, & cùm magni esse non possint, nec cæteros malunt, in se nequam, in cæteros haud boni. Ergò nè conqueratur de invidis vir prudens, gaudeat potius, nisi malit vocari miser, nec se altum stantem magis arbitretur, quàm dùm hoc malo jacet; Invidiæ similes meteororum ignibus fatuis, qui sequentem fugiunt, fugientem sequuntur, sic illæ, nisi non contemnenti nec conscio propriæ virtutis, nocent, gaudeat [inquam] magnum sibi inesse, quod invidorum oculos fodiat, mentem decoquat, animum compungat, sibi in triumphum, æmulo in confusionem. Senecæ super hæc verbis usus. *Malè de melo-*
quum-

quuntur; faciunt non quod mereor, sed quod solent, malè loquuntur & benè nesciunt loqui, non iudicio faciunt, verùm morbo, non de me loquuntur, sed de se. Moverer si de me Marcus Cato, si Lælius, si duo Scipiones loquerentur; nunc malis duplicere laudari est, non potest ullam auctoritatem habere sententia, ubi qui damnandus est, ipse damnat. Quibusdam canibus sic innatum est, ut non proferitate, sed pro consuetudine latrent, dicam ultra, malè de me loquuntur, sed ipsi otiosi, alienos labores è convivio securè præspectantes, & quos publica quies aliis laborantibus mollitèr habet; vel quod alibi dixi, sæpè tibi repete, desiderari ad maiorem perfectionem virtutis, adversarium habere, ut æquè victus sit adversarium modeste tulisse, ac alia rectè fecisse. Non igitur bonum eum iudica, quemcumque aliorum dictis factisq; obloquērem audieris, videsnè aquas per se sapidas & dulces, qualem terram præterfluant? puram, amaram, sulfuream, salinam, lutulentam, ejus saporem purum, aut secus amarum, sulfureum, salsum, lutulentum, & malè olentem sapere; Sic iudicia nonnullorum de rebus bona sunt aut mala, prout animus, undè feruntur.

tur. Habent bonæ apes, undè suum mel ab acri urtica decoquant, araneis etiam rosa sui veneni materia, non quia rosa mala, sed quia nisi venenum quærit aranea. Non igitur (quod sæpius suggero) conqueraris, non ferrum in ultionem posce, non exitium tibi obloquentibus meditere, si vir bonus es, quàm ut eo stimulo in altum virtutis enitaris, plùs quàm satis honestissimæ & triumphalis vindictæ [si ea vindicta vocanda] dùm tibi invidetur habiturus, undè quod maximum in humanis, virtute superabis invidiam, quæ non nisi bonæ virtutis constantiâ superatur, vi nunquam, sed ut potius incitetur. Sed cùm omnia feceris, non semper eandem virtus in orbe habet æstimationem, in aliis eadem laudatur, in aliquibus non item. Ergo nec hodie non sint viri, virtute, judicio, morum gravitate, agendi quæ peritia Manliis, Scipionibus, Fabiis, cæterisque Romanorum & Græcorum magnis nominibus pares? Sunt omninò, verùm seculi vitium, non virtutis defectus, ut non videantur, cùm in ea tempora non inciderunt, quibus totum virtuti concedatur sine invidia, & locus & æstimatio, & præmia, & æm-

di occasio, verum potius illa, hominum malignitate compressa jacet, latetvè Quid enim inter malitiosos possis? si corrigas? dum sunt mali passim, facile offendas multos, ideoque indignantur, flagere velis? invident, nec ideo juvant, immò studiosè rectè faciendum præpediunt, tenebras virtuti aliorum inducere amantes, nè comparitione, ipsi prodantur, aut vilescant. Prisca ætas ingenua erat, circa rectam simplicitatem, æquum habens virtutis intuitum, dum plures essent recti, quàm in devia vitiorum abeuntes, neque ideo superbia obstitit, quò minus ductum consiliorum meliorum sequerentur, facile exinde se erigebat virtus in majus, cum seu ageres, pensaretur, seu adjutoribus & instrumentis agendi opus haberes, præstò adessent inter bonos, rectum volentes, aut quod velis, facere scientes. Facilius erat Scipioni, vigente militari virtute Romana, magnum Ducem pro Romanis agere, Annibalem vincere; Carthaginisque deprimere fastum, & Africani nomen pro se mereri, cum tot haberet in exercitu scientes ordinum ductores, bello jussorum *apta exequendo instrumenta*, quàm si aliàs

posterioribus seculis, labente disciplina, interrudes, cohortinum administratos armis agendum aliquid veniret. Aut Porcio Catoni, censoriam exercere erat promptum, & reducere ad normam recti omnia, in urbe, in qua nondum per omnia adoleverat flagitium, & agendi licentia, quàm ejus pronepoti Catoni Uticensi, cum ejus ætate prævaleret licentia, & ex opibus immensis fastus, tum insolentium turba. Nullibi igitur minùs possunt recta ingenia, quàm si inter eos venerint, qui sciolis, presumptuosi, & insolentes, dum rudes, tum imperiti, pertinaces. Exinde causa proxima est: In populari Republica concordiam vigere non posse, dum quisque præsumit audaculus, sciolus, & nec alium sequi vult, aut primatum concedit meliori, verùm sibi asserit insolenter, rem in diversa trahens, fecunditatem ingeniorum nonnulli tunc vocant, cum potius agendi insolentia invalelet. Ad concordiam verò necesse omnino; & uni duobusq; concedatur, qui ex virtute præeant rectum acturi. cæteri sine scrupulo & murmure sequantur, immò juvent confidenter uniti, nec distrahant rem abeuntes in diversa, dum enim singuli præire volunt, universi confunduntur.

tur. Sed hæc obiter. Quantum vero ad famam & æstimationem Principum virtutis ; Evenit illis, velut quidam rectè annotavit: *Tametsi unus aliquis Princeps, iisdem bonis artibus Rempublicam moderetur, quàm alius gloriosissimè eam moderatus est, aequè tamen acceptus futurus non sit, nec parem habiturus laudem, nisi subditorum utriusque quoque naturas, aequè probas esse contigerit.* Addam amplius, nihil magis vulgus, quàm ordinem odit, mavultque malos dominos, modò sine ordine & in licentia, quàm bonos experiri, modò sint extra ordinem, ad normamque legis & virtutis, tùm per omnia modestiæ nè componantur; Exinde secùs, malis Dominis, in subditos, ars sola illecebrarum est per obliqua ut cùm aliquorum fortunas emungant, in alios pro insolentia sæviant, universorum libertatem per diversa aggrediantur, verbo tamen familiares sunt, & suaviloquio laborant, arte varia lenociniorum, fucum actioni inducere amantes, præferrim dùm privata vitia, mutuas inter se insolentias, & scandala populo condonant, immò studiosè connivent, in speciem licentiosæ libertatis, dùm cuique malum esse, & inolescere in alium.

impunè licet Sic versutulorum, aut quoquo modo obliquorū amicitia, inelcātur magis aliqui, quā eorum, qui ad virtutis legisq; normā, se rectè componunt, dum illis prioribus, libertas speciosa, & amœnitas convictus inest, hi pro virtute & modestia, tristiorē regulā vivendi, & morum quendam rigorē, inducunt, æstimantur quidem, sed non amantur. Sic illecebræ mundi, quæ *temporalia* viris spiritualibus vocantur, plures sectatores habent: quia lætiora sunt aspectu, & ab exteriori sensu pensātur, licet exitu post hæc tristia, quā solidior virtus, cujus pretium & æstimatio, altiori menti subjacet. Ex eodem fonte [ad propositum ut redeam] *boni domini*, apud malos *pejus audiunt*, & nisi amissos vulgus agnoscit, seròq; dolet, aut secus, mali æstimantur, dum illis populi sunt assuefacti, moribus, epulis, venatu, facilitate, luxuria, tum exercitiis cōformes; velut Neronis vitia, haud minus adamaverat populus, quā virtutes aliorum veneraretur, & in Vitellio [idem observavit Tacitus] studia populi tum exercitii, rarò cuiquam bonis artibus quasita perinde assuere, quā huic per ignaviā: Quid mirum igitur? si nē Divina quidem vulgus probat, Moyses populum ex Ægypti servitute

tute eductum, cum ordinatissimè molli-
simèq; habet, mannæis de cælo panibus, de-
licata coturnice dum pascit, periculis insu-
per, in manu Dei potenti, dum promptissi-
mè adest. *Portans populum in sinu, sicut por-
tare solet nutrix infantulum; Murmuravit
populus contra Moysen, dicens: Cur fecisti nos
exire de Ægypto, utinam mortui essemus in ter-
ra Ægypti, in mentem nobis veniunt cucume-
res, & pepones, & cepe, & allia.* Causam rei
scire placet? en cape; Moyses ad virtutis
legem animos populi componebat, in Æ-
gypto in corpora sæviebatur, hominum ve-
rò proterviæ, tristiore esse modestiam vir-
tutis & correctivam legem, dum intimū ani-
mum petit, quàm corporis exteriorem ser-
vitutem, Ægyptus crassa carnum epula, &
ignobiles delicias servilibus ingeniis obtru-
debat, Moyses altiore escam suppedita-
bat, & afferebat [sed non sine regula] liber-
tatem, quorum nisi ingenui altiorisq; men-
tis homines, sunt capaces, ingeniis absurdis
& non intelligentibus, nisi quæ sensu exte-
riore pensantur, placent, præsentia minora
dum intuentur [infascinati] futura majora
negligunt, simulque obtreçant superiori-
bus. Tamen universim, [ut verum fatear]

Invidiæ, sermones vulgi, & acerbior censura, in principes viros, aut quoquo modo æstimatos (præsertim qui admoneri per singulos nequeunt, tum in quos nulla potestas est) non obsit, sed necessaria ut plurimum est, idq; communis boni causâ, si enim immeritò jactetur, prodest tamen, nè depraventur, qui boni sunt, immò ad altiora calcar habent, velut præmoniti, dum intrò se (num verum sit?) introspiciunt, & simul humanorum admonentur, si vera est, in melius corrigit, vel saltem nè peiores evadamus, acerbitate aut metu majoris ignominia nos coercet: Meritò constitutus est honor in opinione aliena, ut scilicet in metu simus, cumq; actiones nostræ, ab aliorum dependent iudicio, omnibus satisfacere studeamus; Etiam Libertatis in Republica signum est, obsecratio, in ea enim, quam tyrannis oppressam jam tenet, neutiquam permittitur. [Didac. Savedra Symb. XV.]

65. Ultimum monitorum illud esse debuerat, sed manum amoveni de tabula, en occurrit dictum, ore ab Ethnico, verè Catholicopoliticum, tibi, alteri, mihiq; mature sciendum. Qui notus nimium vivit omnibus, ignotus moritur sibi. Vel quod rectius

Di.

DIVUS Ictiptor. *Qui vixit velut immemor DEI, moritur in fine tandem oblitus sui. Felix* vivit, qui medios inter negotiosi seculi dies & fortunæ blandimenta, furto sibi subducit horas, aut saltem extrema vitæ applicaturus DEO, explicatus spontè, ab humanorum curis, rectius illas deserturus ipse, quàm ut relinquatur invitus ab illis. *Minimum est quod restat vitæ seni decrepito* [Barthol. Gramondus lib. 2. Hist. Gall.] *quisque Reipublicæ & amicis planè inutitū est, annus unus & alter, quo victurum se sperat, multum aternitati valet, momento paratur aternitas, felix aut infortunata, qualem sibi quisque procurat.* Non immeritò Seneca illudit Senibus, humana nimis studiosè disponentibus, in multos velut annos victuris. *Nihil turpius est, quàm senex vivere incipiens.* Pulchrum immò, dùm vivimus senes, sed mortui mundo, victuri tandem nobis, cùm vivimus DEO.

A DEI nomine, incepti hæc monita, in eodem finivi, qui mihi rerum Alpha & Omega, tuisque actionibus, utinam sit oportet; immò sit necesse omnibus, dùm verò ad eum, nostra plenè dirigentur, ut quid? [bonis] opus his aliorumque monitis, aut secus

secus, quò magis a Divinorum cogitatione & amore, [quasi ab ultimario summoque bono] recedimus; neque hæc, aut mille talia, satis ad cautionem, rectè agendum sufficiant in doctrinam, etenim quò magis sumus erronei circa eligendum verum bonum, plus in passiones animi incurrimus, & vario illidimur, quàm ut narrari cautio possit, turbamus inquieti alios & turbamur vicissim ab illis. Scire enim, brevi compendio rem grandem, te oportet.

Commotiones seu *Passiones animi*, oriri ex *absentia* aut à *presentia boni*, sit *veri*, sit *opinatiui*, per se autem verum & perfectum bonum, non est, nisi solus DEUS; nam reliqua bona sunt ab hoc, vel propter hunc, id est, in hoc. Quæ autem extra hunc, sunt tantum non solida, finita, transitoria, aut opinativa, vel falsa bona, prout cuiusque opinio ex temporali sibi statuit, & ex appetitu falso, immò, si penitus perpendis, sunt verè, ipsa mala; Ideoque post lapsum primi parentis, & post amissam originalem gratiam, (velut possessionem DEI, id est veri, summi, & ultimarii Boni) passiones animi, non possunt non esse in homine, dùm quiescere non potest, sed

per hæc, aut illa vagatur, velut in *via*, quærit, invenit quodammodo, nec materialibus
[*mentem habens immaterialem animumq;*]
plenè satiatur, sed irritatur verius, dùm est
extra metam perfecti boni positus, adipisci
verò, illud non potest, nisi [pro sorte meritorum] post emensam vitæ viam, occupet
in visione DEUM, qui uti infinitus est, solus
vastam & planè infinitam mentem hominis,
sufficienrissimè implet, & perfectissimè
terminabit; Immò, in hac vita, qui
magis DEUM animitus meditantur, minus
de illicitis animi passionibus habent, ipsi
quieti, dùm falsi, opinativi, nec proportionati
hominis animo boni contemptores, & incurii,
meditatione Divinitatis, quasi in possessione
veris Boni, maturè & antè tempus, incipiunt
involare; Atque hinc est, *materia & causa omnium Virtutum*, studio
(qui est unicus finis humanæ voluntatis & actionum)
habendi veri, summi & perfecti boni, aut secùs,
circa ejus absentiam, tùm in eligendo errorem,
aut malitiosam inconstantiam in quærendo,
est causa commotionum & passionum animi, tùm ex non
domitis, *causa immò materialium Visiorum.*

APPENDIX ICON INGENIORUM.

Genera Ingeniorum (seu Animo-
rum) varia seu BONA, seu
MALA sunt.

In genere BONORUM ponuntur.

Ingenium Frugi, Rectum & Simplex,
Reale, Probum [seu Integerrimum] Æ-
quum [seu Amans Justitiæ] Apertum [seu
Candidum vel Sincerum] Clarum, Inge-
num, Verax, Grave, Judiciosum, Soli-
dum, Prudens, Validum seu Firmum,
Constans & Stabile, vel Perseverans, Te-
nax verbi, Infractum, Assiduum, Sedulum,
Studiosum, Serium, Defæcatum, Matu-
rum, Consummatum, Sobrium, Practi-
cum [seu Pragmaticum] Vivax [seu Ve-
getum] Erectum, Peræquale, Excellens,
Penetrativum, Considerativum, In se re-
tractum, Profundum, Discretum (seu Dis-
cernens) Perspicax, seu res à longè, & ante
tempus prospiciens. *Nec sciens fallere, nec
falli se sinens*, Cautum, Vigilans, Providum
[seu Circumspectum] Sagax [vel Solers]
Ex-

Expeditum [seu Promptum] Extra dilatio-
 nes positum, *consultisq; facta conjungens*, Sui
 compos. Recollectivum, Aptum & Habi-
 le, Industrius, Conceptuosus, Speculati-
 vus, Capax, Elegans, Castigatus, Efficax,
 Facundus, Politicus, Nobile, Dives &
 Fœcundus, Versatus, Laboriosus, Co-
 nabundus, Activus, Alacris, Indefessus,
 Generosus, Magnificus, seu Magnani-
 mus, Animosus, Altus [seu Altioris spi-
 ritus] Cordatus [seu virile] Intrepidus,
 Æquanimus, Pacatus (vel Quietus, seu
 Mansuetus) Actione suave, Clemens,
 Commiserativus, Temperatus, Vere-
 cundus, Religiosus (aut quæ aliæ devo-
 ti animi dotes) Civile vel Urbanus, Po-
 pulare, Benevolum seu Benignus, Fidus,
 Lentus, Cunctabundus, Sedatus, Qua-
 litativus, Frugalis, Tractabile, Sociabile,
 Come (seu Affabile) Morigerus, Libera-
 lis, Hospitale, Humanus, Amicabilis, A-
 mœnus, Festivus, Docilis, Corrigibilis,
 Concinnus, Rectè compositus, seu Cul-
 tus vel Competus, Moderatus, Sui po-
 tens, Amans Publici, *Universale*, Mediocre,
 Liberus, *Non dependens nec Obnoxius*.

Dictum pro genere bonorum ingenio-
 rum

rum erat satis, verum nulla festinatio, transgredi cogit mentionem Elogiorum, quibus arguto satis breviloquio *Velleius Paterculus*, magnorum olim nominum viros (per diversa genera virtutum & rectorum ingeniorum) passim decoravit. Vir in tantum laudandus, in quantum virtus intelligi potest. Nihil in vita sua nisi laudandum, aut fecit, aut dixit, aut sensit. Tantis adornatus virtutibus, quantas perfecta natura aut industria, & mortalis conditio recipere potest. Neque dicendus, neque silendus sine cura. Vir, cujus operum & ingenii magnitudo, instar magnorum voluminum. Per omnia virtuti simillimus. Ita omnia simul, ita singula ex omnibus agens, tanquam expeditissimus ille tantorum negotiorum mole, huic uni negotio vacaret animus. Nunquam recte faciens, ut facere videretur, sed quia aliter facere non poterat; Natus ad omnia, quae recte facienda sunt. Vir severitatis laetissimae, hilaritatis priscae, actu otioso simillimus. Foemina (nam & huic sexui sua quoque decora sunt) nihil muliebri habens, praeter corpus. Cujus potentiam nemo sensit, nisi aut levatione periculi, aut accessione

sione dignitatis. (*Vellejus Paterculus passim in Historia.*)

In genere MALORUM ponuntur.

Ingenium Obliquum, Malignum [seu Malitiosum] vel Nequam, Cholericum (seu Iracundum) Igneum vel Ardens, aut secus Tepidum, Imperiosum, Officii insolens, in alios Inquies, & Abusivum, aut secus, operæ tædio, vel inertia seipsum conficiens, Acre, Violens, Trux (seu Ferax) Flagrans (seu valdè volens) Impatiens, Vehemens (seu Impetuosum. Præceps, aut Concitatum) Desperatum, Præcox, Cerebrosus, Infociabile, Illiberale, Inclemens, Invidiosum, Zelotypum, pertinax seu Obstinatum, Protervum, Incredulum, Morosum (seu Absurdum, Sordidum, Subrusticum aut Insulsum) Cynicum, Dubium seu Dubitativum, Consternatum, Meticulosum (vel Pavidum) Irresolutum, Nullius ausus capax, Futuri socors, Ægrum, Ærumnosum, Querulum, *cui nunquam benè*, Incurium (vel Negligens, seu Neglectum transitorieque agens) Perfunctorium, Obliviosum, Impeditum (seu non Expeditum & Hæsitans) Inexplicatum, Involutum, Tædiosum seu Fastidiosum, vel Nau-

seabundum, Inexplebile, Novicupidum,
 id est, *presentium intolerans, mutationis avi-*
dum, Curiosum, sibi complacens (quod la-
 borat Philantia) Jactabundum, Affectuo-
 sum, Passionatum, Affectatum, Tumidum
 (seu Præsumptuosum, Fastuosum, Vento-
 sum aut Arrogans) Pompaticum, Impen-
 diosum, vel Sumptuosum, Laudipetum,
 Inane, Vanum (*quod facit tantum in spe-*
ciem, aut non solita pensat) Ambitiosum,
 Æmulum, seu Æmulatorium, Ostentati-
 vum, Sciolum, Fucatum, Exuberans,
verbis, gestus aspectivè magnificum, Rerum
& solida mentis vacuum, (vel quod est to-
 tum in exterioribus & in lingua, *ad nume-*
rum nisi totum faciens, aut si dicere licet,
Vano Stoicum, tum Superciliosum) Men-
 dax, Susurroneum, Dicax, (id est Garru-
 lum,) Clamosum, Loquaculum, seu Va-
 niloquum, & Intemperantis linguæ; vel
 Sermonis insolens, & immodicum, aut ver-
 bis nimium) Detractorium, seu Oblatrati-
 vum, Impudens, Scommaticum (seu Convi-
 ciatorium, Satyricum, Aculeatum aut Ca-
 villosum) Succensorium, Illusorium, Nu-
 gatorium, Argutulum, Jocularium, (*vi-*
su amabile, facieq; amœnum, intolerabile fa-

Et moribus) Sugillatorium, Procax, Ve-
 xatorium, Insimulativum, Humile, Tenu-
 Abiectum, Pusillanime, Superstitiosum,
 Flagitiosum, Probrosus, Scandalosus,
 Impotens sui, Dissolutum, Prodigum,
 Luxuriosus, Voluptarius, Delicatum
 seu Deliciosus, Effeminatus, Seditiosus,
 Effrenus, Inquietus & Turbidus, seu Turbu-
 lentus, Incensorius, Suggestivus, Ve-
 ceros, Insolens, Refractorius, Calcitro-
 sum, Audaculus, Insanabile seu Incorrigi-
 bile, Perniciosus seu Exitiosus, Asperus,
 Immoderatus, Horarius, Ambulato-
 rius, Mobile, Inconstans vel Instabile,
 Fluctabundus, Vagabundus, Leve, Cre-
 dulus, Fragile, Lubricus, Recidivus, La-
 cebrosus, Furtivus, Erroneus, Opinati-
 vus, *Alieni rimans & interpret, sui obtegens*
 Implicitus, Obscurus, Criticus, Vertigi-
 nosus, Vesanus, Fanaticus, Extenuati-
 vus, aut secus Exaggerativus, Exprobra-
 tivus, Mirabile, Varius, Phantasticus,
 Ambagiosus, Chimericus, Intricatus,
 Labyrinthosus, Ambiguum (seu An-
 ceptus) Neutrale, Deceptorium aut Fallax,
 Infidus, Mille artifex (quod & Machiavel-
 listicum vocant) Velata astutia, seu pal-

liatæ malitiæ, Mentitæ frontis & formæ,
 Captiosum, Impium, Iniquum, [seu Inju-
 stum] Avarum, Parcum [seu Tenax] Sub-
 dolum, Privatipetum (*id est, in tantum hoc
 aut illud agens, vel non, tum amicitias co-
 lens, in quantum privatus respectus adest,
 aut se transferens, unde plus utilitatis spera-
 tur, amicitias utilitate probās.* Venale, Quæ-
 stuosum, cui id æquum, Honestum, id ex pu-
 blica libertate, nihilq, turpe quod fructuosum)
 Rapax, seu Alienicupidum, Effrons, Præva-
 ricatorium, Falsarium, Hypocriticum, Si-
 mulativum, Sycophanticum, Infame, Per-
 fidum, Versatile, Injuriosum, Grave, Dolo-
 sum, Insidiosum, Subastutum, Versutum
 [seu Vaftrum] Quodvis struendi & destru-
 endi artifex, Temerarium, Furiosum, Sæ-
 vum, Efferum seu Tyrannicum, Vindica-
 tivum, Sanguinarium, Inexorabile, Con-
 tentiosum [vel Discors & Dissidiosum]
 Rixosum, Adversum, Criminatorium, Sus-
 picax, Diffidens, Rimatorium, Indagino-
 sum, Substoltum seu Fatuum, Intrusum, A-
 dulatorium, Assentatorium, Importunum,
 Petax, Servile, Nimis placens [*vulgò Pla-
 centinum*] Effusum, Immodicum, seu per
 omnia nimium, Fatigabile, Tardum [seu
 Pi-

Pigrum, Desidiosum vel Socors, & Operas fugiens] Procrastinativum, Negotio pendulum, Ignavum, Languidum, Effœtum [seu Exoletum, Exhaustum vel Enervæ] Fractum, Otiosum, Molle [seu Infirimum] Respectivum, Hebes, Iners (seu Imperitum vel Rude) Frivolum, Ineptum, Vulgare, *Impar nec Proportionatum sua sortis, vel negotio* (aut secus) *supra sortem, vel negotium.* Debile, Stupidum seu Stolidum, Obtusum, Incapax, Non intelligens, Confusum, Durum, Inhumanum, Tetricum, Distractum, Mistum, Suspectum, Omnium formarum, Nullius aut inferioris iudicii, Unico verbo non satis exprimendum,

Dein generis INDIFFERENTIS sunt.

Ingeniosum, Officiosum seu Obsequiosum, Largum, Insinuativum, Acutum [seu Subtile] Argutum, Discursivum, Lepidum, Facetum, Joviale, Familiare, Affectatę simplicitatis, Illecebris potens, Seria jocis miscens, Demerendis hominibus genitum, Lautum, Facile [aut secus] Difficile, Domesticum, Solitarium [aut Segrex, vel Seccessu gaudens] Melancholicum, Morum & vitę contractioris, Triste, Austerum,

Alia ex utroque simul ; Prout vero minus ex malo, plus ex bono trahunt, (tristi enim privilegio fragilitatis humanæ, nemini ferè per omnia bonum esse licet) utcunque temperantur. Aut magis aut minus mala sunt,

Demùm. Alia Ingenia hominum. Dùm quodvis genus vitii eruditè exercent, ex quavis planè virtute trahunt partem, mistim, simul virtutis, simul astutiæ (*& actionis unico verbo non satis exprimenda*) peritissimi artifices. Quo sub pallio, facilè rebus imponunt, sunt verò omnium ingeniorum publicis privatisvè negotiis versandis astutissima, simulque vivendo familiarissima, non enim simplici stylo agendi rem transmittunt, sed agunt totum ex arte, & cum condimento, obvia & ultrò lacerans [jocisque respersa] inest comitas, solutior [ad familiaritatem] convictus; querulantibus & afflictis [notis atque ignotis] prompta condolentia, effusa promissa, res verò, ipsaque largitio, admodum pauca, sed nisi pro tempore amœna, & prius ante ostentata, ideoque expectatione grata. Offensarum deinde aperta dissimulatio, aut joco eludens argutia, cùm tamen sensim

immineat, velut per incuriam vindicta, eò magis intimum amicum feriens, quò subtilius & ex occulto meditata, ut ferè talia ingenia, *Universalia* vocaverim, nisi sint in materia obliquorum. Nihil illis tentando magnum aut difficile, [sed pari ausu, sæpius verò neglectim, vel ut somnum & inertiam simulantes, immò specie jocantium magis, quàm seriò] aggrediuntur, velut subjugatam materiam versant, membratim excutiunt, per digitos transmittunt, principium, medium, finem, aptè concordant & exsequuntur, aut secùs pro arbitrio negligunt, explicant se familiaritèr, nec hærent, nec adversis confunduntur. Cùm verò obtrudunt falsas imagines virtutum, & inescant specie boni, vitia liberius exercent, decipulis [Sirenarum adinstar] sine sensu plerosque involventes, ut non priùs capi se sentiant, quàm dùm sunt, nec regressus amplius datur, ut rectè habeantur Ægyptiorum latronum more [apud Senecam] quos *Philistas* vocabant, qui in amicitia speciem, in hoc complectebantur, obvios, ut jugularent, vel denique alias, sunt, velut de quodam ait Tacitus: Cui quamvis infami inerat industria; nec virtutibus, ut boni, sed quomodo pessimi

simus quisq; vitiis agendo valebat. Talia ingenia rarius tulit orbis, utque verum fatear, ætate mea, quæ vidi [inter] quæ novi, vix duo aspexi.

Nec illud pensandis pro recta virtute ingenii omittendum.

Per *Excessum* aut *Defectum* boni, falsam speciem nobis imponi virtutis, idque pro defectu iudicii, cum non probe dignoscere scimus, ex eoque fallimur, sæpè virtutem distitantes, cum inest factum vitium, unde injuria fiat rectis, dum pravis ex falso, nomen virtutis, & laus adstruitur. Alibi sparsim; hic accumulatisimè ponimus cautionem.

Pœna igitur & debita *Castigatio*, [seu *Justitia Correctiva & Pœnalis*] sæpè degenerat [per *Excessum ex Abusu*] in *Severitatem* nimiam, aut *Sævitiem* vel *Crudelitatem*, *gravitatem*, *importunitatemque* *rigoris*, immodè in *vindictam* vel *ultionem*, aut ex præcipitantia in *pressuram* *innocentia*. *Justitia restitutiva* aut *Commutativa*, in *gravamen* *indebitum*, *emunctionem* *fortunarum*, *circumventionem*, *extorsionem*, & *injuriam*. *Amor aequitatis*, aut

titulus Patrociniis, tùm *Protectio*, vel aliàs
Innocentia sua tùm *aliorum*, aut *injuria*
vel damni [immò quandoque *legum*, pu-
blicique boni] *defensio*, aut *zelus*, per ex-
 cessum degenerat, in *Prævaricationem*
 [seu *irritationem*] *causæ*, ac ipsius *legis*,
 tùm *justitiæ*, aut in *ostentationem* inso-
 lentem *potestatis & potentiae*, aut in
 affectatum æquitatis *ritulum*, alterius verò
 partis *injuriam*, *gravamen*, seu *despectum*;
 Ex eoque in modum *indebitum & inquietum*
 agendi, tùm in *majorem recti ordinis*
 [immò nonnunquam *quietis mutuae*] *irri-*
tationem, seu in *exacerbationem* *confli-*
ctumque [prout *potentes sunt*] *partium*, &
 • *publicas turbas*; ut quandoq; *respe&u emer-*
gentium, *virtus dissimulationis* (intra pru-
 dentiam adhibita) plus profit, quàm æqui-
 tatis *prætensæ*, aut *actionis*, nimius *rigor*,
scrupulus, & *præcipitantia*. *U&us summa po-*
restatis, degenerat per *Excessum*, in *Inso-*
lentiam pro *libitu agēdo*, *Violationem ju-*
rium, ac post *Oppressionem*. *Ordo debi-*
tus & potestas, degenerat plerumque in
Jussorum institutorumque intolerabilem
gravitatem aut *rigorem* ex eoque *præci-*
pitantem poenam, & *importuna verbe-*
ra, immò nonnunquam, ex *inconfide-*
 ratè

rata ordinatione, in maiorem confusionem ordinis & rerum. *Politica praxis, & necessaria legis regula*, in actionem Stoicam, aut Scholasticam ratiocinationem, (tùm intra discursum, citrà verò praxim) maximas. *Iusta potentia* in Oppressionem aliorum, tum injuriam. *Ratio status* in nimium regendi rigorem, prætenſa jura Majestatis, & tristem inquisitionem. *Æqua tributa & subsidia belli*, in insolentem Emundtionē subditorum, *Bona instituta, leges, & crebra consultatio*, per Excessum pariunt, Multiplicitatem edictorum [immò Levitatem & Contradictoria] ac deindè abusum, jussorumq; comceptū. *Catholico-Politia*, per nimium rigorem & excessum, degenerat in pressuram populi, ac post in Sophisto Politiam, & oblivionem conscientiae, *Libertas* in licentiam. *Maturior collectio*, *Deliberatio & multa Consilia*, in mobilitatem ingenii, tum consilli & facti, tum in Inconstantiam; aut secus in maiorem pertinaciam, vel animi obfirmationem in præconcepto, aut etiam tarditatem, unde agendi tempora, deliberando consumantur. *Activitas & Fervor seu vivax animus*, tum mens seria vel Negotiosa, promptaq; Actio, in Igneum (& inquietum) seu insolentem

genium, Factionem, Errores, Impetum, Excessivam iram, & poenitentorum occasionem. *Dissimulatio*, degenerat per Excessum, in Reconditam iram, ex coque Circumventionem, Fraudem, occulta molimina, & Vindictam, vel secus in oblivionem pertinentium aut incuriam.

Dicam ultra. *Liberalitas, Beneficentia seu Magnificentia*, per excessum seu abusum, degenerat in prodigalitatem, aut profusionem. *Virtutis pramium, seu iustitia Distributiva, vel pramiativa*, in Adulationis iūm officiorum (quæ molchum non sudorem, aut pulverem redolent) recompensam, vel in provocationem temerariæ cupidinis petacium (quibus postea dando non sufficiat, aut sine offensa negare non possis) ex obvia facilitate dandi. *Parsonia, & Debitus* (fruendi aut dispensandi) *Ordo*, in Parcitatem. *Fortunatum licitum augmentum, & Frugalis, modicusque bonorum usus*, in Avaritiam, & Invidiam alienæ fortunæ, iūm affluentia. *Affluentia, reſtaque bonorum fruitio*, degenerat ex abusu, in Ostentationem aut Luxum, vel inanium studium, ex coque occasionem defectus, immo (per decoctionē bonorum) inopie.

opia. *Iustus potendi & habendi prae-textus*, per excessum degenerat, in astutas inventiones, in quietam actionem, appetentiam alieni, importunitatem, seu insolentiam petitionis, & instantiae, circumventionem, imposturas, usurpationem, tum rapturam, *Licitum acceptum aut munera*, per excessum (immò per actus frequentatos) degenerant, in Inverecundiam accipiendo, deinde amicitiae & servilis obsequii (tum conscientiae ac denique veritatis) venditionem, tum in appetendi abusum, immò in corruptionem virtutis. *Magnificentia* in Superbiam & Profusionem inutilem, vel superfluum (immò quandoque difficile, nè dicam impossibile) conatum, & sua promptè perdendi studium, *Innocentia excusatio*, per Excessum degenerat in praxim evadendi, fallacias, vel artificiosum effugium (quod vulgus vocat astutam inventionem.) *Accusatio iusta, seu petitio iustitiae*, degenerat per Excessum in Malignitatem, imponendi scientiam & mendacia.

Deinde *Morum amœnitas*, degenerat per Excessum in Levitatem. *Conversandi Amor & Hilaritatis* (seu *Festivitatis*) *studium*,

studium, in Petulantiam, imo quandoque
 in otiosam vitam, Popinationem, ac post
 Diffolutionem linguæ, actionis, & inhon-
 estatem, vel quales otii ab fonte emanant
 malorum rivi. *Affabilitas & promptitudo*
sermonis, tum Urbanitas, in Affectatam
 actionem, Insolentiam, importunitatem-
 que verborum, seu loquacitatem. Deinde,
 in Diffamationem, imò in levitatem re-
 sponsi, ex eoque occasionem, ut emergant
 poenitenda. *Sinceritas verborum & Actio-*
nis, Confidentia, tum candor, Ingenuitas &
Apertus animus, in Propagationem tace-
 ndorum, & impatientiam secreti, tum in
 proditionem sui (& aliorum, rerumque)
 incautam, & in occasionem emerluri da-
 mni, aut in meram garrulitatem, imò in
 facilitatem nimiam, & levitatem actionis.
Promptitudo Amicitia, habet excessum,
 Actionis levitatem, aut facilitatem cujus-
 cunque obviæ amicitia, tum Effusos & ni-
 mium apertos, in speciem sinceritatis
 actus, ex eoque Instabilitatem, seu Incon-
 stantiam. *Officii tum obsequii promptitudo,*
Alacritas, aut Diligentia, degenerat in In-
 trusionem, tum importunitatem, & parit
 lassitudinē, dein levitatem conciliat, imò
 parit

parit mutabilitatem, aut amorem quæstus, ut illuc amicitia transferatur, undè plùs utilitatis speratur (velut alibi diximus, *Facetia*, *Affabilitas* aut *Jocositas*, parit per excessù Importunos sermones, *Dicacitatem*, *scommata*, *Vexationem*, *Diffamationem*, seu *Obtrectationem*, & *Sugillationem* rerum, aut plerumque mendacia, dein parit *Levitatem*. *Amicitia sinceritas* & *Confidentia* degenerat in nimiam familiaritatem, ex eoque contemptum, vel aliàs (sub prætextu confidentiæ) degenerat in *Insolentiam* dicti aut actionis fallacias, injuriam, ex eoque jurgia, tùm offensas. *Verecundia*, *Mansuetudo*, seu dicti, aut facti, ususq; fortunarum) *Modestia*, in Abiectam humilitatem, & cultus indecentiã, *Inciyilitatem*, immò in sui posthabitionem, seu vilipendiù, tùm quandoq; in meticulositatem, seu pusillanimitatem. *Debitum officii*, seu honor in alios, degenerat per excessum, in *Servilitatem*, aut turpem dependentiam, & de rebus sensum, non qualem recta ratio aut ingenuitas dictat, sed qualis inspiratur, tùm in animi abjectionem, aut in deforme obsequium, nec ingenuam adulationem, sui verò ipsius contemptum, seu prostitutio-

nem

nē honoris, immo nonnunquā in politicā hypocrisin, *Authoritas* tū honor debitus sui, aut *Gravitas*, deindē (quod proximum est) *Iusta petitio promotionis, praefectarum, Officii, tituli* per excessum degenerat, in turpem *Ambitum, Superbiam, praesumptionem, Factiones, Fastum, Aemulationem, Aequalitatis odium*, seu (nonnunquam in *Incivilitatem* ex aliorum contemptu, vel (quidquid alicui accessurum in melius) *Invidiam, imō destructionem; Superfluum* verò sui cultum, formularum exigendarum, morositatem & nimium scrupulum, immō (ut affatim fastuosis suppetat impēsis) degenerat in *Avaritiam, & oppressiōnem* quoquomodo minorum, tū injuriam, nē dicam in publicas turbas, velut superbiae malum, multa cognata vitia post se trahit, privatim & in publicum.

Addam super hæc, *Benevolentia vel Bonitas, seu promptitudo*, degenerat per Excessum, in *Facilitatem* nimiam ex Improvidentia, aut in actionis (promissorumque) levitatem, & sermonis, seu in actus incautos & incurios (quod simplicitatem, immō quandoque *stupiditatem* vulgus vocat.) *Bonus pro aequitate zelus, aut debita in*
contra-

contraria indignatio; Dein Prætextu servan-
di ordinis Rigor, Fervor & Austeritas, dege-
nerat in Iram excessivam, Affectum aut
importunum ardorem, seu flagrantiam, &
Inquietudinem mentis, modumque inde-
bitum agendi. Clementia, Commiseratio, &
ex eo præsumptum Patrocinium, in Indulgen-
tiam nimiam & Impunitatem, immò In-
centivum ulterioris malitiæ. Benignitas
aut teneritudo affectus in Mollitiem animi,
Necessitas, (quoad corpus) in nimiam ejus
mollitiem & superfluum curam, tum
appetentiam. Recta suæ virtutis conscien-
tia, & elegantia attributorum, in Philan-
tiam, complacentiam sui, aut Jactantiam,
Generositas animi, prout huic vel alteri vir-
tuti, aut simul pluribus annexa est (nam so-
la, præsertim sine heroicis virtutibus ani-
mo inesse nequit) degenerat diversimodè
in Excessum actionis & Insolentiam, Im-
pudentiam & prostitutionem famæ, aut
denique (ex elatiore rerum contemptu) de-
generat, in pertinentium incuriam, vel pro-
ut, per diversa genera vitiorum, aut ex-
cessum virtutum, passim hic suggestum
habes. Religio vel Pietas, in superstitionem,
Probas, pietas aperta & titulus Virtutis, in
Hypo-

Hypocrisim. *Quies, Modestia, tum animi tranquillitas, & laxamentum, aut (prætextu requiei) cessatio, in Ignaviam, Desidiam, Tepidas actiones, & amorem otii, aut in Incivilitatem, vel Solitariam & infociabilem vitam. Taciturnitas, in Reticentiam opportunorum. Timida conscientia, in inanem scrupulum. Justus dolor animi, aut multa rerum consideratio, degenerat in Mœsticiam, seu Mentis angorem, Impatientiam, Indignationem, Iram Excessivam, Abominationem rei vel personarum, & indebitam actionem, aut denique furem.*

Demum *Audacia tum animositas vel Magnanimitas. per excessum seu Abusum, degenerat, in Temeritatem aut furiosam actionem, tum periculi evidentis (immò quandoq; personarum) ex nimia sui fiducia contemptū, aut rerum impossibilium supra vires conatum, & ex eo levitatem, vel in impudentiam actionis, aut in inconsideratum impetum agendi. Deindè in falsam præsumptamque audaciam, seu desperationem. Securitas in Supinam incuriam, aut negligentiam, & contemptum alieni consilii. Fortitudo degenerat per*
Exces-

Excessum, in Impetuositatem, aut Ferociam. *Iustum bellum* vel *Belligeratio* degenerat in insolentiam irritandi, aut temeritatem, flagitia, devastationem, protractionem, aut carnificinam, inutilem alieni usurpationem & rapinam, vel rabiosam ultionem, aut quæ alia tristis ejus partus proles. *Perspicacitas*, *licita cautio* aut *circumspectio*, tùm *Conscientia* alicujus defectus, in *Respectum* nimium, *Diffidentiam*, *Vanas suspiciones*, *Desponsionem* seu *Abjectionem* animi, *Credulitatem* nimiam, *reconditam mentem*, *inane*que *timorem*, seu *pusillanimitatem*, aut *nonnunquam* in *ignavam desperationem*. *Constantia & stabilitas*, vel *Infractus animus*, seu *robur animi*, per excessum degenerat, in *Pertinaciam*. *Celeritas* tùm *properantia* seu *Activitas* in *præcipitantiam* aut *Impatientiam* moræ, dein in *Inanimadvertiã*, occasionem (immò accelerationē) mali aut contemptum considerandorum, & incuriam, ac post damnum. *Cunctatio*, degenerat per excessū, in *Tarditatē*, *Amissionem* occasionum, tùm in *Ignaviam*. *Cautio industriosa*, vel *prævidendi prudentia*, in *Astu-*

Astutiam, Fallacias, Versutiam & Dolum, Veritas Propositionis seu Narrationis, aut Dictorum prudentia, in Contentionem, Per-
tinaciam sermonis, ac dicacitatem super-
fluam, deindè in Impugnationem opposi-
tæ veritatis, seu affectatam destructionem
illationis, loquendo nonnunquam, magis
ex alieno instinctu & arbitrio, tàm pro au-
cupanda gratia, quàm pro veritate. Veri-
tas correctiva, aut debita reprehensio, tùm
Censura, degenerat per Excessum, in Im-
portunitatem dicti, Diffamationem, Ex-
probrationem morosam, tùm exacerba-
tionem & offensas, Prudentia ratiocinandi
aut Discursus, per excessum parit Garru-
litatem, aut Ostentationem, & Insolentiam
dictorum, fucatos sermones, frivolas pro-
bationes, & verborum rationumque pig-
menta. Studia & artes, Curiositatem
quæstionum, pruritum disputandi & con-
tentionis, tùm importunas novitates. Sci-
entia & Experientia, degenerat plerumque
in nimiam sui confidentiam & præsum-
ptionem prudentiæ, alieni consilii rationis-
que contemptum, & ultimò habet, Con-
fusionem.

Ac deinceps.


Ex defectu virtutum, vitia sunt. Ideoq;
Aliud est *rectè agere* vel *Esse prudentem agen-*
do, aliud Agere feliciter ex successu, scire
incipere & tentare leviter, aut trahere tan-
tum: Immodò secus, agere neglectim & me-
tuentèr, vel denique per audentiam & pro
impetu animi, ignorantèr inquietare actio-
nes, irritare, vexare, & confundere ma-
terias. Aliud *Probè (dicto facto) expedire*
idè Adimplere, vel aliàs, Respondere directè,
aliud Eludere. Aliud est *Esse Scientem,*
aliud Sciolum. Aliud *Esse Audacem,* aliud
Audaculum. Aliud est, *Esse in aliquo genere*
Virtutis, aliud sibi videri, aut haberi velle
affectatè. Aliud est *Dolere, vereri, vel agere*
aliquid filialiter, id est, pro virtutis amore,
aliud pro servili pavore, impulsu, aut respec-
tu, seu pro formidine poenæ. Aliud *Esse*
Amicum rectum, Constantem, Promptum,
aliud agere Adulatorem, Assentatorem,
Hypocriticum, verbo effusum, levemque
realitate vacuum, Intrusum, mensæ asse-
clam, mentiræ frontis, Sycophantam,
Cortesanum, Susurronem, Obsequiosum,
tuæ fortunæ [immodò sui causâ] non tui ami-
cum, vel potius magis familiarem, quàm
ami-

amicum, visu amabilem, re ipsa subdolum. Aliud *Exequi aut Esse in re, tùm spe certa vel praxi*, aliud esse tantum intra verba, promissave, tùm discursum, aut intra fallacia omnia ex futuro eventu. Aliud est, *Nolle spontè cessare, quiescere, aut sibi consulto temperare*, aliud deficere, otiosi, vel planè non posse; velut argute Seneca: *Nolle, in causa est, non posse, prætenditur*. Aliud est, *Consilium petere*, aliud vexare, tentare, aut Expiscari tantum, seu quærere placentia & assensum, velleque decipi. Aliud *Consilium dare*, atque aliud materias irritare, cludere, immò nonnunquam suavia innuendo [aut vera omitendo] adulari, assentiri, rebusque illudere & denique fallere. Aliud *Habere iustam agendi causam*, aliud Habere affectatum prætextum. Aliud est, *Facere, quod est virtutis & esse realitèr bonum*, aliud Cessare à malo, & esse tantum non malum, velut ille de Galba: *Magis extra vitia, quàm cùm virtutibus*. Aliud est, *Esse discretum* (ut vulgus communiter *Officiositatem Politicorum*, seu *Promptitudinem* vocat) aliud oblitum sui, & suorum, esse planè rerum incurium, mollem, & nimia familiaritate peccare. Aliud est *Esse eloquentem aut persuaden-*

*suadendo fortem ; aliud esse affectatè lo-
quaculum , pigmentis verborum & colo-
ribus ludere , imponendo rebus aliis .
dein alios per astutiam & Sophismata
eludendo , [tùm prout conducit, ampli-
ficando, extenuando, obtegendero] falsa sta-
tuere, proba invertere, personas denique,
resque fallere. Vel si quæ dantur, aut re-
ctius dici possunt alia.*

*Exinde , pro insolentia ingenii , ple-
rumque vitiis , nomina virtutum imponi-
mus , aut secus per malignitatem , vi-
giorum nomina , adstruimus virtuti,*

*Quod necesse [recto ingeniorum
virtutisque pensatori]
cavendum.*



Hinc proximum dicere

TRIPLEX
POLITICORUM
GENUS.

I.

Sunt *Catholico Politici*. Qui rationes
status & artes agendi, ad Regulam con-
scientiæ vocant, aut quod extra sit, utile, se-
curum, laudabile, æque illicitum putant,
candidæ mentis, nec ancipites, aut ex si-
mulato captiosi, cauti tamen & prudentes.
Horum actiones, apud versatos præsertim
& obliquos (quibus occasio faciendi pro
justitia est, & nisi dicta circuitiva, factaq;
arcanosa non aperta, sed obliqua, tum in-
voluta placent) ruditatis notam ferunt, ve-
rùm DEUS illis, uti rectis, apertè favet,
& supra media humana succurrit, ut plùs
solidiùsque possint, quàm alii.

2. *Stoico Politici sunt*. Qui inter ho-
nesti regulam, quidquid agendum sit,
actum quidem volunt, sed cùm ad Stoi-
cum rigorem se componunt, & cuncta vo-
cant, nihilque casui, tempori, & rebus
condonant, *Morosi aut Scholastici Politici*
sunt

sunt potius, quàm prudentes & Practici. Nec sanant aut componunt res, sed materias irritant sæpiùs, tristes aspectu, contractâ fronte, facie suspensi, non ad Civilem comitatem, sed velut ex Cathedra, totum agentes, rapiunt res agendas, nonprehendunt, urgent non amant, nec etiam amantur.

3. *Sophisto Politici.* Qui res agendi, fallaciis refertas habent, acerbicatem factorum, jocis eludentes, seu obtegentes suaviloquio, virtutis tum amicitiae larvam induunt, quò maligniùs noceant, post rem privatam cuncta ponentes, non verbo stant, non scripto, sed totum ad suum sensum detorquent, licita, illicita, pari studio involvunt, eoque magis suspecti, quò plùs dissimulationem inter, rem agunt, ex tacito magis metuendi. Cave (suadeam) hos, sed vix per summam prudentiam caveas. Tales plerumque suis artibus seipsos involvunt, læta rerum exordia, sed tristem eventum habent. Documentis quid opus? Consenuit orbis, nec alium illicitorum, quàm tristem vidit exitum, sola virtus æterna manet, concutitur illa, sed non frangitur.

Quartum genus Politicorum assignari potest, qui sunt Intermedii, de his judicium non fero, Infer Lector, libentèr audiam, nec inficiabor.

Hæc mea Catholico-Politiam loquuntur, & suadent Lectori.

Laus Vni in SS. Trinitate DEO

& Vni


Virgini Matri Dei Gloria.


F I N I S.





AΦ1
1655031


















BIB

V
